

Traité de la Pierre de 1486

Source BNF

<https://gallica.bnf.fr/ark:/12148/bpt6k15201980.r=Ortus%20sanitatis%2C%20tr%20anlat%C3%A9%20de%20latin?rk=21459;2>

Transcription : Yves Degoix avril-mai 2025 

vue 08 note manuscrite en début du livre

« L'auteur de l'original s'appelle **Johannes Cuba**. son livre passait autrefois pour un excellent ouvrage de botanique. Il a été imprimé une infinité de fois en Latin. La 1^{ère} édition en cette langue pour le titre de **Ortus Sanitatis** est de 1486 in folio ausbourg .

Mais on prétend que **Cuba** l'avoit composé d'abord en Allemand et que le Medecin **Theodorie d'Orstenius** l'a mis le 1^{er} en Latin. Il a été remis ensuite en allemand et en françois.

Cuba estoit allemand de Francfort sur le Mein.

Il y a toujours eu des estampes pareilles a icelle cy, c'est à dire, fort ridicules à toutes les éditions de ce livres et il a toujours été rempli de contes fabuleux sur les vertus des plantes et des animaux.

De Bure marque une édition de Mayenne de 1491 comme la 1^{ère} de ce livre comme étant très rare.

C'est dans le catalogue de Mr Halle que j'ay trouvé la note de celle de 1486.

Quant à cette traduction françoise, **De Bure** en fait aussi mention comme étant précieuse et ancienne. La date n'est pas certaine ; mais elle est antérieure à l'an 1500. **Verard** a commencé d'imprimer dès l'an 1486.

Le traducteur françois est inconnu. »

Dans cette édition française, suite à mes lectures et transcriptions j'ai remarqué qu' **Anthoines Verard** : Auteur, Éditeur et Imprimeur ne savait pas faire la lettre **k** rencontrée dans la version latine et qu'il la remplaçait par un **lr** que j'ai transcrit par un k pour la compréhension de certains mots du texte.

Ce qui laisse à penser que cette version Française date de bien avant la version latine de 1491 en ligne.

Il serait donc intéressant de trouver la première version Allemande ou encore la première version Latine.



Cela dit, je rajouterai ici l'ex-libris avec la devise d'Antoine VERARD qui se trouve tout à la fin de ce volume.

vue 986

Pour provoquer / Jesus / ta grant misericorde / de tous pecheurs faire
 grace et pardon / Anthoine Verard humblement te recorde / ce qu'il a / il (le)
 tient de toi par don /



Au cours de mes lectures j'ai remarqué une image inversée en forme de têtes
 pour la majuscule S vue 914



page 1467 du livre de 1491

vue 846

<https://gallica.bnf.fr/ark:/12148/bpt6k15201980/f844.item.r=Ortus%20sanitatis,%20translat%C3%A9%20de%20latin>

C'est le prologue

Senecque es naturelles questions au vii livre dit. Tout ainsi qu'en nous n'est pas seulement le sang / mais plusieurs manieres de humeurs : ainsi en terre sont plusieurs manieres de humeurs. Car il en y a aucuns quy sont endurcis par nature comme toute la terre des metaulx / de laquelle or et argent est engendré et fait. Aucuns autres sont qui sont de liqueur convertie en pierre : dont les pierres precieuses croissent. Et pour ce que au iiii. traictie dessus acomply a l'ayde de Dieu avons traictie des poissons aquatiques et nageans / et de leurs proprieté et natures : mainenant a l'ayde de Dieu le souverain commencerons le v. traictie des pierres precieuses et des choses qui naiscent es voynes de la terre et de leurs vertus : selon la maniere et ordre de l'alphabet comme nous avons fait cy devant. Premièrement dirons des pierres

Chapitre premier De adamante Aymant.

Adamas ainsi est dit en Latin / en Arabic hager suvedhig / et en Francois aymant.

Serapion au livre aggregatoire au chapitre hager. Hager suvedhig : c'est le mes d'ung fleuve auquel est la pierre de mes. Et est ung fleuve auquel ne fut jamais fors Alexandre es parties et fins de corasceni. Sa couleur approuche a la couleur de sel armoniac / et est froit et sec au quart degré.

Et luy mesmes de l'auctorité Dyascorides.

C'est une pierre de laquelle usent les orfevres pour graver les pierres.

Evax en son lapidaire. Adamas est une pierre tres dure ung petit plus obscure que le cristal : de couleur livide et luisant / si tres dure qu'elle ne peut estre rompue ne de feu ne d'autre chose : ne mollifiée ne solve. Elle est solue et mollifiée touteffois par chair et sang de bouc / especialement se le bouc par avant ait beuvin ou mangé siseleos de montaigne / ou persil / car le sang de tel bouc vault aussi a rompre la pierre en la vecie. Ceste pierre est aussy solue de plomb : mais elle ne attire point le fer pour ce que son propre lieu de generacion n'est point en miniere de fer : comme aucuns menteurs ont voulu dire. Les plus grans qu'on trouve sont a la quantité d'une avellaine. Ilz naiscent an Arabie et en Cypre / mais en Cypre sont les plus molz. Ceste pierre quant elle est submise a la pierre magnes qui est aymant elle le lye et empesche qu'elle ne attire point le fer.

Les operations de aymant.

Serapion. Sa plus grande vertu est en or et en argent et acier. Et quant elle est lyée au bras senestre vault contre les ennemis et insasnie / et les bestes qui ne

font point apprivoisées / contre noises et tencons et venins / contre incursions de fantosmes de incubes et succubes.

Ceste pierre a deux vertus qui sont pou souvent trouvées en autre pierre, l'une est qu'elle n'est point conjointe a autre pierre qu'elle ne soit rompue. Pour ce ses pieces ou fractures sont appareillées et mises au bout d'ung fer pour percer / et de icelle se percent les autres pierres : comme l'esmeraulde et le saphir / et les autres pierres.

L'autre vertu si est /

folio Cxxviii vue 147

car son petit grain de ses pieces rompues et qu'on le conglutine en la haulteur ou sommet d'aucun fer avec glux rommaine et qu'on le meste en la vecie par le trou de la verge elle rompt la pierre.

Elle a aussi une autre vertu car nulle chose ne rompt ceste pierre que plomb / car il rompt et contere

Luy mesme de l'auctorité Dyacorides. Adamas / c'est le dyamant une pierre de laquelle les orfevres usent / car ilz le mettent en greffez pour graver et tailler les autres pierrees. Elle vault aux gencives fluentes et si purifié les dens.

Luy mesmes de l'auctorité Galien. Sa vertu est qu'elle absterge et nectoye de forte abstersion.

Et le signe de ce est / car les orfevres en usent es choses qui ont mestier de abstersion / et nous avons experimenté quelle absterge et mundifié les dens.

Elle a en elle une vertu chaulde : et pour ceste cause elle est meslée es medicines conburantes et en aucunes medicines desiccatives qui guerissent les gencives fluans ou courans. Du livre des natures des choses. Adamas / le dyamant fait l'homme fort contre son ennemy. Il deboute les songes mausvais et vains / il dechasse le venin et le manifeste. On dit qu'il se amoistist a maniere de sueur quant on met venin pres de luy. Il prouffite aux lunatiques et a ceulx qui ont le diable au corps. On dit aussi que son atouchement vault a ceulx qui sont hors du sens et leur prouffite.

Chapitre ii De agathe Agathe

Agathes ou agapis. Agathes selon Dyacorides au mesme chapitre et a vertu moult grande / car elle a la couleur semblable a la couleur d'ung lion.

Ysaac Benjamin. Agathes est une pierre noire ayant petites vaines blanches a maniere de la pierre albesten. On en treuve une autre moindre de mesme espece / mais semblable au corail. Et la tierce espece le plus trouvée en Crete ayant en noir voinés jaunes. La quarte espece en Ynde diverse comme s'elle estoit semée de sang.

Les opérations de l'agathe

Dyacorides. Agathes pendue au col vault contre les morsures de l'escorpion / ou quant dicelle avec eaue sont oingtes en oste la douleur. Icelle pierre broyée et esparsée sur la playe ou donnée en breuvage vault contre la morsure de la vipere.

Elle rend celluy qui la porte bien parlant / prudent / amyable et agreable.
 Ysaac Benjamin. La premiere espece est convenable a la forme des roys qui sont gravez et figures en pierres / car plusieurs pierres ont des testes de roys gravées.
 Et quant elles sont mises soubz la teste d'aucun dormant on dit qu'elle fait plusieurs semblances de songes. La tierce espece qui est de Crete ayde et fait vaincre les perilz et est bonne pour les forces du cueur / elle rend l'homme agreable et plaisant : comme dit Evax : et si fait l'homme bien parlant et de bonne couleur.

Chapitre iii De alabandina

vue 848

Alabandina. Ysidore. L'alabandina est ainsi appellée de alabanda une province d'Asie : et est une espece ou maniere de cristal / duquel la couleur vient sur le celidonium / mais il est plus rare.

Arnault. L'alabandine a une resplendeur : et est rousse et clere comme sardius.

Les opérations de alabandine.

La vertu dicelle est quelle provoque et augmente le flux du sang.

Du Lapidaire. Alabandina est une pierre de laquelle la lumiere est ennemye de sardi.

Chapitre iiiii De alabastrite Albastre.

Alabastrite / almandinus et absinthus. Ysidore. Alabastrites est une pierre candide et entremeslée de diverses couleurs. Ceste pierre est cavée pour faire vaisseaulx a oignemens / car on dit qu'elle garde les oignemens sans corrompre. Elle croist environ Thebe & Egipte & Damas de Sirie / lequel est plus luyant que les autres / mais le tres bon est en Ynde.

Plinius. au xvi livre. Ilz appellent albastre une pierre quoncave pour mettre les oignemens. Elle croist environ Thebes d'Egipte & Damas de Sirie : lequel est plus luyant des autres / mais le tresbon est en Carmania / apres en Ynde & en Sirie & en Asie le plus vile / et celluy de Capadoce ne luyt aucunement. Et les meilleurssont ceulx qui sont couleur de miel au sommet et ayant taches / mais les pires et vicieux sont ceulx qui ressemblent a cornes et sont candides et comme semblable a voirre.

Selon Albert la pierre amandine est une pierre de couleur diverse. La pierre absinthus selon Albert est une espece des pierres de couleur de voirre a rouges vergettés.

Opérations de l'Albastre. etc

Dyascorides. Alabastrites est laxatif et amollist les duresses / et quant il est mis en sirop il appaise la douleur de l'estomach.

Albert. Almandinus estaint tout venin et le reprime : et fait vaincre ses advversaires : et donne plaine interpretation pour exposer les songes.

Albert. Absinthus / aucuns dient que la vertu de cette pierre est comme de la pierre abescarius / combien qu'elle est assez moindre. Car quant elle est alumée elle demeure chaulde par sept jours ou plus pour pareille cause qu'on dit de albescatio. La vertu aussi de cette pierre est en provocquant et augmentant le flux du sang comme les experimentateurs efferment.

Chapitre v De androdomantan

L'andromomanta et antracides. Ysidore. Androdomanta a la splendeur d'argent : et est environ le dyamant tousjours quarrée. Les magiciens dient qu'elle a ce nom pour ce qu'on dit qu'elle dompte

folio C.xxix vue 849

et refrene les impetuosités et courroux des courages. Elle croist en la mer Rouge.

Les opérations de Andromate

Arnault. Androdomanta est une pierre de couleur d'argent / laquelle est tirée de la mer Rouge. Sa forme est comme tessera quarrée et sa duresse comme le dyamant. Sa vertu est contre fureur / ire et courage esmeu.

Du lapidaire. Androdomanta est une pierre comme tessera quarrée. On la treuve en la mer Rouge meslée avec le sablon et arene. Laquelle le magicien afferme qu'elle presente peult appaiser les courages eschauffez et les yres.

Du livre des natures des choses. Androdomanta est une pierre quarrée et dure de si grande vertu qu'elle peult appaiser le courage eschauffe par fureur et luxure.

Ysidore. Antracites est de couleur de feu comme la carbuncle / mais illec est meslée d'une vaine blanche ; de laquelle la propriété est / car quant elle est au gestée feu il s'estaint comme mort et se brusle contre.

Plinius au xvi livre. Entre less carbuncles est une espece de antracitis en thespocia trouvé es fosses semblable au carbuncles / lequel est meslé d'une vaine candide.

Aaristote. Antrap c'est à dire le carbuncle rouge : son met avec la pierre de Orichy elie luyra et resplendra de nuyt.

Albert. Androdomanta est une pierre de couleur d'argent qui vient en la mer Rouge / ceste pierre est quarrée et dure comme le dyamant. elle a vertu contre la fureur et cogitacion et pensée de legier courage et contre la tristesse et griefveté.

Chapitre vi. De Alectorio Alectoire.

Allectorius. Solin. Allectorius est une pierre de semblance cristalline de la quantité d'une feve trouvée es testicules de coq gallinacé : convenable comme l'en dit a ceulx qui bataillent.

Dyascorides. Allectorius est une pierre trouvée au ventre d'ung coq gallinacé.

Arnault. Allectorius est une pierre semblable a cristal obscur extrait du ventre d'ung coq chastré apres la quarte année.

Du livre des natures des choses. Allectoris est est une pierre semblable a cristal ou a eaue clere. Elle est trouvée au gesier d'ung coq chastré apres qu'il aura vescu chastré pendant trois ans. On n'en treuve point de plus grande que de la quantité d'une feve / Laquelle pierre depuis qu'elle sera au coq gallinacé jamais depuis ne beuvera.

Les opérations de allectorius.

Dyascorides. Allectotis ou allectoire est trouvée au ventre des chappons / laquelle se ung homme d'armes tient en sa bouche il demeure non vaincu et sans soif. Elle prouffite aux femmes qui veulent complaire aux hommes / car elle rend celles qui la portent gracieuses et belles.

Arnault. Allectoire esmeut luxure et fait l'homme constant. Il reprime la soif a celluy qui la tient en sa bouche.

Du livre des natures des choses. Allectoire est bonne aux frois et a ceulx qui ne pevent cohir. Elle fait plaire a son mary la femme qui la porte. Elle rend celluy qui la porte non vaincu et sans soif. Et quant les roys sont en leur bouche ils bataillent fort.

Physiologus. Le allectoire naist au ventre du chappon. Elle rend l'homme discret et agreable et par la femme a l'homme / et pour avoir toutes ces choses on la doit enclorre en sa bouche.

Du lapidaire. Du ventre du coq auquel on a osté les testicules et qui est chastré et qui aura trois ans du moins depuis sa castration est trouvée ceste pierre : de laquelle la louenge n'est pas petite / laquelle prent sa vertu en quatre années : et ne excede jamais la quantité d'une feve : et est semblable a cristal ou a eaue clere. Elle rend l'homme qui la porte invincible : tenue en la bouche elle le rend sans soif. Elle fait l'homme qui la porte agreable devant le juge. Par laquelle pierre plusieurs roys ont este victorieux en bataille. Elle fait l'homme estre discret / en langage et parolles agreables a tous et constant. Elle rend

vue 850

l'homme puissant en luxure et la femme agreable a son lary : mais affin qu'elle ait toutes ses puissances il fault qu'elle soit enclose et portée en la bouche.

Chapitre vii. De ametisto Amatiste

Ametistus. Ysidore. Ametistus / amatiste de Ynde entre les pierres purpurées tient la principaulté. Sa couleur de pourpre meslé de couleur violette comme ce seroit rose / laquelle envoye facilement aucunes flammes. L'autre maniere de ceste pierre tire sur la jacinte / la cause de son nom siest / car elle a en elle comme pourpre / non pas ayant couleur de feu / mais de vin rouge. Ceste pierre est legiere a graver. Il en y a de cinq especes ou manieres.

Arnault. L'amatiste est une pierre de couleur de pourpre comme une rose / laquelle vient et est apportée de Inde. Il en est de plusieurs especes / mais icelle de Ynde est plus prouffitabile qui est assez molle pour graver / car les amatistes de Ynde sont principales entre les autres / mais en Arabie qui est voisine en la

petite Armenie / en Galacie et en Egipte / mais les tres mauvaises sont trouvées en Tharase et Cypre. En Ynde le phenix a couleur de pourpre / et a ce les officines des taincturiers mettent leurs entendemens. Elle envoie sa splendeur en regard doux et ne envoie pas si grande lumiere aux yeulx comme fait le carbuncle. Leur autre espece tire sur les jacintes : laquelle couleur est appellée ynde / et c'est panarités aupres et environ les Arabiens. La quarte espece a couleur de vin. La quinte espece tourne sur le cristal blanc. La vanité et supersticiosité des magiciens dit que ceste pierre resiste a yvresses et fait plusieurs autres merveilles.

Les opérations de l'amatiste.

Du livre des natures des choses. L'amatiste est la meilleure entre les pierres de couleur violée. Il en est une maniere comme une goutte de vin corrompue d'eau / laquelle est moult facile a graver. Ceste est bonne a ceulx qui boivent vin : car elle resiste a yvresse et y est contraire. Aristote. Se tu metz la pierre amatiste sur le nombril elle empesche la vapeur du vin et oste ebriété et delivre l'homme de contagie.

Arnault. La vertu de amatiste est contre yvresse / elle rend l'homme vaillant et deboute mauvaie cogitacion et donne bon entendement.

Chapitre viii. De asio

Asius. Dioscorides. La pierre nommée asius est tant seulement trouvée en Alexandrie / laquelle est moult bonne en l'usage de medicine qui est en couleur luisant et moult legiere residente en la main comme pouldre. Elle guerist les fistules / scrofules / la podagre et autres mauvaises passions.

Serapion. La pierre asius est une pierre trouvée en Alexandrie. La fleur de ceste **folio Cxxx vue 851**

pierre est appellée fuca / et cest la pierre asius. Il en est une qui en substance est semblable a pouldre de moulin qu'on trouve environ elle et dessoubz. Ceste pierre est blanche / et doit on eslire celle qui est blanche et legiere semblable a punice subtile et tost frangible / en laquelle sont aucunes vaines cachées / et sur laquelle est une fleur comme rouge. Ceste pierre seiche est semblable a une ponce / sur laquelle s'engendre farine / de laquelle aucune est blanche et aucune rouge semblable a punice tournant a croceite et jauneur. Et quant elle est appliquée a la langue elle mort de petite mordication.

Et luy mesmes de l'auctorité de Galien. Ceste pierre est nommée de nom acquis du lieu / c'est assavoir de Asie / elle n'est point du tout dure comme une pierre / mais en sa couleur et substance elle ressemble aux pierres qui sont trouvées aux lavoirs des baings / elle est moult tendre / et se rompt tost / sur laquelle a pouldre semblable a celle de moulin trouvées sur les paroyz du moulin. Ceste medicine est appellée de la pierre asies / elle est subtile / et pour sa subtilité elle dissout les chars sans mordication.

Les opérations de asio.

Serapion de l'auctorité de Dioscorides. La vertu de cette pierre et de sa fleur si est que elle guerist les ulcères profondes qui sont difficile curacion quant elle est seiche / elle oste la chair superflue qui est en icelles. Elle guerist aussi les ulcères frauduleuses les remplit de char et les mondifie Et quant on la mesle avec miel et vin aigre elle est bonne es ulcères fraudulentes : car elle ne les laisse point augmenter au corps. Et quant elle est meslée avec farine de feves et qu'on en fait emplastre elle est moult bonne en podagre. Elle est aussi bonne a la durté de la ratte / et quant on en fait le hot avecques miel elle est bonne es ulcères du poulmon. Et quant on met de cette pierre dessus la scabelle sur laquelle les podagres tiennent leurs piedz elle leur est moult proffitable. Et quant on asperge ou espart de la pouldre sur les corps gras au baing en lieu de nitre elle les amesgrist. Et qui veult laver ceste pierre ou sa fleur / elle soit lavée comme on lave cluma.

Chapitre ix. De albesto

Albeston. Albert en son lapidaire. Albeston est une pierre de couleur de fer selon Pline / et est trouvée en Arabie.

Les opérations de albeston.

Albert. Sa vertu merveilleuse est notoire es temples des Dieux / pour ce que quant elle est une fois alumée jamais ou a paine ne se peut estaindre / pour ce qu'elle a la nature d'une beste appelée salmandra avec ung petit de humide gras unctueux inseparable.

Ysidore. Albeston est une pierre de Archadie de couleur de fer / qui a prins son nom de feu / pour ce que quant elle est une foys alumée jamais ne se peult estaindre.

Chapitre x. De aquille lapide.

vue 852

Aquille lapis. La pierre de l'aigle comme dit sera au livre aggregatoire. au chapitre Hager Athamat / c'est a dire la pierre de l'aigle est une pierre d'Inde / laquelle quant elle est agitée et remuée on oyt dedans elle une autre pierre. Sa miniere est es montaignes de Inde / entre Chirras et Saradi / au pres du rivage de la mer Océane. Elle est appelée des Grecs alegenant l'enfantement / et ceste propriété est trouvée en ceste pierre de l'aigle.

Et luy mesme de l'auctorité Rasis. Athamach est la medecine de Inde / cest une pierre semblable a une chastaine / si non qu'elle a la couleur d'une toyson / et quant tu la remues on oyt dedans elle pierre / laquelle quant tu la casses ou romps ceste pierrete yst hors / et est comme une avelaine tendant a blancheur. Et icelluy Rasis au livre des propriétés dit que cest une pierre semblable a ung oeuf qui a dedans soy une autre petite pierre.

Albert en son lapidaire. La pierre echides / c'est a dire de l'aigle est tres bonne entre les pierres de couleur de pomme de pin / laquelle d'aucuns est appellée aquilleus / et des autres erodialis / pour ce que les aigles portent ceste pierre en leur nid la mectant aupres de leurs oeufz. Semblablement la grue l'a met entre deux oeufz qu'elle fait. Ce a este experimenté en Coulongne / la ou les grues avoient fait leurs petis par plusieurs ans en ung jardin. La pierre de l'aigle est trouvée environ le rivage de la mer Océane / ou il y a les tres bonne especes de echides qui sont heritiers de oyseaulx. Et dit on que aucuneffois est trouvée en Perse / et est sa maniere qu'elle contient en elle une petite pierre qui sonne en icelle quant elle est remuée de la main.

Les opérations de la pierre de l'aigle.

Serapion. Ceste pierre est dicte de l'aigle car quant l'aigle veult faire ses oeufz le masle apporte cette pierre des parties de Yndes / et la met au nid pres l'aigle femelle / et cette pierre l'a fait pondre facilement et faire ses oeufz / et alege sa douleur / et aussi fait aux femmes et a toutes bestes quant elle est mise dessoubz elles a l'heure de l'enfantement.

Et luy mesmes de l'auctorité Rasis. Quant elle est mise en une piece et est pendue a la cuisse de la femme quant elle doit enfanter / elle fait l'enfantement legier avec facilité. Et suis expert de ceste chose et l'ay ainsi trouvé estre. Et se concordent tos qu'elle allege l'enfantement quant elle est liée a la cuisse et ayde quant elle est mise en lieu de l'herbe nommée pione / et est trouvée pour nectoyer et curer. Ceste pierre est trouvée vers nous / et largement / et ay verifié plusieurs foys l'experience. Evax en son lapidaire au chapitre de lapide aquille dit que quant elle est pendue au bras senestre / elle est convenable aux femmes grosses et reconcilie amour / et augmente et accroist les richesses la ou elle est portée / et empesche aux femmes grosses de avorter / et si attenpere le peril de l'enfantement. Elle empesche la cheuste des caduques qui ont maladie caduque. Et semblablement si aucun a souspecon de l'administracion de venin en une viande. Elle empesche que cette viande ne puisse de luy estre engloutie et mangée / et si la pierre est ostée incontinent l'engloutira et avalera.

Albert. On dit que si elle est pendue au bras senestre elle convient aux femmes grosses / et reconcilie amour / et accroist les richesses la ou elle est portée. Et aux femmes grosses empesches l'advorcion / et attempere le peril de l'enfantement. Et dit que semblablement elle empesche de cheoir ceulx qui ont maladie caduque. Et dient les Caldéens qui est chose merveilleuse que si aucun est souspeconné de avoir administré du venin en aucune viande / ceste pierre empesche que la viande ne peut estre engloutie ne avalée / et si la pierre est ostée incontinent sera engloutie.

Et dit Albert avoir veu ceste chose sensiblement approuver et examiner a ung sien frere. Toutefois les aigles quierent ceste pierre et la mectent en leur nid ; et les grues entre leurs oeufz : mais elles en mectent une en une année / et en l'autre année une autre. Et dient aucuns qu'ilz font ceste chose pour attempere la chaleur de leurs oeufz / ou du corps de l'aigle / affin que les oeufz ne

s'eschauffent trop et ce est probable. Et aucuns disent qu'elle prouffite et donne aucune chose a leur formacion ou vivificacion. Et ce que aucuns dient que la pierre est mise des autres oyseaulx entre leurs oeufz affin que les oeufz ne se cassent et rompent / est faulx / car plus tost se rompent hurtez contre la pierre qu'a eulx mesmes. Et dient aucuns que quant aucun a souspecon de venin en une viande et ceste pierre est mise sur la viande incontinaent ne pourra estre avalée ne transgloutie cette viande / et quant la pierre est ostée la viande est transgloudie / en laquelle la pierre est mise.

Chapitre xi. De astrion astrion

folio Cxxxi vue 853

Astrion et asterite. Ysidore. Astrion est une gemme cristalline / qui est en Ynde prouchaine au cristal au centre de laquelle reluist l'estoille de la lune plaine de resplendisseur. Et a prins ce nom / pour ce que quant elle est opposée aux astres et estoilles / elle prent et porte la resplendisseur.

Plinius. En Carmanie naist une gemme qui est nommée astrios semblablement blanche comme astiria ou astirites / et est prouchaine au cristal. Et aussi naist cestuy astrios en Ynde es rivages Palenes. Et rendent aucuns la cause pourquoy elle a ce nom strion / pour ce que quant elle est opposée aux astres elle prent et porte la resplendisseur. Et croist tres bonne en Carmanie / et qui n'est tachée de nul vice.

Luy mesme Ydidore. Asterites est une gemme blanche qui contient lumiere enclose ainsi comme une estoille cheminant dedans et rend les rays reluyans du soleil / dont elle en a trouvé le nom. La gemme astrerie est prouchaine des gemmes reluyantes et candidantes ayant principaulté par la propriété de sa nature. Laquelle contient lumiere enclose en maniere de pupile ou prunelle de l'oeil / et se transgecte avec inclinacion ainsi comme cheminant par dedans se rendant d'ung lieu a autre lieu.

Chapitre xii. De arena Arene

Arena. Ysidore. Arene est dicte de seicheresse. Et l'aprobacion est telle : car si elle est pressée a la main et brisée elle crye et siride ou esbandue sur une robbe blanche et candide / elle ne laisse rien de ordure. Ditrubius. autre est l'arene de Fosse / autre se fleuve ou de mer. De l'arene de Fosse sont ces espesses ou genres. C'est assavoir nigracane / rouge / et carbuncule. Et la meilleur de ceulx cy est celle qui fait strideur et bruit quant elle est frotée a la main / et celle qui est terreuse n'a point de asprete. et si elle est mise sur vestement blanc et candide / elle est areneuse. Et touteffoys elle est fouye et prinse des fleuves et est extraitcte de argille. et touteffoys ceste cy est odieuse en ediffices : car elle seiche difficillement et ne seuffre point la paroy estre continement chargée de soy / si non que elle repose par intermissions et laissezmens / et si ne recoit point

de concameracions / c'est a dire de courbemens et fleschissemens. Et celle qui est de mer encores plus que ceste / et aussi les paroyz quant les maisons sont faictes en laissant leur humeur et salsugine se dissolvent et fondent. Et celles qui sont de Fosses deseichent hastivement et demeurent et sont permanentes les maisons et toitz faictes dicelles / et si seuffrent curvées et flechies. Mais celles qui sont nouvelles et fresches années des lieux arenaux si elles sont longuement au soleil et a la lune et a la froidure par forcées se resolvent et sont faictes pierreuses / si que quant elles sont mi-

vue 854

ses en ediffices / elles ne peuvent contenir les cymens / mais glissent et coulent et cheent / et ne peuvent soubstenir les charges des paroyz.

Paladius au premier livre de agricultura. De tous les genre et especes de arene la meilleur est celle qui est rousse. L'autre apres est celle qui est blanche. Et le tiers lieu possede celle qui est noire. Mais l'arene fossile n'est point trouvée. Et est amassée et concueillie de l'argille des fleuves ou du rivage. et celle qui est de la mer se seiche plus tard. Et pour ce elle ne doit pas continuellement estre mise en oeuvre / mais par temps entrelaissés / affin que les ouvrages charges ne se corrompent et destruisent.

Les opérations de l'arene.

Du livre des natures des choses. L'arene gecte sur la flamme du feu inextingible la destainct.

Dyascorides. L'arene de mer qui est au rivage eschauffée du soleil deseiche les chairs humides. Item quant elle cuyte elle ayde aux sacelles a oster la tumeur et enfleure des interiorités.

Chapitre xiii. De argilla Argille

Argilla. Bertholomeus au livre des propriétés des choses. L'argille est une terre tenant glueuse et visqueuse disposée et convenable a diverses oeuvres de vaisseaulx de terre.

Et ainsi selon Ysidore au xvi livre au premier chapitre. Elle est ainsi appelée des arges qui premierement firent vaisseaulx de terre de telle matiere. Et ainsi comme illec est dit / telle terre par l'action de chaleur consumant les parties plus liquides et consolidant les terrestres est cocommuée en tuille. Et aussi souvent advient que telle terre luctueuse et onctueuse se congelant par la froideur de l'eaue est commuée en pierre. Souvent aussi advient telle transmutacion de la boe onctueuse en pierre de chaleur la coagulant ainsi comme il est dit au quart livre de Methiores. La terre onctueuse est convenable et apte a ceste transmutacion / c'est assavoir en pierre par coagulacion de chaleur / par quoy l'unctueux est moyen entre visqueux et vaporatif ayant humide visqueux. Dont par la grace et benefice du vaporatif peult du chault estre coagulé / et par la grace du visqueux ny peult pas estre du tout mene / mais plus fort estre comprimé et consolidé / et ainsi estre transmue en pierre.

Les opérations de l'argille.

Ainsi que illec dit le commentateur. L'argille par sa froideur est restrictive du sang.

Constantin. Si l'argille est destrempée avec fort vin aigre/ et est mise au front et es temples / elle empesche le sang qui flue des narines.

Chapitre xiiii. De armeno Amené

folio Cxxxii vue 855

Armenus selon Plinius au propre chapitre. La pierre armenus est dicte et nommée a celle region et est livide et tirant sur le blanc / et est la meilleur celle qui a la couleur moyenne entre vert obscur terrestre et ynde / et a distinctions de taches vertes et noires.

Avicenne au ii livre au chapitre de la pierre armenus. Elle est aucun pou de couleur d'azur / touteffois elle n'est pas en la couleur / mais y a en elle aucune arenosité. Et aucuneffois les tainturiers et paintres usent dicelle en lieu de azur / et est douce au tast.

Les opérations de la pierre armenus.

Jehan Mesue. La pierre armenus / comme dit Alexandre est des verificateurs trouvée avoir prerogative de expulser la colere noire de laquelle l'operation est plus forte et meilleur que de eleboré noir / et est plus vertueuse que la pierre de azur. La meilleur est celle qui a la couleur moyenne entre vert obscure et terrée et ynde et a distinctions de taches vertes et noires / et qui n'est pas au terme de pierre / mais facilement dissoluble et pulverisable. Et qui est douce au tas et qui n'a point de asprete et est de chaulde complexion au commencement du second degré et seiche en icelluy. Et est resolutive et abstersive / et est de ceulx qui conturbent et subvertissent l'estomach ; et expulsé par vomit et par le ventre / et nuyst a l'estomach engendrant subversion et faisant solution avec angoisse. Et dit Alexandre. Quant elle n'est point lavée elle dissout par vomissement et par le ventre sans molleste. Et l'art de la laver est cestuy. Soit subtilement broyée en ung vaisseau de pierre / puis apres soit mise dessus de l'eaue douce et soit lavée ainsi en broyant / et soit faicte ceste chose par trente foys tousjours renouvelant l'eaue / et puis apres encores soit par dix fois lavée av(e)cques eaue de roses.

Et dit Alchindus. Soit lavée avecques eaue de buglosses aspres sa depuration / et il luy est acquise une propriété merveilleuse de ce aux maladies melancoliques.

Avicenne. Elle expelle en dissoluant la melancolie plus que la pierre lazuli et pour icelle est laissé le clebore noir.

Jehan Mesue. Elle degette par solution la colere noire avecques vertus et mundifié le cerveau dicelle et vault a ses maladies melancoliques / comme est inanité et avertin / Et douleur de la teste et epilencie. Et aux maladies de paour et suspicion. Et a la lepre / et aux maladies de la rate : et au chancre et a morfée et aux fievres melancoliques. La dose quant n'est point lavée la potion et beuvrage

est de demye dragme jusques a une dragme / et demye et la potion de la lavée est de une dragme jusques a deux.

Chapitre xv. De Antimonio Antimonne

Antimonium en Latin / en Grec anthimos / en Arabic aytrual / en Francois antimonne. L'antimonne est une vaine de terre semblable a plomb / il est verité que entimonne se broie / mais il ne se font point / mais le plomb ne se broye point mais il se font / lequel a en ses fractures une clarté quant il est rompu. Celluy est le meilleur lequel en ses fractures n'a riens de terre ne de autre ordure / et pour ce quant on le met en medicine on le doit mettre lavé et nettoyé / il est froit et sec au iii degré.

Serapion au livre de l'agregateur au chapitre aytrual. Aytrual ou antimoine est une vaine de terre semblable a plomb / lequel est medicine pour les yeulx. Il est distingué du metal : car l'antimonne se broye / mais le metal non : semblablement le metal se font / mais l'antimonne se brusle. L'antimon de tant qu'il est plus cler de tant vault il mieulx. Luy mesmes de l'auctorité de drosco-
vue 856

rides. Le meilleur et le plus fort cest celui que quant on le rompt il a clarté en ses fractures / et qui est par dedans net sans y avoir terre ne autre ordure.

Almansor au iii traicté au chapitre antimonne. L'antimonne est froit et sec au iii degré.

Les opérations de antimonne.

Pour deseicher les emorroides soit gette dedans jus de peucedanum par le clistere / et se elles sont dehors metz pouldre de antimonne dessus / et quant elles sont dedans / la pouldre soit mise dedans par ung tuyau mis en une vessie enflée. La pouldre de icelluy confitte et meslée avecques savon Francois se on y trempe une tente ou lymignon / et qu'on le mette en l'orifice de la fistule elle la guerist. La pouldre dicelluy est bonne a mettre en ung chancre ou un chair superflue. Contre le polippe d'ung magdaleon fait et forme de loingument appellé apostolicum avec pouldre de antimonne esparsé et mis es narines le guerist et oste ; Collire de pouldre de antimonne et de la pouldre des noyaulx de mirabolaine citrins en poix egal avecques eaue rose ou en tuthie mise avecques l'antimonne est tres bon. Cotton moille en jus de la sanguinaire avecques pouldre de antimonne mis aux narines oste le flux de sang dicelles. Pour empescher le sang pouldre d'antimonne confitte avecques jus de tapsus barbatus / et cotton moille dedans soit mis dessus. Serapion de l'auctorité de Galien. En cette medicine est vertu stiptique et conglutinative et infrigidative. Elle oste la chair superflue qui est es bicerers encharnée consolide et mundiffie leurs ordures. Et restraint le flux de sang des narines. Et sa propriété est d'estre bon pour epilence et en superfluites grosses.

Almansor. L'antimonne fait l'oeil robuste et garde la santé dicelluy / et quant il est soubzmis il restraint les menstrues.

Pausus au chapitre de l'antimoine. L'antimoine par sa froideur et seicheur restraint le sang des narines / et est tres bon a mesler es collires des yeulx. Les anciens qui usent dicelluy ont les yeulx sains / car il conforte les nerfz et oste toute macule et empeschement / especiallement quant on en mesle ung petit.

Chapitre xvi. De attramento attrament

Attramentum. Ydidore. Attramentum est ainsi dit pour ce qu'il est obscur / duquel les especes et peintures sont necessaires pour l'usage cotidien.

Du livre des aluns et selz. Attrament est eaue et tainture que la seichesse de la terre a congelé / lequel est en sa nature chault et sec. Dicelluy sont plusieurs especes / mais le meilleur est d'Espagne / lequel noircist les corps / et augmente le rouge de rougeur. Mais le blanc noircist.

Du iiii livre des Metheores. Les aremens sont composés de sel de souffre et de pierres. Esquelz est aucune force et vertu des corps liquables / car ilz en sont fais comme calcantum et abachat sont engendrés des plus grans grains de attrament / duquel la salsitude n'est point solue si non en ce qu'est sulfureux et apres le residu est coagulé / lequel a desja prins aucune vertu minerale en aucuns corps. Car celluy qui aura prins la vertu de fer sera rouge ou jaune ou calather / et celle qui aura vertu d'arain sera vert comme calcantum. Pourquoy il est possible que soient fais artificiellement.

Les opérations de attramentum.

Avicenne au ii. canon. Attrament est chault et sec au ii. degré. Ilz sont bruslans et stiptiques / ilz sont bon en scabie / et en

folio Cxxxiii. vue 857

dureté des paulpieres et aspresse dicelles / et es apostumes des aignes. En l'attrament il y a une vertu venimeuse deseichant le poulmon et par adventure elle occist. On le souffle es narines pour le flux de sang especiallement alcochotar : duquel aussi se sont limignons. Lesquelz sont mis es fistules. Ilz expellent les ventositez. Le limignon est bon es ulceres de l'aureille et a sa sanie. Il empesche aussi la corrosion des dens. Item en icelluy est adustion vehemente constriction et explication de flux de sang et tres grande stipticité. Il vault aussi en herisipile et formice quant on les en oing avec eaue de coriandre. Il est pulverisé sur la playe fraudulente et ambulative. Il brusle aussi la chair adjoutée. Il est aussi bon en flux de sang des narines et es apostumes des gencives. Il empesche le flux de la marris. Il est aussi mis en alchool pour absterger et subtilier la grosseur des paupieres.

Ce mesmes dit Plinius mais par autres paroles

Chapitre xvii De alumine alun

Alumen . Ysidore. Alumen alum est ainsi appellé de lumiere pour ce qu'il donne lumiere aux couleurs a taindre. Cest une salsitude de terre qui se fait en yver

d'eaue et de lymon / et au soleil de l'esté se meurist. De celluy sont deux especes. Le liquide et les pes.

Dyascorides. Ilz sont plusieurs especes d'alun : mais trois necessaires en medicine. Le rond / le taillé / et le liquide. Le rond est le meilleur qu'est forme par naturelle rondeur / fistuleux subblanc qui se peut froter / non pierreux / en aucune partie pasle / gras. Le taillé ou trenché est tres bon qui est comme une fleur blanche / rond / legier. etc. Le liquide le meilleur est qui est legier luyant en hault : ayant aucune chose a maniere de farine auesques laict.

Rasis au livre des selz et des aluns. Alun cest une huille que la seicheur de la terre a coagulé : lequel est en sa nature chault et humide. Il retient toute chose volatile. Il mundifie et decore les corps et augmente leur tainture.

Le alkymiste. Alun en prenant le nom largement est dit toute chose qui lye la tainture au corps : comme en draps et en cuyrs. Et ainsi comme il y a diverses taintures : aussi il y a divers aluns / car chascune tainture a mestier de son alun : sans lequel elle ne se pourroit imprimer ne lye avec son corps. Pourquoi comme les aucuns dient : alun ne donne point de lumiere / mais il fait joindre la lumiere / c'est a dire la couleur. Comme il appert au cuyr qui n'est point préparé avec galle se la tainture n'est imprimée. Par ainsi la galle : cest l'alun de tainture noire / comme cendre clavellée est l'alun du coustel : le alun duquel nous faisons mencion cest l'alun de tainture rouge : combien que l'alun ne rougisse point fors le blanc.

Les opérations de l'alun.

Le Plateaire. Alun est chault et sec au tiers degré. Il a vertu de consumer et de seicher vehementement. Le blanc est le meilleur et le plus agu et meslé avec sel / mais celui qui est ort et cireux est impur. Son usage est en chancre / en inflacion de gencives et en scabie. Le baing d'eaue alumineuse vault aux ydropiques / roigneux et artetiques.

Dyascorides. Toute maniere d'alun a vertu constrictive et consumptive vehementement. On en fait medicine aux pourritures et flux de sang. Aux gencives humides ou aux dens molles avecques vin aigre ou miel. Luy mesmes. Il guerist le flux des aureilles avec le jus de poligonia. Il guerist aussi les chairs superflues / et les puanteurs des aisselles et des aignes.

Avicenne. L'alun est chault et sec au tiers degré. Il deseiche et empes-

vue 858
che toute maniere de flux de sang et autres superfluitez. Avec eaue il occist mousches canines nommeés cimices et les poulz / et si oste la puanteur de la bouche. Et avec la fece de vin et autant d'alun deseiche les ulceres difficiles. Avecque sal gemme il vault a la corrosion et adustion de feu.

Du livre des natures des choses. L'alun universellement est chault et sec au quart degré / stiptique et mundificatif / clerificatif de l'obscurété de la vueue. Il corrode aussi la chair superflue des palpebres et des autres membres. Il empesche et deffend que les tres mauvaises ulceres ne cheminent et ne ambulent

point par le corps. Quant il est meslé avec vin aigre et miel il conforte les dens enfermes. Il est aussi bon aux gencives enflées.

Chapitre xviii. de auro Or

Aurum. Ysidore. Aurum or est ainsi dit de aura : c'est a dire de splendeur / car par la repercuton de l'air il resplendist plus. Du livre des natures des choses. L'or est trouvé es rivages et en fontaines / et aussi en montaignes aucunesfois : mais pou souvent. Il y a grant labour et paine a se laver : mais en grant subtilité ou menaite / car on le treuve meslé es ordures. Toutefois on le treuve pur sans estre meslé avec ordures et terres : comme l'arain et l'argent. Item au mesmes livre. L'or est le plus precieux des autres metaulx / le plus durable et le plus traictable : en tout temps resplendissant. Il n'est point consommé par rouilleure. Il nourrist la veue. Et de tant qu'il est plus rouge de tant vault il mieulx. Il est plus pesant en double poix que n'est l'argent ou le cuyvre ou l'estaing. Et combien qu'il soit le plus ductible et mallable de tous les autres. Plus attempé de tout autre metal. Et ce est : car sa chaleur est de petit exces. Il n'est point mis en degré. Luy seul n'est point resolu.

L'acteur. L'or n'est pas seulement tres precieux entre les metaulx / mais aussi tres solide et pesant. Il a couleur de feu tres splendissant et confortant la veue. Quant il est mis au feu il ne se brusle point mais il se purge et est esprouvé. Doncques il est mis au feu pour trois causes. Pour examiner / pour purger / et pour forger. Il est moult convenable au corps. Et quant il est prins en viande il aide moult.

Aristote. Au tiers livre de metheores. L'or fond a la chaleur vif soit tres bon et cler avec rougeur/ et qu'en luy soit la force et vertu de igneite simple non bruslante : ce sera une des tres bonnes choses que les alchimistes puissent recevoir affin que dicelle ilz facent l'or. Car ce mesmes se covertira en or.

Avicenne. L'or est de plusieurs manieres. C'est assavoir : naturel / magistral / xirchy / zafry / obrison / colon / et d'autres manieres. Mais celluy qui est de elixir vault mieulx que l'aigre ; duquel on ne peut ouvrer. L'or de elixir est en trois manieres , c'est assavoir de la pierre des cheveulx / de sang e des oeufz / Car or ne peut estre or de autre pierre. Mais aucuns font or faulz et argent aussi : car ilz estraignent / c'est a dire endureissent l'estaing et le blanchissement / et dient que cest argent. Comme aussi quant ilz mettent l'or pigment dessoubz fiens et qu'ilz y meslent sal armoniac / et l'incorporent avec cuyvre passe par botum barbatum et mercure rouge / et dient que cest or. Neantmoins en quelque maniere que ce soit il est esprouvé en sept manieres et congneu par magistere : c'est assavoir en solucion / en la pierre / en la poix / en goulz / en feu / en sublimacion / en fusion. La nature de l'or naturel par nature est chaulde et seiche. Et autant comme le fer a de nature de seicheur et de dureté / autant l'or a nature bonne et molle / lequel est fait au ventre de la terre de tres bon vif argent et de soulfhre non pas noulz rouge et cuyt.

folio Cxxxiiii vue 859

Les operations de l'or.

Du livre des natures des choses. L'or est de chaulde nature / lequel guerit la lepre et scabie quant il est redigé en pouldre et meslé es antidotes. Il a vertu aussi de conforter non pas qu'il soit incorporé ou qu'il nourrisse les membres / mais il immute ou change le corps par une vertu alterative. La playe faicte d'or ne se corrompt point en tumeurs.

Haly en sa pratique regale au second sermon. Les fueilles d'or mangerent l'argent sans morsure / car elles sont seiches et subtiles. La lumiere d'or conforte le cueur et est medicine a trembleur ou pulsion. Acathimia d'or est la meilleur / plus tenue / plus deseichant et plus lymant laquelle quant elle est bruslée et lavée elle deseiche les ulceres des yeulx sans morsure. L'acteur. L'or comme il est dit dessus est le plus attrempé de tous autres metaulx / car en tant que sa chaleur est de petit exces pour ce il n'est point mys en degré : jacoit que d'aucuns il y soit mis.

Avicenne au second canon. La medicine d'or est egale subtile : et conforte l'oiel quant on le met en alcohol. Elle ayde aux douleurs du cueur et a son tremblement. Le tenir en bouche oste la puanteur dicelle. Le cantere qui est fait d'or est meilleur plus legier et plus curable que d'autre metal. Il aide aussi aux douleurs du cueur a son tremblement et au tremblement de l'aine : et a celluy qui parle par foy.

Chapitre xix. De auricalco. Laiton

Auricalcum. Ysidore. Auricalcum est ainsi dit pour ce qu'il a la resplendeur d'or et la dreté de arain. Et est ung nom composé de langue Latine et Grecque / car es en Grec est appellé calche. Il est fait d'arain et de grant feu et de medicines qui le font venir a la couleur d'or.

Du livre des natures des choses. De arain se fait auricalcum : ainsi dit / car il a la splendeur d'or / ou pour ce que de luy on fait or.

Car le Philisophe dit au livre d'alun. L'union qui est fait de urine d'enfans et de auricalcum se fait bon or / ce qu'on doit entendre quant a la couleur et non pas quant a la substance.

Aristote dit au mesme lieu / que la couleur est variée / mais la substance demoure. Les escriptures le plus souvent appellent cest auricalcul electrum / et ce pour ce qu'il a la couleur semblable a electrum.

De la doctrine de Alkimie. L'arain est transmue en auricalcum moyennant la tutie / car la fumée blanchist et a nature d'esperit / car incontinent que sa pouldre est gectée dessus arain fondu ou quelle est meslée avec lamies d'arain / en icelle fusion d'arain la tuthie s'eschauffe et demande a s'enfuyr comme l'esperit / et ainsi appert que sa fuyte est par l'effusion du corps de l'arain et le seiche / car sa fumée est attrempement blanche / laquelle blancheur meslée avec la rougeur reprime ladicte rougeur et est fait citrin et auricalcum.

Chapitre xx ; De argento Argent.

vue 860

Argentum. Ysidore. Argentum les Grecz l'appellent ardition / car ce vient par meveilleuse maniere / comme il soit luyant et blanc quant on le imprime au corps il fait taches noires.

Du livre des natures des choses. L'argent est ductile et forgeable et traictable sonnanson tres doux / especialement quant il est meslé avec arain ou cuyvre. Par quoy Moysse commanda estre fait trompettes ductiles d'argent pour la terreur des ennemis et pour exhortacion a la bataille / pour le peuple au mangier. Ilz sont trouvées plusieurs voines d'argent en plusieurs parties du monde : mais il n'est point pur comme l'or / mais incorporé et meslé avec terre et ordures : par quoy il y a grant labeur a le purgier par le feu / et la fumée de sa purgation est moult nuisible / lequel n'est pas purgé legierement quant il est beaucoup infect de cette fumée si non par fumée d'encens et d'especes d'armoniac. Et quant cest pur argent il est moult durable / mais quant il est impur il est tost tourné a corruption. Argent consolide les autres metaulx / et quant ilz sont consolidez il les fait comme tout ung.

Les operations de l'argent.

Avicenne au second canon. Argent est insrigidatif et desiccatif / il est utile a scabie et prurie. Sa confrication avec autres mixtions vault contre la puanteur de la bouche. Et aux tremblemens du cueur et humidités visqueuses.

Constantin. Argent est froit et attempé en moisteur / lequel vault contre fleume humide et visqueux. La cathimie d'or est meilleure et plus forte que celle d'argent.

Rasis en Almansor. L'argent est froit lequel prouffite en la tremeut du cueur. La cathimie d'argent est bonne en la scabie qui naist au corps : et aux pustules des yeulx.

Albert. L'argent bien polly entre tous les autres metaulx est le meilleur mirouet : car en couleur il approche plus au dyaphane.

Haly. Le purgement d'argent le meilleur cest le vert et tenne / et le pontique est deseichant moult fort / pour quoy il est meslé es oignemens necessaires a cicatriser.

Chapitre xxi. De argento vino. Argent vif

Argentum vium. Ysidore. Argent vif est ainsi dit pour ce qu'il trenche les matieres esquelles il est mis / aussi il est luyant et qui court tousjours. On le treuve par especial es metaulx ; ou es fournaies d'argent adherant aux parois par petites gouttes. On le treuve aussi bien souvent en fientes bien vieilles des latrines ou en lymon des puy. Il se fait aussi de mine mise est ung vaisseau de fer et couvert dessus d'une tuylle. Et a donc le vaisseau bien lute soient mis tout

entour des charbons ardans et ainsi l'argent vif distille de la mine. Et sans ce ne argent ne cuyvre ne peuvent estre dorez. Il est de tant grant vertus que si dessus ung septier de argent vif tu metz ung / ac de cent septiers incontinant il resiste a la charge et a la pesanteur. Et se il y a seulement ung scrupule d'or il prendra en soy furtivement sa legiereté. Par quoy est entendu n'estre pas de poix a qu'il obeist et consent / mais nature. Il est mieulx gardé en vaisseaulx de voirre / car il tresperce les autres matieres. Et quant il est donné en beuvrage il occist pour cause de sa pesanteur.

Avicenne. Argent vif naist soubz terre pour la grant humidité qui est en celluy lieu. Et ce advient pour le soleil et l'air qui le touchent. Et pour ce il est fait courant pour l'humidité et froideur qui sont en luy : et n'est point fait si non en lieu froit.

Du livre des natures des choses. Argent vif certes est chault et humide au quart degré : combien que en aucuns livres soit trouvé estre froit. Quant il est estaint il se peult mesler avecques les autres choses / mais quant il est vif non. Il peult estre fait blanc et rouge avecques souffres. Et dit on que legierement il prent toutes couleurs.

folio Cxxxv. vue 861

Se il est extaint avecques graisse : il apparoistra quasi comme terre. Et ainsi entre les vaisseaulx artificielement bruslé : est extraict du feu / cler / malliable et tractable en maniere d'argent pour faire fermeaulx / et moult de autres joyaulx. Aussi sans argent vif ne peut estre faicte doreure. Et quant l'argent ne se consolide pas ou jointg avecques l'argent : moyennant l'argent : ceste chose est veue estre bien faicte avecques argent vif.

Les operations de l'argent vif.

Constantin au livre des degretz. Argent vif est chault au iiii. degré et humide. Il tue les poulz de la teste / et toutes les autres reptiles mesle avecques litarge et vin aigre et huile. Il est fait bon pour guerir la roigne. Et aussi est fait oignement tres bon pour les pustules.

Le Plateaire. Argent vif a vertu de dissouldre et de penetrer. La farine de luppins ameres soit cuyte en treffort vin aigre jusques qu'elle soit espesse / et puis la commixtionne faicte de l'argent vif estaint : soit la teste oingte par la verge du chief appellée discrimen le patient pour l'abondance de poulz. Il est estaint ou avecques salive / ou soit froté avecques cendre et salive / ou avecques cheveulx et salive / ou avecques la pouldre de l'os de sesche et salive. Et dit on que meilleur est le estaindre quant on le peut mesler a autre chose. Et se il n'est ainsi estaint : il n'est point faicte de meilleur de luy a autre chose.

Ysidore. L'argent vif donné en beuvrage occist pour cause de sa pesanteur.

Dyascorides dit que l'argent vif donne mort a celluy qui le boyt. Toutefois il pourra evader en beuvant du laict de chievre / ou en se mouvant / ou aussi en beuvant du vin / ou ayent esté cuytz **absinthium / sinapium ou ysope**. A quelconque membre qu'il se pregne et adhere : il le frappe et corrode. Avicenne.

L'argent vif sublime occist pour cause de la vehemente incision. Et la forte cure est de boyre laict et vomir.

Mais Galien dit n'avoir point esté de ce experimenté. Il scay que aucun beut de l'argent vif en esté pour la grant soif qu'il avoit cuidant que ce fust vin / lequel estoit en ung vaisseau estroit. Et apres deux heures passées il remist par embas et par son fondement en ung bassin / et ne luy nuysist point. aucuns dient que quant il estaint il occist. Car quelque chose que il trouve : par sa pesanteur le corrode. Il occist aussi les souris. Et a la fumée s'ensuyent les vers et serpens venimeux. Item sa vapeur fait advenir paralisie et trembloison. Sa fumée destruyt la veue et louye. Et fait puanteur a la bouche quant il passe par dedans icelle par quoy s'en garde qui en use.

Chapitre xxii. De arsenico. Arsenic.

Arsenicum. Ysidore au xix. livre. Arsenic qui en Latin pour cause de sa couleur est dit auripigmentum : est cueilly en ponto de matiere aurarée ou est le sandarac. Celluy est tres bon qui passe en couleur d'or / pur et fusile et gresle par le discours de ses voynes. Et celluy qui est fort pasle ou semblable a sandarac : est juge le pire. Il en est ung autre tiers genre qui est squanieux : auquel est meslée la couleur aurée. La force dicelluy est comme celle du sandarac / mais il est plus aigre.

Plinius au xxxiiii. livre. L'arsenic est de la mesme matiere de laquelle est le sandarac. Et celluy qui est excellent en couleur d'or est le tres bon. Du livre des aluns et selz. Arsenic est chault et humide.

Et est de divers genre : c'est assavoir rouge / citrin et lamineux. Et est l'arsenic semblable a soulfhre en plusieurs oeuvres.

Les operations de l'arsenic

vue 862

Avicenne. Aucun est blanc / l'autre rouge / et l'autre citrin. Tous sont putrefactifz et mordicatifz. Il est chault au tiers de degré et sec au second. Il rase les cheveux et avec gomme de pin convient a alopie. On fait de luy emplastre sur les playes. Avec graisse ou oingt et huille convient a la roigne et a sahapat humide et a pourriture / et si nettoyé et art la peau. Il est prins contre la toux ancienne et le chachement de pourritures de sang / et du sang. Et aucuneffois est mis en pillules pour asma. Il est meslé avecques huille rosat contre bothor et les emorroydes. Et celluy qui est sublime occist. Et de celluy qui est rouge / le meilleur est celluy qu'est pulverizable.

Dyascorides. Arsenic naist es meteaulx ou est sandaraca. Il est rousty et ars en ung pot de terre jusques qu'il mue la couleur / et puis est gardé. Sa vertus est stiptisque. Quant il est meslé avecques chaulx vive et le corps en est oingt il oste les poilz.

Ensuyt de la lettre **B**.

Chapitre xxiii. De balgio et berillo. Ballay et Beril

Balagius et Berillus. Arnoldus. Balagius est une gemme rousse de nature remisante hors du genre de l'escharboucle / et dicelluy en toutes vertus plus de bile et remis. Ysidore. Beril est engendré en Ynde semblable en verdeur a smaragdus / mais il est pasle. Il est poly des Yndoïs en formes ayans six angles affin que lebetude de la couleur soit excitée par la repercution des angles. Et autrement poly n'a point de resplendeur. Ilz sont neuf genres dicelle. Helmandus en ses croniques au x. livres. Beril est de couleur violée ou de eaue marine.

Les operations du Beril

Huba a escript qu'il donne amour en mariage et magnifie celuy qui le porte / et brusle la dextre de celluy qui l'estraint. L'eaue ou il aura este mis beue vault aux yeulx malades. Il oste les sanglotz et sospirs. Et dit on qu'il cure toutes les douleurs du foye.

Arnoldus. Le beril est une pierre de laquelle la couleur est pasle ainsi que eaue / et a formr de six angles. Ilz sont neuf genres dicelle / et celluy qui est le plus pasle est le meilleur. Sa vertus est contre les perilz des ennemys / et contre paresce. Elle guerist les yeulx humides / et brusle celluy qui la porte. Et si elle est mise contre les rays du soleil : elle fait et enflambe feu.

Dyascorides. La pierre beril est luyante et clere semblable a l'huile. On grave la locuste marine et est faicte cornue dessoubz les deux piedz / et la est mise la gemme / et dessoubz icelle est mise l'erbe appelée sevina enclose en ung petit de or. Et quant elle est portée elle fait et donne amour en mariage. L'eaue en laquelle elle est mise beue vault contre les vices et maladies des yeulx / et contre toute debilité.

Chapitre xxiiii. De bezaar. Pierre delivrant du venin.

folio Cxxxvi vue 863

Bezaar ou pierre delivrant des venins est appelée ainsi en Arabie hager bezaar. Serapion au livre aggregatoire au chapitre hager bezaar. Hager bezaar est nom Persique / et est a dire / ostant et expellant empeschement. Et chet cestuy nom sur deux choses. L'une est que il chet sur toute medicine convenable a aucun venin / pour ce que elle resiste a la vertus et expelle son empeschement pour la propriété qui est en elle.

Rasis. Bezaar est une pierre citrine et molle qui n'a point de saveur. Et est ceste pierre tendant a citrinite et blancheur ayant couleur de vin / et est legiere resplendissant comme lumiere.

Les operations de bezaar.

Serapion. La pierre bezaar est convenable aux venins et quant dicelle est beu le poix de douze grains d'orge / ou dicelle est faicte oingture dessus le lieu de sa morsure elle delivre nature de la mort et expelle le venin par sueur et pour ce est bonne au venin pestilencial. Et quant la pierre est mise en ung anneau / et est mise en la bouche de celluy qui a prins venin / et il la succe aucun pou / il luy subvient et prouffite. Et quant dicelle pierre est touche l'aguillon de l'escorpion / elle luy empesche et oste la puissance de povoir puis apres picquer et poindre. Et se de icelle pierre est broye le poix de deux grains d'orge et puis est dissoulte en eaue et icelle eaue mise en la bouche d'une serpent / incontinent elle la suffoque et occist.

Luy mesmes de l'auctorité de Rasis. J'ay veu en icelle pierre suffisance pour oster l'empeschement et estoit celle pierre que j'ay veue declinant a citrinite et blancheur ayant couleur de vin / et avecques ce estoit legiere et resplendissant comme lumiere. Et ay veu en icelle la suffisance qui je n'ay point veue en autre medicine simple / et qui plus est / que je n'ay point veu en tiriacles composés. Item Rasis. J'ay veu la pierre bezaar au filz Amamari gardeur de la loy de Dieu. Et est vray que il achapta ceste pierre et en donna pour pris le palais de Cordube qui estoit le principal et commencement de sa lignée.

Chapitre xxv. De belliculis

Belliculi marini. Ainsi appelez en Latin / et en Arabic astor. La Pandecte au chapitre xciii. Bellicuri marini sont presque semblables au nombril de l'homme quant a la figure. Et sont petites pierres blanches trouvées au rivage de la mer adherentes comme Dentales. Elles sont froides et seiches / mais leur exces n'est point determiné des docteurs. Elles sont mises es oignemens pour clarifier la face.

Les operations des bellicules.

La pouldre dicelles pierres tres subtile soit resolvée avecques axonge de geline avant resolvée et fondue et en soit fait oignement pour nettoier la face. Elles sont mises en l'antidotaire de Galien en l'oignement citrin qui est interpreté oignement de citron.

Chapitre xxvi. De bolo armeno

Bolus armenus. Avicenne au ii. livre au chapitre de luto armeno. Lutum armenum ou bolus armenus est rouge declinant et tendant a citrinite / et est a chacun congneu. Il est froit au premier degré et sec au second. Et est une voyne de terre qui a principalement trouvée en Armenie. Et a vertu de retraindre. Celluy est a eslire qui est tirant

vue 854

sur le rouge selon toutes les parties non yant couleurs distinctes et qui est un pou frangible.

Serapion. Carnamenum / c'est a dire bolus armenus / et est ingimbar. Sa couleur est oultre croceite et rousseur tendant a rougeur. Et est tost broyé ainsi que on broye la chaulx et est doulx sans pierre. Sa vertu est que il deseiche de forte desiccation.

Les operations de bolo armeno.

Avicenne. Lutum armenum retient le sang / car son exication est au derrenier. Et prouffite aux apostumes pestilenciales beu et oingt / et empeische l'ambulation de la pourriture des membres / et est merueilleux en la chose des playes. Et vault contre catterre / et prouffite aux coleriques. Et est bon a la cracheure de sang du ptisique / pour ce que il deseische l'apostume du poulmon et est la cure de l'escroississure de la lainer ou anhelit procedant du catharre. Et est bon aux ulceres des intestins et au flux et solution du sang de la marris. Et aussi il prouffite aux fievres ethiques et proprement aux pestilenciales. Et plusieurs en ont esté gueris en grant pestilence pour la coustume de la boire avecques vin subtil et legier. Et se il est beu en fievre pestilencieuse le vin y est necessaire : car il le maine et conduit au cueur / et soit celluy vin meslé avecques eaue de roses.

Chapitre xxvii. De borax

La vipere borax selon Albert est ainsi nommée de aucun genre de crapault et est ainsi dicte et appellée pour ce qu'il la porte en sa teste / et en est deux genres. L'une blanche aucun pou noire. Et l'autre si elle est extraicte du crapault estant encores en vie et palpant elle a au milieu un oeil de couleur bleue. Et en noz temps en fut extraicte d'un crapault une petite verte / et aussi avons veu aucuns crapaulx qui avoient en eulx les pierres depaintes / qui estoient dictes de ce genre. Et vulgairement sont dites crapauldines.

Les operations de la pierre borax

Albert. Que la pierre borax purge les ordures et superfluites des entrailles et intestins.

Arnault. La pierre nose : c'est a dire borax est de laquelle sont deux genres. L'une est tirant sur le blanc / et l'autre variée. Elles sont extraictes du crapault avant qu'il boyve ou qu'il touche l'eau. Et par adventure aucuneffois appert en icelles la forme du crapault avecques les piedz espars. Ceste pierre vault contre les morsures des bestes reptiles et contre venin.

Ensuit de la lettre C.

Chapitre xxviii. De callaica

Callaica. Carcedominus et calcophauns. Ysidore. Callaica est une gemme de couleur verte et paslissant et trop grasse et n'est riens plus joyeux ne plus conenable.

folio Cxxxvii vue 865

a l'or. Dont elle est ainsi appelée. Elle naist en Ynde ou en Germanie es montaignes et rochiers gelides extuberant et enflant en la maniere d'ung oeil. Du livres des natures des choses. Carcedone naist en Ethiopie / et reluyt ainsi que feu / mais elle retient l'espece de paslissant / et est tousjours detenue de paleur. Elle a la couleur moyenne entre la jacincte et le beril. Laquelle si elle est pertuisée / et est portée au col ou au doy / elle garde celluy qui la porte de estre vaincu en ses causes. On dit estre de ceste pierre troys especes.

Les operations de calcophano.

Arnault. Calcophanus est une gemme noire / mais elle rend le son de arain si elle est hurtée ou frappée d'une pierre.

Luymesme. Calcophanos pierre de couleur noire clarifie la voix et empeschement l'enroueuse.

Du livre des natures des choses. La pierre calcophanos est sonante et de doux son ainsi que l'arain. Se elle est frappée de fer ou d'arain elle rend voix sonnante et douce si elle est portée de homme chaste.

Chapitre xxix. De carbunculo Escharboucle.

Carbunculus / escharboucle. Du livre des natures des choses. Escharboucle est une pierre la plus precieuse et la plus chiere de toutes les autres / et anoblie de vertus. La couleur dicelle est ignée et luyt plus de nuyt que de jour : car de jour elle est obscure / mais de nuyt elle est si resplandissant qu'il semble la nuyt estre tournée en jour.

Du lapidaire. Escharboucle surmonte toutes les pierres ardantes / car elle fait et gette comme rays ardans par tout comme charbon. Les tenebres ne pevent estaindre la lumiere dicelle / qu'elle ne envoie flamme aux yeulx de ceulx qui la regardent.

Les operacions de l'escharboucle.

Arnault. L'escharboucle est une pierre tres rouge en obscur et en tenebres luytant comme charbon. En couleur et en vertus elle surmonte toutes les vertus qui sont en elles. Et sans icelle sont douze especes moins utiles qu'elle.

Ysidore. Ilz sont douze genres ou manieres d'escharboucles / mais les meilleures sont celles qu'on voit resplendir comme feu.

Et dit Alucredus que cest le sceau des pierres. Les autres dient que l'escharboucle peut imprimer sa figue en toute autre pierree / mais non pas le contraire.

Chapitre xxx. De calce viva chaux vive.

Calx. Ysidore. Calx est chaux vive / car combien qu'elle soit froide au toucher si a elle feu occulte par dedans : car quant on l'arrouse d'eaue / tantost le feu occulte sault. Sa nature fait

vue 866

merveilles / car elle est alumée d'eaue / par laquelle le feu a acoustumé estre estaint. Son usage est necessaire aux edifices de pierre / car une pierre ne se pourroit joindre a l'autre fort / si non par chaux / mais chaux de pierre blanche et dure est meilleure aux edifices / et de la molle elle est utile es taintures.

Les operacions de la chaux.

Avicenne au ii. canon. Chaux est cendres de corps pierreux. Celle que l'eaue n'a point touché / et celle que eaue touche quant elle demeure extainte par deux jours ou troys / lors elle ne brusle point / mais eschauffe seulement. Et celle qui est lavée est dicte expliccative sans mordicacion. Chaux beue avecques huylles est faite maturative. Chaux restrainct le flux de sang / elle corrode la chair superflue / et quant elle est lavée consolide / elle vault a l'adustion du feu.

Constantin. Chaux est chaulde et seiche au iii. degré / laquelle meslée avec laict cler et huylle aide es pustulles et apostumes pourries / et consolide les plaies et incisions.

Rasis en almansor. Chaux est chaulde / elle brusle et corrode la chair superflue / elle restrainct le flux du sang / et quant elle est lavée elle vault a l'adustion du feu.

Chapitre xxxi. De caristeo et numidico.

Caristeum et numidicus. Ysidore. Caristeum vert est tres bon et a le nom a son regard / pour ce que il est agreable a ceulx qui gravent et sculptent les gemmes et pierres precieuses : car sa verdeur recrée les yeulx.

Luy mesme. Le marbre appellé numidique est porté de Numidie / lequel quant sa peau est incisée laisse ung jus semblable a saffren. Et dont il a prins le nom. Il n'est pas en pieces et croustes / mais en masse / et est convenable et ydoine a faire sailleures et yssues de edifices .Teffrain est appellé a la chaleur de la cendre / lequel est moult loue et est fort prouffitabile contre les serpens quant il est porté sur sa personne.

Chapitre xxxii. De calefarios.

folio Cxxxviii. vue 867

Calefarios / et coranticas ou corauium. Albert. La pierre calefarios ou colcofanos est noire.

Les operations de la pierre calefarios.

Sa vertu est de esclarcir la voix et oster l'enroueuse.

Luy mesme Albert. La pierre coranticas est une pierre semblable a cristal infecte et souillée de couleur cerule et bleue. Laquelle est dicte cheoit aucuneffois de la nuée avec le tonnoire et est trouvée en Graye et Espagne. Mais celle d'Espagne est resplandissant comme feu. Elle provoque et donne voix et sons doux. Et est dicte oeuvrer et prouffiter en batailles / et a vaincre proces et causes / et contre le peril du tonnoirre. Et aussi semblablement dit ceste chose Evax.

Chapitre xxxiii. De celidonio. Celidone

Celidonius. Dyascorides. La pierre celidone est trouvée es ventres des arondelles. De laquelle sont deux genres. C'est assavoir noire et rousse lesquelles sont prises et concueillies les petis arondeaulx prins / et leurs vendres detranches sont trouvées dedans.

Les operati(o)ns de la pierre Celidone.

Albert. La pierre celidoine rousse enveloppée en ung drap de lin ou cuir de veau et portée soubz l'esselle senestre est dicte valoir contre infanie et forcenerie / et aussi contre les langueurs anciennes / et la passion lunatique. Et pareillement le hault mal appellé epilencie / ainsi comme dit est portée.

Evax dit que elle rend celluy qui la porte faconde / bien parlant / agreable et plaisant. Et la noire ainsi que dit Joseph oeuvre contre les humeurs nuysables et fievres et ires et courroux. et lavée en eaue guerist les yeulx. Ces pierres sont moult petites et en avons veu de telles extraites de l'estomach des arondeaulx du moys d'aoust par noz compaignons. Car elles sont ainsi qu'on dit meilleurs quant elles sont adonc extraites / et souvent sont trouvées deux ensemble en une arondelle.

Dyascorides. La rousse guerist les lunatiques et les languissans et les forcenez quant elle esr lyée en ung drap linge net / et lice au bras senestre du malade / et aussi elle fait ceulx qui la portent tres agreables / bien parlans facondes / amyable et ydoines. et semblablement la noire portée donne tres bonne fin a celluy qui la porte. Et est ydoine et prouffitable contre toutes ires et courroux des roys et princes et pour les appaiser. Car celluy qui l'aura sera plaisant a tous et si parfera toutes choses a son arbitre et volonté. Mais celluy a qui les yeulx deullent est broyée avec eaue / et en sont oings / et ilz guerissent. Mais quant on oste les pierres diceulx petis arondeaulx / il fault eschever et garder que le pere ou la mere ne soient pres. Car elles auront meilleur effect.

Chapitre xxxiiii. De colonites et cymedia

vue 868

Colonites / et cymedia. Ysidore. Colonite est une pierre de purpurée et diverse couleur. La testude envoie cette pierre / elle fait divinateur celui qui la portera sous sa langue / mais cette vertu elle a tant seulement quand la lune premier enflammée est croissant. Menoytes de derrenier descendant. Ainsi le veult Aaron des vertus des pierres. Ceste pierre n'est point destruite du feu.

Les operations des colonites.

Colonites / cest l'oeil de la testude de ynde purpureux et divers lequel le magiciens dient quant il est mis sous la langue qu'ilz predient les choses futures. Du lapidaire. La testude de Ynde envoie ceste pierre. Laquelle tenue sous la langue selon les magiciens fait dire les choses advenit / mais que le jour soit leue a la vi. heure au temps que la lune croist etc.

Luy mesme Ysidore. Cymedia est une pierre precieuse qui est rouverte au cerveau d'ung poisson de ce nom / resplendent et est longue. On dit que par elle le magiciens predient les signes de tranquillité et de tempeste.

Chapitre xxxv. De cerusa.

Cerusa. Le Plaetaire. Ceruse est fleur de plomb froide et seiche au iii. degré. Ceulx qui la font viennent souvent en apoplexie / epilencie paralisie et artetique / pour la froideur du vin aigre dissoluant et mortifiant.

Les operations de ceruse.

Ceruse a puissance de modifier et asterger les superfluites. Et pour ce aucunes femmes leur face lavez adjoustent dessus pouldre tres subtile de ceruse. Les autres pour ce que ceruse est ung petit seiche la confisent avec eaue rose et la mettent au soleil par especial en esté / laquelle consummée elles y en mettent de l'autre / en ce faisant jusques a ce qu'elle soit tres blanche / et ung petit aromatique / apres forment pillules et les aplicquent a la face. Note que ceulx qui usent souvent de ceruse encourent la douleur des dens et pourriture et puanteur de la bouche.

Avicenne au ii. canon. Ceruse est cendre de plomb / elle rst mise es emplastres / elle remplit les ulceres et engendre la chair en elles et corrodes la mauvaie chair Elle vault au bothor de l'oeil. Elle adoucist les apostumes dures. Ceruse est aucuneffois faicte de vin aigre / aucuneffois avec selz laquelle est froide et seiche au ii. degré / mais ceste qui est faicte de vin aigre est de plus vehemente subtiliation. Elle est aussi des medicines qui appartiennent es cissures du cul. Derechef elle est des venins.

Chapitre xxxvi. De crisolecro Crisolecro :

folio Cxxxix. vue 869

Crisolecro et crisocolla. Ysidore. Crisolecro est une pierre semblable a or / mais elle decline en couleur de laton. Elle est tant seulement joyeuse a regarder au matin / et est tres ravissable et couvoiteuse du feu / et se elle en est pres elle art diligemment.

Aristote. Crisolecro tire le feu / et de sa nature est que bien tost elle est bruslée.

Arnoldus. La gemme crisolecro est de couleur d'or / et est bien tost enflambée du feu. Elle est tres belle quant on la regarde au matin. Et es autres heures elle est partout dissemblable.

Les operations de crisolecro.

Plinius. La crisolecro lyée au col guerist les fievres. Et aussi fait les vices et maladies des aureilles quant elle est broyée avecques miel et huile rosat . Et si elle est broyée avec miel attique : elle guerist aussi les obscuretez des yeulx. Et medicine de vices de l'estomach. Du tout par elle sa farine / ou pouldre prinse / ou avecques mastic beue avecques eaue.

Du lapidaire. Il est escript la pierre crisolecro estre semblable a or / de laquelle la couleur est veue decliner a laton. Elle est plus joyeuse a la vue au matin qu'en autres heures. Et de laquelle la matiere est tres ravissable et avide (ainsi que on dit) du feu / car mise pres du feu elle est bien tost enflambée.

Ysidore. Crisocolla est une gemme qui est engendrée en Ynde au lieu ou les formis fouyssent l'or. Elle est semblable a l'or / et a la nature de la pierre magnes si non que on dit que elle augmente l'or / dont elle est ainsi nommée.

Chapitre xxxvii. De crisoprasso Crisoprasso

Crisoprassus et crisopassios. Albert . Crisoprasso est une pierre qui vient de Ynde et est pou trouvée : par quoy elle est plus chiere extimée. Elle est aussi en couleur quasi comme du jus de porreau ou de prassii coagulé ayent aussi gouttes d'or. Pour laquelle chose elle a prins ce nom. Car en Grec crisso est a dire or et prassium verdeur de porreau. Dont il est dit en ung metre. Barubii folia sunt prassia prassaqz porri. C'est a dire . Les fueilles de l'herbe marubium sont vertes de la verduer de porreau. Luy mesme. Crisopassios est une gemme qui est apportée de Ethiope.

Les operations de crisoprasso et crisopassios.

Albert. Crisoprasso a les vertus de la pierre prassii. Et est aussi trouvée puissante contre toutes passions et maladies du cueur.

Luy mesme. On dit que cette pierre crisoprassos reluist en tenebres / et quant la lumiere et clarté vient elle se esvanouyst : si que elle ne retient pas la couleur qu'elle a quant il fait noir et obscur. Et en icelle pierre est faicte selon la diversité de la lumiere et des tenebres reciprocacion de couleurs ainsi comme

ung chesne pourry qui luyt de nuyt. Et de toutes ces choses nous avons donné parfaite raison au livre des bestes/ et y regarde.

Chapitre xxxviii. De crisolito Crisolite

Crisolitus ou crisolansis. Dyascorides. crisolite est une pierre treslucide et semblable a or.

Albert. La pierre crisolite est en couleur ayant une tenue verdeur lucide : en laquelle l'oeil

vue 870

du soleil resplendist comme une estoille d'or / et n'est point rare.

Ysidore. Crisolite est une pierre precieuse d'or et de feu / car de jour elle est dorée / et de nuyt elle est ignée. Elle est engendrée en Ethiopie.

Les operations de chrisolite.

Albert. On dit que la crisolite conforte les membres : pourquoy on la donne broyée aux asmatiques. On dit aussi quant elle est percée / et que le pertuys est rempli de soyes d'asne et lyée au bras senestre qu'elle chasse les tumeurs melancoliques tres mauvaises. Et ce est dit en phisiques ligatures. Mais aussi en or et portée chasse les fantasies. Et aucuns dient qu'elle deboute folie et amaine sagesse.

Dyascorides dit que la crisolite est applicquée a l'arsure d'or. elle est filatere et deffense a l'encontre des paours noctutnes. Quant elle est pertuisée et emplie de soye de asne et lyée au bras senestre elle vainct les dyables.

Chapitre xx(x)ix De cristalo Cristal

Cristallius. Albert. La pierre de cristal laquelle est faicte aucuneffois de froidure / aucuneffois de neige comme nous avons souvent experimenté / et en Germanie on en treve plusieurs. L'une et l'autre maniere de generacion facile est mainfeste par les choses dictes dessus.

Les operations de cristal.

Ceste pierre opposée a l'oeil du soleil fait feu / mais si elle est chaulde elle ne peut parfaire ce. La raison de ce est mise au livre des proprietiez des elemens et des planettes. on dit aussi qu'elle reprime la soif mise soubz la langue / et est experimenté que broyée avec miel et meslé remplit mes mammelles de laict.

Du livre des natures des choses. Cristal est une pierre enduree de glace.

Touteffois Solin dit que cette pierre est trouvée en aucunes parties du monde ou jamais gellée ne glace fut.

Dyascorides. Le cristal a vertus stiptique / lequel on donne pour engendrer laict.

Chapitre xl. De cinnabar

folio Cxl vue 871

Cynabar / cinabre. La Pandecte au chapitre xciii. Cinabar en Latin est ainsi nommé / en Grec sergog. En Arabit asreg ou zenizisao. Et en Francois vermillon. Il est fait de souffres et d'argent vif : et est de rouge couleur. Sera au livre aggre. au chapitre asreg. Asreg sive arengi / c'est a dire cinabre est fait de plomb quant il est mis au feu et enflambé est fait rouge. Semblablement il est fait de ceruse bruslée en ceste maniere. Elle est prinse et mise en ung vaissel concave net : et la met on sur le feu en la remuant jusques a ce qu'il soit rouge. Et est fait comme orpiment rouge. Et aucuns le nomment sandix.

Les operations di cinabre.

Galien. Quant le plomb est bruslé ou la ceruse il est mué et est fait astengi / c'est a dire cinabre : et est chose plus subtile que le plomb ou ceruse / mais non pas si sedative. Luy mesmes par l'auctorité de l'achindi. Et adujent a celluy qui boit asreg / c'est a dire cinabre ; comme a celluy qui boit litarde. Toutes ces choses sont especes de cinabre.

Dyascorides. Sa vertu est semblable a la vertu de la pierre de emathite / pour ce elle restraint vehementement : et pour ce elle retient le flux de sang. Elle donne aide aux combustides et pustules : et met on en cerotz / utilement aussi on les met es confections des colires.

Chapitre xli De Cinere Cendre

Cynis / cendre. L'acteur. Cendre est delaissée des corps dessus ditz bruslez / et est une substance terrestre seiche et compacte / en laquelle le corps solide par le feu resolu l'humeur consommée est reduit. Par quoy de grant corps pour la cons..ption de la matiere est fait petit de cendre et est de laide couleur.

Les operations de la cendre.

Et pour ce qu'elle a les parties tres menues elle est agittée a legier soufflement / touteffois elle est moult utile a plusieurs choses. Car par cendre premier le feu est gouverné afin qu'il soit preservé. Par cendre les peaulx sont depillées et aucunement renouvelées. Cendre aussi est mise pour alun es taintures des draps. En dediant une eglise l'alphabet est fait de cendre. Au commencement de la jeusne de karesme en memoire de nostre mortalité la cendre est mise sur noz testes. De l'eaue de cendre se fait lexive de laquelle les testes sont lavées. Cendre gectée sur la sangsue luy fait vomir le sang qu'elle avoit succé. En medicine aussi la cendre que la lexive prouffite.

Avicenne au second canon. Cendre a nature abstersive et explicative / mais elle est diversifiée et l'ablucion diminue l'abstertion dicelle et luy acquiert glutination et exsiccation sans morgication. Eaue de cendre entre en medicines pourrissans / mais eaue de cendre de figuier et de boys ayans laict netoye plus et

seiche que les autres. Cendre de bois stiptiques comme de chesne et d'autres retient le sang.

Dyascorides. Lexive de cendre de chesne en medicine est tres efficace et a hommes et a bestes que sont travaillez de la dampscion du poulmon / et ausquelz aucune chose venimeuse nuyst et contrarie / car elle beue incontinent donne santé. Elle est aussi utile en playes humides et aux fistules / et aux playes difficiles a guerir. Et a celles qui sont calloreuses / c'est a dire charnues et grasses qui sont de long temps ordes. Et ainsi donc il fault les tous les jours laver / et la medecine convenable baillée guerissent. Car la vertu de la lexive ne guerist pas mais elle dispose les playe a santé.

Chapitre xlii. De corallo Corail

vue 872

Corallus. Du livre des natures des choses. Corail est une pierre moult rouge ayant figure semblable a une corne de cerf / ou comme la racine d'une herbe ayant plusieurs racines. Et n'est pas merveilles / car premier ce fut herbe en la mer. Cestuy courail resiste aux fouldres et tempestes. Et pour ce les anciens gestoient ceste pierre concassée et rompue avec les semences en leurs terres ou la pendoient es arbres / affin qu'ilz ne sentissent point le perilz des gresles. Aussi elles est terrible aux dyables et ce par sort / car ses rainceaulx souvent sont a maniere d'une croix.

Les operations du corail.

Avicenne au premier canon. Corail est froit au premier degré et sec au second. Il est stiptique et empesche vehementement le flux de sang. Il oste la chair adjoutée / il conforte l'oeil en attrayant et deseischant les humides fixées en luy. Et par especial celluy qu'est bruslé et lavé est convenable es larmes des yeulx. Il absterge vestigies des ulceres. Il aide aux apostumes des intestins et de la rate. Il retient le crachat de sang. Il vient es mers qui sont en Africque et l'ung et rouge / l'autre noir et l'autre blanc. Il oste la douleur de l'estomach et l'empesche quant il est pendu directement sur la bouche dicelluy. Et pour ce on le pend au col des enfans. On dit que s'il est broyé et qu'on en emplisse les concavités des dens malades il les desracine : et est souverain en la confortation des gencives. Il ayde aussi au crachat de sang et a son flux. Et aussi a toutes maladies de l'estomach. Arnoldus. Le corail est tyré de la mer comme rainceaulx et vault contre tout flux de sang / et aussi contre epilencie. Et contre menstrues vaines et debilitacions quant il est pendu au col de la personne. Et vault aussi contre tempeste et gresles. Et quant il est gecté et mis aux champs avecques les semences le fruit s'en multiplie plus.

Chapitre xliii. De corneolo Cornaline

Corneolus / cornaline. Du livre des natures des choses. Corneoline ou selon aucuns cornelus est une pierre moult luisant mais elle est d'obscure couleur : semblable a chair trenchée. L'on dit que les enfans d'Israel au desert taillerent ou graverent grant multitude de ces pierres / laquelle taileure a esté prouvée de si grande subtilité que nulz de ceulx qui ont esté apres n'ont osé essayer a ensuivi cestuy ouvrage. Et n'est point de doubte que selon les efficaces et vertus des pierres precieuses on y gravoit les images des figures.

Albert en son lapidaire. Cornaline ainsi appellée d'aucune est une pierre de couleur de chair / c'est a dire de rouge obscur comme laveure de chair. Ceste pierre est trouvée souvent environ le fleuve du Rin et est moult rouge ayant la folio Cxli vue 873

couleur comme mine ; et quant elle est pollie elle resplendist fort.

Les operations de la cornaline.

Il est esprouvé qu'elle restraint le sang ; et principalement des menstrues et emoiroydes / on dit aussi qu'elle appaise les yres.

Serapion. La vertu de ceste pierre est / car quant elle est portée en ung anneau elle appaise l'yre et la cause de debat devant le juge. Et reprime et restraint le flux de sang de quelques lieu qu'il soit et par especial des menstrues. Et aucuneffois on en fait ung dentifrice.

Chapitre xliiii. D e conchilio

Conchilium. La Pandecte au chapitre cccc.xxxi . Le nom icy de la pierre conchile est mis en ung electuaire de Avicenne qui est contre le vice de la pierre. Et dient aucuns que cest la coclée marine qu'est dicte conchile. Et les aucuns autres dient que c'est la coquille de limacons. Mais selon la verité ceste pierre est la coquille du prophire marin / et est conchile marin qui a couleur de pourpre pour nectoier les ordures des dens / car elle les blanchist et les fait belles.

Chapitre xlv. De cos. Queux.

Cos cest queux / et est une pierre / de laquelle on aguise le fer et les couteaux. Serapion au livre aggre. au chapitre hager. Almaseni est une pierre de laquelle on aguise le fer.

Les operations de la queux.

Frication de la pierre almaseni qui est queux empesche les mamelles des filles de croistre et augmenter devant le temps : et aussi les couillons des filz / et est pource que sa vertu refroidie.

Luy mesmes de l'auctorité Dioscorides. Quant on aguise du fer sur la queux et qu'on lave de ce qu'on assemble la alopicie elle fait naistre les cheveux. Et de

ce sont oingtes les mammelles des filles et les testicules des enfans masles et ce les empesche de croistre. Et si vault contre l'apostume diceulx / c'est assavoir mammelles et testicules ; et quant on la prent en beuvrage avec vin aigre elle vault a la douleur de la rate et a epilencie / et la fricacion dicelle vault a apolicie. Il est assavoir que ceste pierre queux est semblablement appellée oculaire : car dicelle sont frotez les surcilz des yeulx. Du cos olaire / pour ce que quant on en aguise les instrumens on gecte dessus huylle.

Chapitre xlvi. De cupro Cuyvre.

Cuprum. Du livre des natures des choses. Cuyvre ou arain est de mesme dreté avec l'argent et de mesme fonte ce excepté qu'il est rouge. Arain n'est point corrompu par aucune enrouille-
vue 874

re. Il a puanteur / mais il sonne doux.

Le Philosophe. Arain ou cuyvre est sonnante et ayant voix. Il est chault de nature. Son son par soy est rude / mais meslé avec estaing / argent ou or il est moult bon et a doux son. Il sonne mieulx que tous les autres metaulx / mais il travaille l'ouye s'il n'est convenablement attempé d'estaing. Il est fusible et convertible en toute maniere de artifice / mais avec labeur et moderation de celluy qui le bat. Et ne se peult jamais tant purger qu'il ne tienne aucune corruption / mais il dure par plusieurs ans.

Les operations du cuyvre.

Ysidore. Arain est dit de la splendeur de l'air comme l'or et l'argent. Quant aux anciens l'usage d'arain fut devant celluy de fer et congneu. Car les premieres trenchoient la terre d'arain et en usoient en bataille et estoit l'arain en plus grant pris. L'or et l'arge(nt) pour leur inutilité estoient delaisés / mais maintenant cest le contraire / car le cuyvre est delaisé et l'or est en grant honneur. Mais entre tous les metaulx l'arain est le plus sonnante et ayant voix et de plus grande puissance. De luy se font laminés d'arain.

Ensuit de la lettre **D**.

Chapitre xlviii. De draconite.

Draconites. Albert. Draconite est une pierre extraicte de la teste du dragon / laquelle est apportée d'Orient ou il y a grans dragons. Elle a vertu efficace comme la pierre de borax quant elle est extraicte du dragon vif encores palpitant. Ilz espient les dragons dormans : et soubdainement la teste du dragon couppée luy estant encores vif ostent la pierre.

Les operations de la draconite.

Albert es merveilles dit que par draconite les ennemis sont vaincus. Elle vault contre venin quant on l'extrait du dragon vif / et doit estre portée au bras dextre /

car en plusieurs actions de perte elle aide. et aussi fait et aide en ces superfluytes qui sont engendrées es bestes et de corruption de mort. Elle les altere quant elles meurent de naturelle mort les humeurs corrompues / et quant elles sont mortes ou corrompues et occises elles sont mussées et mises en sauveté. Et je es partie d'Alemaigne estoient convenues plus de ix. serpens entre les montaignes en ung pré / et ainsi comme le seigneur de la terre passoit par la ses chevaliers avec leurs especes tirées trancherent les serpens en plusieurs pieces et au fons gisoit ung serpent coupé en plusieurs pieces / et soubz la teste dicelle serpent fut trouvée une pierre noire formée comme une piramide coupée : non pas lucide / mais a l'environ de couleur palle ou estoit ung serpent tres beau figure / laquelle pierre me fut

folio Cxlii vue 875

présentée par la femme dudit seigneur avecques la teste dudit serpent. Item on dit qu'elle chasse le venin qui est faict par la morsure de une beste venimeuse. On dit aussi qu'elle fait les hommes victorieux.

Chapitre xlviij.(bis) Dedeimonis / dyadachos et droselitos.

Deimonis / dyadachos et deoselite. Albert. Deimonis est une pierre de deux couleurs / comme l'arc de Deimonis qui est yrie appelé. Et est dit deimon en Grec qui vault autant a dire comme entendement ou estoille clere stilant. Luy mesmes. Dyadachos est une pierre pasle aucunement semblable a beril.

Les operacions de deimonis.

Albert. La pierre de deimonis ayde aux febricitans / et dit on qu'elle expelle le venin / et rend l'homme seur et victorieux. On dit que la pierre dyadachos excite les fantaisies / tellement que les magiciens en usent d'elle : mais quant elle est appliquée a ung mort elle pert ses vertus : car on dit qu'elle hait la mort. Et la raison de ces choses est eue es livres des magiciens : c'est assavoir des hermes thebit beucozath et Ptholomé / desquelles choses nostre intencion n'est pas pour le present.

Arnault. Drosollite est une pierre diverse. Et la cause de son nom fut : car si elle est appliquée au feu elle rend sueur.

Chapitre xlix. de dyacodos.

Dyacodos / dyamantique et dionisie. Arnoldus. Dyacodos est une pierre pasle semblable au beril.

Les operacions de dyacodos.

Du livre des natures des choses. Dyacodos est une pierre laquell gectée en l'eau fait diverses figures de diables / tellement qu'elle donne response aux demandans. En ce mesmes livre. Dyamétique est une pierre laquelle en quelque metal qu'elle soit portée / neantmoins elle a esleu son siege le plus prouchain en fer.

Ysidore. Dyonisie est une pierre noire meslée de taches rouges / laquelle broyée avecques eaue fait odoré et sentir bon le vin. et dit on que par son odeur elle resiste a yvresse.

Le Philosophe. Dyonisie est une pierre d'Orient de fusques couleurs semée de gouttes de neiges laquelle broyée en eaue fait sentir et odoré le vin / et neantmoins contre nature par son odeur on dit que yvresse est chassée.

Ensuit de la lettre E.

Chapitre I. De exacontalito.

Exacontalitus / Ermistion et Ethites. Ysidore. Exacontalitus est une pierre petite en grandeur et est de plusieurs couleurs / pour quoy
vue 876

il (est) ainsi nommé. Il est semé de tant diverses gouttes que on peult congnoistre en son petit cercle soixante couleurs de pierres precieuses.

Les operacions de exacontalitus.

Arnauldus. Exacontalitus est une pierre moult distinguée de soixante couleurs : cette pierre fait les yeulx des hommes tres blans. Du lapidaire.

Exacontalitus est une pierre qui de la chose a prins le nom. Elle supplye par merveilleuse nature porte la beaulté de tant de pierres.

Ysidore. La gemme ermistion entre les pierres est regardée tres volentiers / et est resplandissant de couleur de or. Du livres des natures des choses. Ethistes est une pierre de rouge couleur qui a une pierre par dedans / par quoy elle est sonnante / laquelle est apportée de l'aigle des derrenieres parties du monde en son nid. Et dit on qu'elle est cause pour quoy les oeufz de l'aigle sont chaulx de immoderée chaleur / et s'il n'y a une pierre froide naturellement presente. Elle ne garderoit point ses poussins sains. Elle ayde tres efficacemement femmes grosses / affin qu'elles ne advortent / ou qu'elles n'aient grant douleur a leur enfantement. Elle veult estre portée au senestre costé / elle donne sobrieté et grace / et fait l'homme victorieux de laquelle pierre aussi est dit dessus.

Chapitre li. De emathites.

Emathites. Ysidore. Emathites est une pierre rouge ainsi ditte : car elle est sanguine de couleur. Emach. C'est a dire sanguine. Elle croist et naist en Ethiopie / mais la principale est trouvée en Arabie et en Affricque.

Les operacions de emathites.

Emathites est ditte de emath qui est a dire sang car elle a vertu de restraindre le sang.

Du livres des natures des choses. Emathites est une pierre de couleur de rooil de fer meslée de gouttes de sang / laquelle mise en eaue boullant la rend tiede. si aucun la porte il ne craint point l'ardeur du soleil. Item quant on la met au soleil

elle envoye de soy scintilles ou flammèches elle garde les fruictz des locustes et de la gresle.

Celluy mesmes. Si elle est froisée et resolue en eaue elle guerist ceulx qui ont salive de sang. Elle guerist aussi le flux de ventre. Sa pouldre aussi corrode et oste les chairs mortes qui viennent en la playe / et quant elle est meslée avecques vin elle guerist les ulceres et quant elle est beue elle rompt **la pierre en la vecie**. Du lapidaire. Emathites a prins son nom de sang / crée pour servir a nature humaine qui a vertu stiptique.

Chapitre lii. De exacolito

folio Cxliii vue 877

Exacolitus et exebenos. Albert. Exacolitus est une pierre diverse dissolutive conne dient les mededins.

Dyascorides. Exebenos est une pierre blanche et belle / de laquelle les orphevres ont acoustumé de embellir leur or.

Les operacions des exacolite.

Albert. Exacolitus meslé en vin et beu vault contre la colique et la pliaque passion.

Dyascorides. exebenos guerist ceulx qui ont mal en l'estomach quant il est beu avecques passes et eaus. Semblablement il guerist ceulx qui sont hors de leurs sens. Il est merueilleusement bon quant il est prins en beuvarge pour emouvoir a luxure : car il ne seuffre point qu'ilz soient longuement empeschez ou travaillez en ce. Il lasche aussi et dissout la **douleur de la vessie** / et quant on la porte elle garde l'enfantement estre sans maladie. Et quant elle est lyée a la cuisse elle fait l'enfantement facile et legier.

Chapitre liii. De enidros

Enidros / efestie et egipsilla. Ysidore. Enidros est une pierre ainsi appellée de l'eaue / car elle rend l'eaue en tant qu'il sembleroit qu'elle eust en soy une fontaine enclose.

Arnoldus. Enidros est une pierre qui rend tousjours gouttes d'eaue sans soy liqueffier du tout ne en estre moindre.

Du livre des natures des choses. Enidros est une pierre semblable a cristal qui envoye et distile par une merueilleuse maniere et perpetuellement larmes / et neantmoins elle est tousjours dure et entiere par tout.

Les operacions de Enidros.

Du lapidaire. Il est chose bien difficile de congnoistre la cause de ceste pierre : car si la substance dicelle court tousjours / neantmoins elle n'est point moindre / et si ne se liqueffie point du tout. Et si la chose exteriore ou de dehors descend en bas / comme tousjours courant et rendant eaue / pour quoy ne se donne elle

point de empeschement / c'est assavoir quant ung contraire rencontre son contraire.

Ysidore. La pierre d'eciestie a la nature du mirouer / en reverberant et rendant les ymages / combien qu'il resplendisse fort. L'experience de ce est / car si elle est mise en eaue chaulde / elle la reffroide incontinent / ou si elle est mise au soleil / elle alume la matiere seiche / elle naist en Corinthe.

Luy mesmes. Egypsilla est une pierre en sa racine noire / mais en la couleur est blanche / ainsi appellée d'Egypte ou elle est trouvée.

Chapitre liiii. De Elitropia.

vue 878

Elitropia est une pierre de couleur verte entremeslée de petites estoilles muées puniques avecques vaines sanguines. La cause de son nom vient de l'effect dicelle pierre : car les rays du soleil en vaissel d'arain elle mue les rays du soleil / le sanguin repercute. Et lors l'eaue recoit le soleil a maniere d'ung mirouer et deprehende les deffaults dicelluy en demonstrant la lune entrant. Elle est trouvée en Egypte et Affrique mais la meilleure est en Ethiopie. Les magiciens dient que quant elle est meslée avecques l'herbe de ce nom que en secretes deprecations on ne voit point celluy qui la porte.

Les operacions ~~de emathites~~. (de elitropia)

Aristote. Se la pierre elitropia est mise sur l'eaue elle se evaporera. Du livre des natures des choses. La pierre elitropia mise en un vaissel plain d'eaue aux rays du soleil fait le soleil sanguin comme s'il souffroit esclipse / ne le vaissel auquel el(le) est mise ne boullira point / et sera esperger l'eaue comme pluye. Ce voyant les magiciens s'ilz sont deprians / sont ravis en eulx et predient les choses advenir. Ceste pierre fait prolonger la vie a celluy qui la porte plus long temps. Elle retrainit le sang chasse le venin / et fait l'homme seur contre le dol. Du lapidaire. Ceste pierre prent son nom de la chose. elle mue la couleur du soleil quant elle est mise en l'eaue aux rays du soleil / et semble qu'il soit esclipse / et ung pou de temps apres tu verras le vaissel boullir et saillir comme se cestoit pluye.

Chapitre lv. De epistites

Epistites. Aristote. Epistites est une pierre qui donne seureté des bestes / et si on la met en eaue boullante en ung vessel les ebulicions cesseront.

Les operacions des epistites.

Arnoldus. Epistite est une pierre resplantissant et rouge / laquelle portée de la partie cueur. Elle garde l'homme seur / elle empesche les locustes et les oyseaulx / les nebulas steriles les gresles y tourbillons des fruictz de terre / et quant elle est mise a l'opposité su soleil elle envoye feu et rays.

Ysidore. Epistites est une pierre luisant et rouge et croist en Corinthe. Laquelle mise en eaue boullant la rend tiede. Et si elle y demeure ung pou elle la fait estre froide et oste toute l'ardeur. Se aucun la tient en sa main dextre contre le soleil / elle fait rays et rend feu / en tant que ceulx qui la voyent s'emerueillent. Et qui la portera environ le bras senestre il contemne toute tourbes.

Chapitre lvi. de Falcanos.

folio Cxliiii vue 879

Falcanos / filatetus flongites et floginus. Arnoldus. Falcanos est dit arsenic ou orpiment/ et est pierre rouge ou citrine.

Les operations de Falcanos.

Du livre des natures des choses. Il a nature de souffre / de eschauffer et de seicher. Se on le met avec arain. Il le trabsmue en blanc. Il brusle tous corps metalins excepté or. Item filaterus est une mesmes pierre et de mesmes vertu que crisolitus de laquelle est dit dessus.

Ysidore. Flongites est une pierre de Perse / et est une des pierres ardantes ou cristalines demonstant en soy comme flammes estuvantes / lesquelles ne yssent point dehorst.

Plinius. Floginus est trouvée en Egipte qui a couleur dorée et flammeuse. Item quant elle est oingte au front elle fait dormir.

Chapitre lvii. De ferro Fer

Ferrum. Ysidore au ii. livre. Fer est ainsi dit et nommé pour ce que il condit et absconse les farres : c'est a dire les semences des bledz. L'usage de fer a esté trouvé apres les autres metaulx / duquel l'espece est apres venue en abprobre. Aristote. eu iii livre des Methiores. Des vapeurs humides en terre nulle espece n'est dilatée en percussion comme fer. Et leur estre est que quant la igneite et lapideité est coartée ilz sont deseichés. Item au iiii. livre. Les aucuns sont amolisiacbles au feu comme fer et la corne et vient le fer ainsi mol et scissible mais le fer fondu par le chault se coagule au froit / et quant il est oeuvré / il se liquifie afin qu'il soit fait humide / et tandis il se coagule / et l'escorce du fer demeure bas. Et quant il est ainsi plusieurs fois purgé et qu'il est net / cest acier. Et celluy qui est nettoié a la moindre poix. Et le meilleur fer est celluy qui a moindre purgation.

Les operations du fer.

Du livre des natures des choses. Le fer est de froide nature ferme et solide / dur et trenchant. Lequel surmonte toutes choses par sa force et de luy seulement sont consommées. Sur tous les metaulx il est le plus tost corrompu. Et aussi quant il est corrompu il infecte il sonne cas. Il est fait ductile et malleable au feu. De luy sont faictes armeures et divers instrumens convenables aux incisions.

Ensuit de la lettre G.

Chapitre lviii. De gagates. Agate

vue 880

Agate. Ysidore. Gagate fut premierement trouvée en Cicile / degettée par le cours du fleuve de Gagates / pour quoy elle a este ainsi nommée et en y a beaucoup en Bretagne. Elle est noire plaine / legiere / et ardante quant elle est mise au feu. Les ouvrages fais en elle ne se gastent point. Une chose merveilleuse est qu'elle se escauffe ou allume a l'eau : et a l'huile elle se estaint.

Les operations de gagates.

Du livre des natures des choses. Gagate est une pierre noire luisante / allumée elle prouffite aux caducques. Elle enchasse les deables / ou s'ilz parlent par la bouche de l'homme qui traveille / la fumée les contraint a taire. Elle aide a l'estomach et l'eau en laquelle elle aura esté par trois jours fait tost enfanter. Laquelle eau si elle est beue d'une fille on congnoistra tantost si elle est vierge / car si elle est vierge elle demoure sans soy mouvoir / mais si elle est corrompue elle pissera incontinent. Item cette pierre vault aux dyables et aux enchantemens. Elle enchasse les serpens / et pour ce l'aigle la met en son nid contre les serpens. Toutefois Sergius dit qu'elle fait ce affin qu'elle attrempé sa chaleur environ les oeufz. Ceste pierre chauffée vault a la confrication de la marris quant elle est suffumigée. Elle aide aussi aux epilepticques / sa fumée enchasse les vers venimeux.

Dyascorides. La meilleur agate est celle qui legierement se brusle au feu / et a l'odeur de asphaltum. Cette pierre solue en eau conserme les dens muables / elle est bonne aux douleurs des entrailles et a leurs eversions. Elle chasse les serpens quant elle est allumée. Elle est aussi rongie au feu et mise en eau / de laquelle on donne a boire a la femme qui travaille d'enfant. Elle resiste aux deables et a tous malefices et fait congnoistre virginité.

Chapitre lix De Galachite.

Galachites / et garamantites. Ysidore. Galachites est une couleur laiteuse / laquelle quant elle est broyée rend ung jus blanc de saveur de laict.

Les operations de galachites.

Quant les femmes nourrissent la portent pendue elle leur fait bonne mammaelle / et quant elle est pendue au col des enfans elle leur fait avoir salive. On dit quant elle est mise en la bouche se rend en eau et fait perdre la memoire. Galachites est une pierre semblable a laict / laquelle est trouvée au Nil de Atheolus / elle donne jus de laict et sa faveur / et quant on la tient en bouche elle trouble l'entendement.

folio C. xlv et non C. xlvi vue 881

Quant on la pend au col elle fait avoir laict es mammelles : et quant elle est pendue en la cuisse elle fait enfanter legierement. Item si elle est meslée avec sel et eaue et qu'on en asperge le lieu ou les brebis se tiennent elle les rend plaines de laict et dechasse la scabie et rongne dicelles.

Aristote. La pierre galatides quant elle mise en ung feu elle l'estaint / et si on la met sur une femme son enfans sortira hors.

Diascorides. La pierre galatides est de couleur de cendre : douce au goul et est ainsi dicte / car quant elle est broyée elle a couleur de laict. Ceste donnée a jeun apres le baing fait avoir habondance de laict.

L'acteur. Elle est dicte lacteuse pour ce que si elle est pendue avecques ung fil de layne de brebis environ la cuisse dextre a une femme qui est de difficile enfantement elle la fera tantost enfanter et sans douleur. Luy mesmes. Ceste pierre liée en bende de toille et portée oste la douleur des dens / et qui la portera avec soy et vienne devant ung prince ou autre qui soit courroucé contre luy elle fait oublier le courrouce contre luy et le rend gracieux.

Plinius. Garamantitem est une pierre ainsi appelée que aucuns appellent sandaresius / de laquelle le sera dit cy apres.

Chapitre lx De granato. Granat

Granatus et garatidem. Contantin. Granat est du genre des escharboucles. Et est une pierre rouge et luisant semblable en couleur a balausties. Il est rouge ung petit plus obscur que l'escharboucle. Et quant on met dessoubz luy couleur noire en ung anneau il en est plus luisant. Et en ce genre en est trouvée une autre maniere / car en la rouge a esparsé la couleur de violete. Et pour ce ceste espece est plus precieuse de tous les autres grenatz.

Albert. Garatidem est une pierre qu'on dit estre de noire couleur. Et est ainsi esprouvée / car se celluy qui la porte oingt tout son corps : et est expose aux mousches et aux vespes et qu'il demoure ainsi sans ce qu'elles luy touchent la pierre est vraye / et s'il oste la pierre les mousches et les guespes cheent sur la pierre et la succent.

Les operations de garatidem.

Constantin et Albert dient le grenant resjouys le cueur de l'homme et oster tristesse. elle est chaulde et seiche / et aucuns dient qu'elle est du genre des jacintes / mais ce est faulx. Cest pierre selon plusieurs est trouvée en Ethiope entre le Tigre sur les arenes de la mer.

Albert. Ilz dient que la pierre garatidem portée en la bouche fait bien juger les oppinions et cogitacions. On dit aussi qu'elle rend celluy qui la porte agreable aux hommes.

Et semblablement Evax l'affirme.

Chapitre lxi. De Agacromeon / grisolite et galatides.

vue 882

Agacromeon / grisolite et galatides. Albert. Gagacromeon est une pierre de diverses couleurs comme la peau de chevreau. Luy mesmes. Grisolite est une pierre de couleur d'or aux heures du matin tes belle a regarder / mais es autres heures dissemblable. Elle est corrompue du feu et chassée / et comme aucuns dient elle se enflambe / et pour ce elle craont le feu. Les autres dient qu'il y a une autre maniere de ces îerres qui est la marcasite d'or qui est ung moyen entre les metaulx et les pierres. on dit qu'il y a une autre espece de ceste pierre qui est de la couleur moyenne entre la noire et la rouge. Plinius. Gagatides est de couleur cendre et douce au goust.

Les operations de gagacreon etc.

Albert dit que gagacromeon fait ceulx qui le portent estre victorieux. on dit qu'il a esté experimenté de Alchide prince / que quant il portoit ceste pierre avec luy il vainquoit tousjours et quant il ne l'avoit point il estoit vaincu.

Albert. Grisolitus. La vertu de ceste pierre est de guerir les scqbies et les ulceres / et quant on la porte en la main on dit qu'elle appaise la chaleur de la fievre.

Plinius. Galatides amoistist mussement et restraint doucement / et pour ce est bonne aux marmes des yeulx.

Chapitre lxii. De gelacies

Gelacies et glosopetra. Ysidore. Gelacies ou galacie est une pierre qui a la resplendeur et figure a maniere de gresle. Quant a dureté on ne peult vaincre : comme le dyamant / et dit on qu'au feu elle retient sa froideur.

Les operations de gelacies.

Arnoldus. Galachia est une pierre qui et tout temps froide et ne eschauffe point. Du lapidaire. Elle a la resplendeur et figure de gresle / et par quelzconques coups elle demeure invincible / en tout temps froide et ne se eschauffe point par feu.

Solin. Glosopedra est une pierre qui au decours de la lune chiet du ciel semblable a la langue humaine ayant puissance selon les magiciens de exciter les mouvemens de la lune.

Chapitre lxiii. De gipso.

Gypsum / gipt. Dyascorides au chapitre de gipso. Gipt est une maniere de pierre semblable a nitre / desquelz le meilleur est qui avoines larges. Le gipt : quant il n'est pas cuit est desiccatif et stiptique et ung pou plautique et collectif.

Les operations du gipt.

folio C xlvi. vue 883

Dyascorides. Elle retient le flux de sang et la sueur. Et quant on la boyt elle suffoque ou effoque l'homme. Bruslée : elle est bonne aux leptomeres / deseiche

et reprime quant elle est broyée avec pusca en jus ou brouetz est comme gessamia / mais plus stiptique et refrigerant plus fort pourquoy quant on en oingt le front elle arreste le flux de sang. Et quant on la boit elle vault aux dissinteriques / pliaques / et a tout flux.

Serapion au livre aggregatoire au chapitre gipsen. Sa vertus est desiccative. Et ce mesmes dit Galien. Elle n'est point administrée que au dehors. Et sa vertu est desiccative / conglutinative et opilative. Et ce est : car il fait l'agregacion ou assemblément des parties tost. Il es convenable a flux de sang quant il est meslé avec medicines seiches / car gipt est dur comme aulbin de oeuf / et est fait moult stiptique quant on le mesle avec pouldre de moulin qui est assemblée quant il volle hault de la farine de froment sur la muraille du moulin : avecques poilz de lyevre. Et quant on le brusle il diminue de sa vifcosité et est augmentée sa subtilité et sa dempsacion / et est fait stiptique souverainement quant on le confit avecques eaue et vin rouge.

Ensuyt de la lettre **H**.

Chapitre lxiiii. De hyena et heratide.

Hyena et heratides. Ysidore. Heyna est une pierre qui est trouvée es yeulx de hyena beste / laquelle on dit que si ung homme la tient soubz sa langue il dit les choses advenir. Aristote dit au livre des bestes. Hyena porte une pierre aux yeulx / et comme aucuns dient au front.

Les operations de hyena.

Varieté grande de couleurs et immutacion est es yeulx de la beste hyena : en la paupiere desquelz est trouvée une pierre / par laquelle on dit scavoit a dire des choses advenir.

Du lapidaire. On prent des yeulx de hyena une pierre qui est moult a honorer / de laquelle on dit que quant on la tient soubz la langue la bouche lavée elle fait predire les choses advenir.

Ysidore dit que hyeratides est une pierre semblable en couleur a ung oyseau de proye.

Aristote au livre des bestes. Hyeratides est une pierre laquelle si elle est portée d'ung homme il ne sera point mors des moulches ne des **moulches a miel**.

Arnoldus. Hyeratides est une pierre noire : laquelle quant elle est portée en la bouche on juge de ses pensées et cogitacions. Et est l'homme repute amyable a tous. Sa vertus est ainsi prouvée. Se celluy qui laporte est nud / et qu'il soit oingt de miel : puis habandonner aux moulches si elle le laissent sans luy toucher la pierre est bonne. Mais su la pierre en est ostée le succeront et corromperont son corps.

Ensuyt de la lettre I. (et J)

Chapitre lxxv.
De jasincto Jacinte.

vue 884

Jasinctus. Du livre des natures des choses. Jacinte est une pierre rouge / obscur / nubileuse au serain clere : en tant que on dit qu'elle sent lait. et les tres bonne qui n'est ni trop clere ni trop obscure. Elle est treffroide : especialement quant on la met en la bouche. Elle est de tres grant dureté : tellement que a grant paine la peut on tailler.

Dyascorides. Il y a trois especes de jacinte : entre lesquelles les semblables a grenatz sont les meilleures / lesquelles mises environ le feu sont plus rouges / et s'il y avoit aucune noirceur elle s'en yroit / mais a Venise elles ne seuffrent point le feu. L'une est de couleur rouge / l'autre de couleur citrine / et la tierce est de couleur de antimon. La rouge est la meilleur des autres. Et quant elle est rougie au feu elle vient moult rouge.

Albert en son lapidaire. Il est deux matieres de jacintes : c'est assavoir aquatiques et saphirin. L'aquatique est blond et blanchissant / mais le saphirin est moul flaeue et reluisant sans avoir aucune chose de aqueité.

Les operations de jacintes.

Albert dit quil est froit et conforte les corps ainsi comme toute chose froide qui restraingt la vertu du corps au dedans.

Au livre des ligatures phisiques est dit que quant il est pendu au col ou porté au doyb qu'il rend le pelerin agreable a son hoste. Il est bon contre les regions pestiferes. Il est esprouvé qu'il provoque le dormir pour sa froide complexion. On dit du saphirin qu'il a ceste vertu qu'il vault contre empoisonnement. On dit aussi qu'il ayde a avoir richesse / et fait avoir bon entendement naturel / et donne lyesse de cueur.

Serapion dit que la vertu de la jacinte est que qui la portera avant qu'il soit gravé ou que on ait fait impression en luy il est seur de fouldre tellement que elle ne cherra point sur luy. Sa vertu est moult divulguée entre les hommes.

Avicenne au livre des forces du cueur dit qu'il conforte le cueur.

Chapitre lxxvi De jaspide.

Jaspis ou jaspé. Albert. Jaspé est une pierre de diverses couleurs. Et a dix especes / mais la meilleur est la verte transparente ayant en soy voynes rouges. Elle se doit proprement mettre en argent. Cette pierre est trouvée en plusieurs lieux.

Les operation de jaspé.

Helinandus au x. livre. Jaspé le tres bon est verd transluisant en couleur. Quant on le porte chastement elle chasse les fievres et ydropisie. Elle aide la femme a enfanter / et sa vertu est plus grant en argent. Aristote. Jaspé clarifie la vue de

l'homme / restraingt le sang. Et quant on la met sur la femme elle la fait legierement enfanter.

Arnoldus. Jaspe est une pierre de diverses couleurs / mais la meilleur est sa verde luisante. Elle est aportée de diverses parties. Elle rend l'homme seur / et oste les fantasies / et empesche luxure. Et la vertu est contre flux de sang et des menstrues.

Le philosophe. Si aucun treuve le jaspe verd et en luy une croix : il a vertu que celluy qui le portera ne se noyera point.

Et dit on que Galien portoit cette pierre en son doy. Item jaspe a vertus contre tous ennemys : elle dechasse les fantasies.

Chapitre lxvii. De lapide Iris.

folio C.xlvii vue 885

Iris. Albert. Iris est semblable a cristal. Et est ceste pierre pour le plus souvent exagone.

Et dit Evax qu'elle vient d'Arabie et naist en la mer Rouge. Et nous trouvons une tres grant quantité de ces pierres es montaignes de Germanie qui sont entre le fleuve du Rin et la cité de Treverense / et de diverse quantité / et toutes exagones. Et avecques les autres pierres qui naturellement sont rondes elles se font exagones ainsi comme partuys de moulches a miel mis au milieu. Elles se font exagones : comme il soit ainsi que celles qui sont es extremitez soient rondes.

Les operations de Iris.

Elle est pierre tres seiche : laquelle chose demonstre sa tres geande subtilité. Elle est faicte de jus eaueux qui evade et yst de la matiere de la pierre qui est engendrée en lymon ou boe rouge. Et pour ce que ceste chose eaueuse est apprehendée de seicheresse : la pierre est moult seiche et dure. Et quant une partie dicelle est mise au soleil luisant / et l'autre partie est en l'ombre tenue : elle gette en reflexissant de tres belles couleurs de yris : c'est a dire de l'arc en ciel dessus la paroy opposite / ou dessus aucun corps : pour laquelle chose elle est appellée Yris. Il naist aucune chose semblable a ceste au gipt : qui est es extremitez clere et moult scissible. Et en usent aucuns en voirres pour voirre.

Chapitre lxviii De iscultos et iena.

Iscultos et iena. Albert et Ysidore. Iscultos est une pierre semblable a saffren. Et est ceste pierre trouvée le plus souvent pres les Coulonnes de Hercules appellées gades au deuxiesme et troiesme climat pres Espagne : celle que maintenant nous appellons Espagne.

Les operations de Isculos.

Isculos est une pierre filable pour cause de la viscosité qui est en celle deseichée. Et se de icelle on fait robes et vesttemens ilz ne bruslent point / mais se purgent

et nettoiynt au feu. Et est par advanture ce que les Germaniens appellent salamandre / car ceste lanuge qui est dillec concueillie est ainsi comme la lanuge de la pierre humide. Et pourquoy cest qu'elle ne brusle point il est dit au livre de Metheore. Aucuns dient l'espece de ceste pierre estre celle que aucuns appellent escharboucle blanc. Elle ensuyt et imite l'escharboucle en ce qu'elle resiste aux fantasies et aux divinemens. Elle vault contre la douleur des yeulx prededant de cause humide / et quant elle est mise en pouldre : elle guerist la rogne. Aussi Ysidore dit de ceste pierre que elle est blanche et en maniere d'ung glan en quantité.

Albert. Iena est une pierre ainsi nommée pour cause d'une beste appelée iena : pour ce que ses yeulx se tournent totalement en pierre. Et dient Evax et Aayen que quant elle est mise dessoubz la langue elle convient a dire en devinant les choses advenir.

vue 886

Ensuyt de la lettre **K**.

Chapitre lxi De kakabrates.

Lakabrates / kaman et kenne. Albert Kakabrates est une pierre moult semblable a cristal.

Les operations de kalarbrates camahieu.

On dit de luy qu'il donne eloquence / honneur et grace / et vault conte ydropisie. Albert. kaman est une pierre le plus souvent blanche en tout ou en partie diverse en couleur / et tres souvent est trouvée meslée avec omximius. Sa vertu est en ymages et escriptures et seaulx qui sont trouvés en lieu.

Evax en son lapidaire. Kenne est une pierre moult chiere aux roys / laquelle est engendrée es yeulx des cerfz en Orien : que les serpens mangent pour oster vieilliss affin qu'ilz soient plus fors / et entrent en ung fleuve ou ilz demeurent noyez jusques au chief : jusques a ce qu'ilz sentent la vertu du venin separée. Ilz envoient une larme en terre / laquelle coagulée es yeulx jusques a la granduer de une noix est deseichée : jusques a ce qu'elle chee quant ilz yssent du fleuve / et est ainsi trouvée : laquelle est dicte tiriacle des venins.

Chapitre lxx. de karabo

Larabum. La Pandecte au chapitre cc xxx viii . Karabe est une gomme d'arbre comme une pierre precieuse : de laquelle se font les anneaulx de quoy electrum succinti et karabe sont mis sur ung mesmes nom / car electrus : cest karabe / et succintuis cest karabe.

Les operations de karabe.

Nous avons de Alixandre au chapitre de dissinteria les troscis dyalectrum. Item Servius sur buccolique dit que electrum cest post succinum.

Et Cassius Felix dit des troscis. Troiscis de succintum / et succintum cest electrolum / et descript les troscis de karabe.

Avicenne au livre des forces du cueur. Karabe est chault au premier degré / et sec au second. Aucuns dient qu'il est froit.

L'acteur. De karabe tu trouveras dessus au traicté des herbes au chapitre cc xxx vii. en la lettre de Lz. et la on trouvera sa vertu et operation.

Ensuyt de la lettre L ;

Chapitre lxxi. De lazulo. Azur

Lazuli en Latin / en Arabic hager alzenard ou alzenard.

Serapion au livre aggregatoire au chapitre hager alzenard. Il fault que luy soit esleu celluy qui

folio C xlviiii. vue 887

est de couleur celeste / ayant petites gouttes d'or legier sans asperité / et sans admixtion d'autre pierre et qui ne se rompt point facilement / et duquel les pieces sont grandes.

Jehan Mesue au chapitre de la pierre lazuli ou d'azur. La pierre lactulus ou estoille ou lazuli est du genre des marbres / ayant taches d'or / et en est une autre blanche qui est appellée marcasite et une autre inde clere celeste et est dit lazuli ou azur et le meilleur est duquel la couleur est plus verte en couleur d'azur qui a gouttes d'or / meslé acecquiss marcasite n'est pas bon ni celluy qui n'a nulles gouttes / et semblablement le legiet. Il est chault au ii degré et sec au tiers.

Les operations de lazuli.

Sa vertu est semblable a litarde d'or si non sa vertu est plus debile / elle fait naistre les poilz es paupieres.

Item Galien / elle a en soy stipticité avecques ung petit d'acuité. Et sa vertu est de deseicher et refroidir / elle est bonne aux paupieres qui sont depilées pour aucunes humeurs agues et demourent que les poilz ne y viennent point / et si ne y sont point multipliés / mais demourent subtilz et foibles. Et ce est / car la pierre d'azur destruit l'humidité des humeurs et mue leur superfluite a sa complexion radicale avec laquelle est faicte la geneneration des poilz des paupieres / et pour ce faire fault qu'il soit fort broié et adminstré en pouldre. Et quant on la pend au col d'ung enfant elle oste la paour / et fait avoir les cheveulx crespés. Item elle a vertu adustive et putrefactive. Et pour ce elle oste les verrues. Et quant on la prent par dedans elle lasche les humeurs melancolique et mundifie le sang des grosses humeurs. Et la dose est de iiii. kirat jusques a une dragme quant elle est meslée avecques les autres medicines laxatives / et appartient plus en douleur des rains et des asma quant on la prent en beuvrage / et que on en fait ung vassal / elle provoque les menstruees. Et le boire d'elle provoque le vomissement et nauseam / mais son ablution luy oste ce.

Avicenne au livre des forces du cueur dit qu'elle conforte le cueur.

Chapitre lxxii. De laicteus.

Laicteus / et lincis. Avicenne dit au ii livre au chapitre propre la pierre laicteus est une pierre laquelle frotée d'eau sault d'elle une liqueur comme lait / ceste pierre est de couleur cendreuse et de douce saveur.

Les operations de laicteus.

Avicenne. Elle est broyée avec eau / et garde on ce qu'il se resolve ne une boiste de plomb et est ce bon es aposthumes au commence-

vue 888

ment. Et fait on de sa sriration alcohol : qui empesche le cours des superfluites a l'oeil et es ulceres qui viennent en l'oeil.

Evax en son lapidaire. Lincis est une pierre qui est faite de l'urine du loup servin es montaignes : coagulée :laquelle gardée en une maison engendre sur soy tres bons champignons toutes les années. On dit aussi qu'elle vault contre la douleur de l'estomach / contre ictericie et contre le flux de ventre.

Chapitre lxxiii. De litargiro Litarge.

Litargirum en latin est ainsi appellée. En francois litarge / en Arabic et en Grec marechet. Serapion / de l'auctorité de Dyascorides. Il y a une maniere de litarge qui se fait de une voine de plomb quant on la cuit tant qu'elle soit faite comme feu et dissolue et toute bruslée / puis apres est coagulée. Il en y a une autre qui est faite d'argent. Il en y a une autre qui se fait de plomb quant on brusle les lamines. Il en y a une autre qui est rouge et resplendissant et est d'or meilleure de toutes les autres. Il en y a une de couleur de pourpre et est celle d'argent. il en y a une autre maniere de faire litarge que j'ai veu en ma jeunesse en Sardine ou argent et plomb estoient fondus ensemble et ceste cy est la meilleur maniere.

Les operations de la litarge.

Serapion de l'auctorité de Alkansi. Litarge dealbée est meilleur pour oster les vestiges des verolles que quant elle n'est point dealbée. Elle oste la puanteur de dessoubz les aisselles et empeche la sueur. Et quant on en boit elle restraint le ventre et l'urine elle preffoque et tue.

Paulus. Elle vault contre scabie de fleugme salle ou de colere. Contre dissinterie froide par le vice des intestins soit faite d'elle pouldre qui soit mise par le clistere avec huile rosat et eau d'orge. Contre blceration de la verge soit destrempée avec huile rosat et en oingte : car elle consolide la blceration. Contre l'ardeur de herisipile soit confite pouldre de litarge et de ceruse avec eau rose jusques a ce que l'eau ne soit point infecté de la pouldre. Ceste pouldre a maniere de collire faite vault a nettoier la face et les choses superflues que les femmes ont apres leur enfantement / mais que axunge de gelline ou d'oie soit fondue et qu'on y adjouste pouldre de litarge et huile rosat duquel soit fait oignement et en soit usé.

Bulcasin au livre qui est appellé le serviteur. Litarge est ainsi dealbée prends une partie de litarge d'or en la broyant tres bien et metz dessus sel commun deux parties puis metz dessus quantité d'eaue qu'elle surmonte environ quatre doys en la laissant au vaisseau sept jours et le remuant tous les jours deux fois Puis apres sept jours gette l'eaue et metz oultre d'eaue / et la mue tous les jours jusques en la fin de dix jours / car l'eaue se dulcifiera / et la litarge se blanchira comme ceruse que tu garderas pour user.

Chapitre lxxiii. De lichinis.

folio C xlix. vue 889

Lichinis. Usidore. Lichinis est du genre des pierres ardantes ainsi appellée pour la fragrance des lanternes. Elle est engendrée en plusieurs lieux / mais la tres approuvée vien de Inde.

Les operations de lichinis.

Cette pierre a double face. L'une qui luist comme pourpre. L'autre qui est rouge a maniere de cocci / laquelle eschauffée du soleil tire les pailles ou quant on la frote entre ses doys. Elle resiste a graveure / mais si elle gravée quant de elle on imprime le seing elle tranche la cire comme mors d'aucune beste / ilz en sont quatre especes.

Solin. Lichinis est ainsi dicte pour ce qu'elle excite la vigueur de la lumiere par la fragrance des lanternes.

Helimandus au livre xii. Lichinis est une pierre pourpreuse resplendissant comme une lanterne laquelle quant elle estouchée au soleil attrait les pailles.

Plinius. Lichinis est du genre des pierres ardans / ainsi appellée a cause des lanternes. Elle naist environ Ortosie / et Carmenie et es lieux voisins / mais la tres bonne vient de Inde. Aucuns ont dit que cestoit une escharboucle remise en seconde bonte : elle est semblable de jovis ainsi appellée pour les fleurs produictes.

lxxv. De ligurio.

Ligurius / et liparia. Ysidore. La gemme ligure est ainsi appellée pour ce qu'elle est faicte de l'urine de la beste appellé linx par espace de temps endurcie. Elle est rouge ainsi que est succinus attirant par son esperit les pailles et festus a elle approuchées.

Helmandus au x. livre. Theofratus dit la pierre nommée ligure avoir la couleur d'arain / et qu'elle attrait a soy les pailles et festus et ayder contre la douleur de l'estomach / et aussi reparer la couleur a ceulx qui ont jaunisse et estraindre le flux du ventre.

Les operation du ligurio.

Dyascorides. L'urine de la beste nommée linx que plusieurs appellent ligure par succession de temps au lieu ou elle est pissée se fait pierre. Elle oste les douleurs de l'estomach et estrait le flux et reumatisme du ventre.

Rabane. La pierre nommée ligurus a la couleur presque comme l'arain / et se elle est frotée / elle attire a soy les festus et pailles.

Le philosophe. Ceste pierre est de froide et seiche complexion et est ronde. Elle vault principalement a ceulx qui sont navrés et extract le fer de la playe.

Du livre des natures des choses. Ligurius est une pierre laquelle ilz dient distiller de laygne de la beste nommée linx / c'est assavoir d'Orien.

Car selon Plinius / l'urine dicelle beste se endurcist et solide en pierre / laquelle chose le beste le sachant naturellement a envie de nostre bien / de getter cette precieuse liqueur de urine la quevure de sablon et arene / et illec se endurcist tant plus tost en pierre. Elle est le plus souvent jaune tendant ung pou a noirceur. Et est sa couleur selon Plinius ignée et rubicunde / et semblable a l'escharboucle sinon qu'elle luist point de nyut.

Et selon le lapidaire elle est verte. Et est sa vertus propre a plusieurs remedes. Et par especial lavée en eaue elle aide a ceulx qui sont constipés et si dissout le ventre et recouvre la couleur de la face quant elle est perdue.

L'acteur. De cette chose est parlé cy dessus au second traicté la ou il est traictie des natures des bestes au chapitre vi en lettre L. .

Arnoldus. Liparea est une pierre stiptique : et est sa propriété qu'elle contraint et haste tost de venir tout genre de beste en sa presence et la regardent .

Ysidore. La pierre liparea ainsi que dient les gentilz quant elle est suffimiguée evocquée toutes bestes et les fait venir en sa presence.

Du livre des nature des choses. La pierre liparea est en Libie moult merveilleuse a laquelle tout genre de bestes (nature les enseignant) de leur bon gré ainsi comme a leur patron acourent

vue 890

quant ores les chiens et les veneurs les poursuivent. Mais aucun leur adversaire alors ne leur peult nuire.

lxx vi. De luna

Lune est ainsi dicte en Latin / en Grec affrosolino.

Dyascorides au chapitre de affrosolino. Affrosolinum est cette pierre / laquelle de Avicenne au ii canon est appelée la pierre de la lune : comme il appert par la concorde des deux / et pour ce il dit que affrosolinum est trouvée seule en Egipte / laquelle est ainsi crée / la rousée du ciel a la clarté de la lune se met en espece de pierre que nous appellons speculaire quant elle est coagutée et contrainte / la tres bonne est qui est de couleur cerulée resplendant / et est semblable a gipt luisant / et est appelée pierre speculaire.

Plinius au chapitre de affrosolinor. Affrosolinum est ainsi crée / la rousée du ciel est congelée a la clarté de la lune a maniere de une pierre speculaire de quoy elle a pris son nom.

Les operations de la lune.

Diascorides. Affrosolinum pris en beuvrage peult amender tous vices du chef lequel est prouffitable aux epilentiques.

Ensuyt de la lettre M.

Chapitre lxxvii. De magnes

Magnes. Serapion. La miniere de ceste pierre est trouvée es parties de la mer au pres des Indes / et quant les navires approuchent la montaigne de cette miniere / il ne demeure riens de fer qui ne s'aïlle hors le navire / et qu'il ne vole comme ung oiseau jusques a la montaigne. Et n'y a clou tenant soit bien fiché qui ne soit araché en s'aïlle a la dicte montaigne / et pour ce les navires dicelles parties ne sont point cloéez de cloux de fer / mais de cloux en bois / car si elles estoient clouées de cloux de fer quant elles approucheroient de la dicte montaignes / elles seroient toutes despeciées / la meilleure de ces pierres est celle qui attire le fer fort / et sa couleur tourne a couleur celeste non pas moult griefve en poix.

Dyascorides. La pierre d'aymant est engendrée et trouvée environ le rivage Occeane empres les Trogotides et en Inde ainsi appellée de celluy qui la trouva elle a la couleur de fer.

Albert en son lapidaire. Aymant est une pierre de couleur de fer laquelle selon Pline est trouvée en la mer de Ynde en laquelle elle haborde tant qu'il y a grant peril de y aller en navires ayans cloux de fer. Elle est aussi trouvée en Traconides regions et j'en au veu et trouvé es partie de Thestonie en la province appellée France Orientale une grande quantité et de grand efficace qui estoit moult noire / comme se cestoit fer enrouille et bruslé avec poix..

Les operations de magnes.

Serapion la vertu de cette pierre est que quant on donne de icelle en breuvage elle lesche le ventre avecques melicratum especialement les humeurs grosses.

Aucuns sont qui bruslent ceste pierre et en usent comme adamas.

Et luy mesmes de l'auctorité de Galien

folio cl. vue 891

Sa vertu et comme la vertu de adamas / et est bonne a ceulx qui ont transglouti une aiguille ou autre fer. Et celluy qui a le flux du ventre / pour qu'il a pris l'escorce de fer. Et dit on que si on prend dicelle pierre et qu'on la mette en ung vaisseau de terre / et que le chief du vaissel soit oingt de croye apres que tu auras mis sur la pierre chaulx vive que eaue n'aura point touché jusques a ce que le vaissel soit remply de chaulx / et que tu alumes grant feu soubz le vaissel jusques a ce qu'il entre par l'orifice du vaissel / puis apres soit mis le vaissel en la fornase d'ung potier / et luy laisser jusques a ce que la luttacion soit cuite et

soit fait potz. Puis tire ceste pierre du vaissel et la laisse refroidit puis la remetz en un vaissel nouvel / et la remetz en la fornaisie secondement / et fais comme dessus par troys ou par quatre foys / et quant tu la retireras a la quatriesme fois mes pierre en un lieu qu'elle ne sera point touchée de vent ne d'eau ne de rousée / puis la romps en pieces menues par ainsi que une chacune piece soit deix dragmes ou plus ou moins des dragmes des Grecs. Quant tu voudras donc faire operacion dicelle pierre / metz environ la pierre le poix d'elle de souffre / puis l'arrouse d'eau et il sortira d'elle un grant feu montant en hault a la mesure d'un bras qui bruslera tout ce qu'il touchera. Et quant les pierres de magnes ne sont point ainsi preparées comme j'ay dit / mais demeure crue comme elle est / et est moullée de jus d'aulx ou d'oignons / elle est empeschée de l'attraction du fer. Mais se tu veulx qu'elle retourne a sa vertu / metz la un jour en sang de bouc / et sa vertu sera comme devant. On prend une grant piece de ceste pierre qui est bonne et esleue / et est approuchée a la clavature d'aucune chose et elle tourne tantost : car ceste pierre attire a soy le fer. Et quant aucun est nature de fer venimeux / cette pierre est broyée et meslée avecques oingemens. Et qu'on donne en beuvrage dicelle le venin par bas / et si elle pouldre sur la playe elle la guerist.

Dyascorides. La pierre de magnes a grant vertu comme en attirant le fer. Aucuns pour esprouver l'amour de leur femme dormant elle non saschant / et si elle estoit chaste d'autre homme elle venoit a son mary moult eschauffée d'amour / en l'embrasant comme si elle fust boutée d'aucun. Mais si elle avoit eue la compeigni d'un autre homme / elle luy renvoyoit la pierre comme de puant odeur et cheoit du lict : car elle a concorde avecques elle. Car si plusieurs femmes par noyses s'en seroient allées de leurs marys elles les contraigneroit a retourner a leurs maris car elle les sait estre gracieux a leurs femmes serviabes et joyeux a ceulx qui la portent avecques eulx.

Les larrons quant ilz veulent desrober les choses precieuses ilz entrent en la maison / et entre les quatres angletz de la maison mectent charbons ardans / et ilz y mectent la pierre menue trenchée / et ainsi ilz y transmuent lentement et les yeulx de ceulx qui y sont / tellement qu'ilz s'en fuyent et leur semble que la maison doit tresbucher.

Elle a forces purgantes / et pour ce elle est donnée aux ydropiques avec mulsa a demye drame car elle amaine toutes les grosseurs et les humeurs / et que l'administre sur le ventre quant elle est bruslée et aspergée elle guerist les brusleures.

Evax en ses magiques. Ceste pierre esmeut merveilleusement les fantasies / principalement quant elle est a consecration et les caracteres comme il est enseigné es livres de magique. On dit aussi que avecques mulsa elle guerist de ydropisie. Il y a une autre espece de magnes qui a vertu de attirer la chair de l'homme.

Albert en son lapidaire. La vertu de magnes est merveilleuse en l'attraction du fer / en tant que la vertu transmue le fer / tellement que ce fer attire autre fer et

par ainsi plusieurs aiguilles semblent estre suspendues l'une a l'autre / mais quant il est oingt d'autre chose il ne attire point / et le petit ayment lye la grant magnés.

En nostre temps a este trouvé ung magnés qui d'ung costé tiroit le fer et de l'autre costé le chassoit.

Et celuy Aristote met du genre des magnés. Et me a racompté une de noz compaignons curieux experimentateur / qu'il vit a l'empereur Frederic ung magnés qui ne tiroit point le fer / mais au contraire / le fer tiroit le magnés. Et Aristote dit qu'il y a une autre maniere de magné qui attire les chars de l'homme. On baille es livres de magique qu'il fait venir merveilleuses fantasie / principalement quant il est consacré de consecracion et caractere ainsi qu'il est enseigné esdis livres.

On dit aussi quant il est prins avesques mulsa guerist de ydropisie. On dit aussi que quant on le metz soubz la teste d'une femme elle la incitera tantost a l'embracement de son mary si elle

vue 892

est chaste / mais si elle est adultere de grant paour et crainte de fantasies elle cherra du lit du mary.

On dit aussi que les larrons entrans en une maison mectent charbons ardans en quatre anglez de la maison et gectent ceste pierre broyée / el lors ceulx qui dorment en la maison sont tant espouenté fantasies qu'ilz s'en fuient et laissent tout la / et lors ilz prennent ce qu'ilz veuletent.

Chapitre lxxviii. De margarita Marguarite

Margarite. La Pandecte au chapitre cccc. Margarite ou perle est celle qui est trouvée es oistre / desquelles les aucunes sont persées et les autres non persées. Aucune sont faictes artificiellement et non naturelles : mais non persées. Des naturelles les persées sont les meilleures. Et pour ce quant on les met es medicines on entant des non persées. Aucunes sont obscures tendans a citrinite non persées qui expellent aux persées. Et pour ce on les doit eslire blanches et cleres : car s'elle qui est obscure et pasle ne se doit point mectre en medicine. Serapion au livre aggregatoire au chapitre hager albalo de l'auctorité de Rasis. Hager albalo / cest la pierre de la margarite / elles sont apportées de la mer / elles sont froides et seiches au second degré.

Et luy memes de l'auctorité d'Ysaac. D'elles en y a de grosses et de petites / mais les grosses sont meilleures que les petites / et les cleres que les obscures et celles qui sont egales en leur superficies sont meilleures que celles qui sont anguleuses en leur figure.

Albert en son lapidaire au chapitre des margarites. La margarite est une pierre trouvée es oistres / les meilleures viennent de Ynde. Il en vient plusieurs de la mer de Bretagne / laquelle on appelle a present mer d'Angleterre / et environ Flandres et Theotonique on en trouve / et en ay trouvé en mangeant a la table

dix en ma bouche / mais les jeunes oistres ont les meilleures / et ont une couleur comme si un petit de lumiere penetrait moult blanche. Et pour ce on dit que les oistres entonnoir comme en advortant vomissent leur resplendeur / combien qu'elles soient blanches et sont trouvées en petis monceaux / et en aucuns fleuves de Gaule en l'arene.

Les operacions de la margarite.

Albert. Leur vertu est experimentée en la confortacion des esperitz et contre la cardiaque et sincope. Elles valent aussi contre le flux de sang / contre lyenterie et dyarrie. Car elles reparent les esperitz subsilz ainsi que aucuns dient / mais faulcement : car par leur asperité elles abstergent les membres de leurs superfluites et en coartant mainent en ung et ainsi confortent.

Serapion. Les margarites sont dessiccatives des humidites / elles valent a la debilité du cueur / et bonnes a mettre en alcool / et sont froides et seiches au second degré.

Et luy mesmes de l'auctorité de Athabari. Elles sont bonnes a l'obscurété de la veue / et a la blancheur de l'oeil / et aux ordures dicelluy / elles retiennent les menstrues / et n'estoient les dens et desseichent les humidites.

Et luy mesme de l'auctorité de Ysaac. Elles sont bonnes a la cardiaque et en tremblement du cueur et aux accidens procedens de melancolie par la malice des humeurs. Et ce pour ce que elles clarifient le sang du cueur quant il est engrossi au cueur / elles desseichent l'umidité qui est en l'oeil / pour ce qu'elles fortifient les nerfz des yeulx. Et quant les margarites sont dissoutes ; et qu'on en oingt la morphée appellée baras elle l'oste / mais qu'on l'en oingne hastivement.

folio C li. vue 893

Avicenne au livre des forces du cueur dit que elles confortent le cœur.

Chapitre lxxix De magnesia et marcassita

Magnesia et marcassita. Albert. Magnesie est une pierre noire. Et aucuns l'appellent magnasie / de laquelle les voirriers usent souvent.

Luy mesmes. Marcassite ou mandasite est une pierre qui a plusieurs especes de couleurs : car elle a la couleur de tous les metaulx. et est dicte marcassite d'argent et d'or / et ainsi des autres metaulx : mais le metal qui la couloure ne distille point dicelle mais se evaspore au feu et demeure cendre subtile. Ceste pierre est congneue quant aux alkymistes / et est en plusieurs lieux trouvée. Ce semblablement dit Enax en son lapidaire.

Les operatipns de magnesie.

Albert. Magnesie distille et flue en grant feu et fort et non point autrement / et lors quant on la mesle avec voirre elle taint en pourpre la substance du voirre. Ce mesmes dit Atabary en son lapdaire.

Chapitre lxxx. De malcha et gypsum

Malcha et gypsum. Plinius au xxxvi livres. Malcha est quant de chaulx nouvelle est faicte une masse.

Les operations de malcha.

Lui mesmes. Malcha ou masse est broyée avec figes et sain de truye par deux lymignons qui est la chose plus tenant qui soit / car ce excede la durezza de la pierre. Mais elle qui est meslée d'huile elle est obfusqué.

L'acteur. De la malcha flageant qui est limon d'estaing est envoyée naturellement de la renommée de la cite.

Ysidore. Gypsum. Le gypsum. Le gyp est prouchain de la chaulx. Et en est qui est tres noble et tres agreable es edifices.

Avicenne. Gip est une pierre lamineuse blanche et petite : laquelle quant elle est bruslée devient moult subtile. Elle est froide et seiche et glutinative. Elle est mise sur les parties qui seuffrent flux de sang / car elle restraingt. et en elle avecques sa conglutinacion est une vertu quelle fait adherer. En luy est stipticité avecques viscosité. Le front en estoingt ou la teste en est couverte comme d'ung chapeau / et il retient le sang des narines. Il est aussi mys sur obtalmie sanguine. Il en y a en Syrie qui est du nombre des venins mortelz. Gip est une pierre tres dure ; laquelle est cuyte avecques fiente de beuf affin qu'elle soit plus tost bruslée.

Chapitre lxxxi De marmore.

vue 894

Marmor / marbre. Ysydore au xvi livre. Marbres sont tres grandes pierres qui sont magnifiques et meslées de taches et de couleurs. Le marbre Grec est dit estre verd : combien qu'il y ait d'autre couleur / mais ilz ont prins leur premier nom de verdeur. De iceulx marbres il en y a de moult manieres et diverses couleurs : lesquelz sont prins es roches / mais soubz terre en y a beacoup qui sont moult precieux.

Les operations de marbre.

Plinius. On ne pourroit avoir la cognoissance des manieres de marbres ne de leurs couleurs / ne les nombrer tant en y a grant multitude. Car il n'y a gueres lieu ou l'on ne treuve son marbre : combien qu'il en y ait beacoup en diverses terres qui sont moult louez des gens du pays.

Mais tous les marbres ne sont pas engendrez en lieux pierreux / mais plusieurs tres precieux aussi sont trouvez soubz terre ; comme celluy de Lacedemone qui est verd et plus beau de tous les autres / puis le Auguste / et apres le Tybere : qui furent trouvés en Egipte du temps de Auguste et de Tybere. Et la difference diceulx est du marbres ophites / pour ce qu'il est semé de macules et taches semblables a ung serpent : duquel il a prins le nom / car il a diverses macules et taches. Mais le Auguste est comme undoyé et crespé. Et le Tybere est semé

comme de cheveulx blancs. Il y a autres manieres desquelles nous avons parlé au chapitre lxiii.

Chapitre lxxxii. De melochites et murrina.

Melochites et Murrina. Ysidore. Melochites est une pierre espesse verde et plus grasse que l'esmeraulde laquelle a prins son nom de couleur de mauve. Et est louée en rendant signes. Elle naist en Arabie.

Arnoldus. Melochites est une pierre verde semblable a l'esmeraude moult molle : laquelle garde les membres de empeschemens et mauvaises advantures / et semblablement les berseaulx des enfans.

Les operations de murrina.

Ysidore. Murrina est une pierre qui croist en la contrée nommée Parchie / et la meilleure est en Alemaigne. Et dient que cest une humeur soubz terre espessie de couleur ayant resplendeur avec repercution de couleur : comme l'arc au ciel / duquel la contraire cause fait le cristal par gellée plus vehemente.

Albert. Melochites qu'aucuns appellent melonites est une pierre Arabique de grosse verneur : mais non pas luisant comme esmeraulde / et est molle. On dit qu'elle a vertu de garder celluy qui la porte de mauvaises advantures. Et la met on sur les berseaulx des petis enfans.

Et dit ce Enax en son lapidaire.

Chapitre lxxxiii De memphites

folio Cii vue 895

Memphites. Albert. Memphites est une pierre ainsi appellée de Memphis une cité d'Egipe / laquelle on dit estre chaulde comme feu mais cest en vertu et non pas actuelement.

Les operations de memphites.

Ceste pierre broyée est donnée en beuvrage a ceulx a qui on doit couper aucuns membres ou brusler / car elle cause insensibilité que le pacient ne sentira riens. Ce mesmes dit Enapx en son lapidaire.

Chapitre lxxxiiii. De medo.

Medud. Dyascoride. Medus est une pierre noire / laquelle quant elle est broyée fait couleur citrine.

Albert. la pierre medus ou medo est ainsi dicte de la region de Mede en laquelle elle est trouvée. Il en est de deux especes / l'une noire et l'autre verte.

Les operations de medus.

Albert. On dit sa vertu estre contre vieille podagre / contre cecité des yeulx et contre nesfretique passion / on dit aussi qu'elle conforte les foibles et travaillez.

On dit aussi que se les lave dicelle eaue ses membres seront escorchés / et se il en buvoit il se mourroit en vomissant.

Dyascorides. Elle est de double pissance / bonne et mauvaise / car quant elle est broyée par tontricion medicinale avec laict de femme qui aura eu en son premier enfantement ung filz : elle guerist les albugines et blancheure des yeulx quant ilz en sont oingtz et aussi toute la douleur. Elle est aussi bonne aux podagres desquelz on n'a point despoir. Semblablement avecques laict de brebis qui aura eu une fois un masle elle guerist les rains / les alaines mauvaises et les parties interiores du corps.

Tu dois avoir ceste medicine perparée en ung vaissel d'ivoire ou d'argent et la prendre a jeun et la metz sur la queux pour broyer et en donne a qui que tu voudras et en lave la face et elle sera deseichée. On en doit donner a boire ung pou qu'il ne soit point saoul. On la treuve environ le fleuve de Fasin.

Chapitre lxxxv. De Mogra Ocre

Mogra. Serapion. Mogra / de ceste pierre l'une est appellée de la terre Finos / et la meilleure dicelle est celle qui est pesante d'empse et espesse / de laquelle la couleur n'est point diverse ; et est comme de foye ou de sang non ayant pierre. Et quant on la met en l'eaue elle est dissoulte facilement et croist. La mogre de laquelle les charpentiers usent est de plus debile operation que celle qu'on apporte de Finos et de Babiloine. La meil-

vue 896

leur est celle qui se broye legierement. On la concuille en Capdoce distillant des fosses et l'apporte on a vendre en la cité de Sinopide dont elle a ptins le nom.

Les operations de Mogra.

Luy mesme de l'auctorité de Galien. En sa saveur elle a stipticité par quoy sa vertu est desiccative / et quant on la hume avec ung oeuf ou qu'on en fait clistere elle restraint le ventre. Car elle vertu stiptique / desiccative et glutinative. Et quant on la met en emplastres elle consolide les playes nouvelles. Elle entre es confection des trociscs desiccatifz et constrictifz du ventre. et quant on la hume avec ung oeuf ou qu'on la baille a boire contre la douleut du foye : et avec ung oeuf on la donne contre cracheure de sang et contre venin.

Paulus au chapitre de mogra. Mogra de Sinopide est plus forte que boli armenic et que terre seellée / et pour ce elle entre es confections des oinguemens / et si tue les vers au ventre.

Chapitre lxxxvi. De mumia Mommis

Momia. La Pandecte au chapitre v.clv. Mommie est ce qui est trouvé es sepuldres de ceulx qui sont embasméz / esquelz lumeur du mort avec aloes et mirre est resolue : desquelz les corps estoient confitz / et ressemble a poix de

mer. Anciennement on fouloit confire les corps des mors de basme / de aloes et de mirre / et encores de fait entre les payens et sarrasins environ Babiloine ou il y a habondance de basme.

Serapion au livre aggregatoire au chapitre mumia. Mommie des mors ensevelis / cest aloe / basme et mirre : et ce qui est meslé avec eulx des humeurs du corps humain.

Luy mesmes de l'auctorité de Dioscorides. Es terres qui sont dictes acolonie elle descend des montaignes qui amainent les fleuves avec les eaues et l'eaue du fleuve le gecte a la rive et est coagulée et faicte comme cire ayant l'odeur de poix et de aspartum meslé ensemble.

Les operations de mommie.

Serapion de l'auctorité de Rasis. Par le dit baucums mediciens elle est bonne a la maladie de la teste appellée soda fleugmatique et froide sans matiere et a emigraine / paralisie et torture de la bouche epilencie et scotomie. Nous en faisons ung caputpurge d'ung grain d'elle avec eaue de marjolaine. Elle est bonne aux douleurs des aureilles quant on en dissoult ung grain d'elle avecques huyle sambucy et qu'on la distille en l'oreille. Elle est bonne a la douleur de la gorge quant on dissoult dicelle ung kitat avec eaue de satureia. Elle est bonne contre toux avec eaue de junibe ou avec eaue d'orge et sebestes. On donne a boire a jeun contre cardiaque ung kirar dicelle avec eaue de mente. Elle vault a ventosité des intestins si on en prend ung kirat avec eaue de commin et de caruy : ou avec eaue de ameos elle vault en percution et cheute. On donne a sanglout ung grain dicelle avec eaue de la decoction des semences de ache et de caruy / et le mesle on avec huille de ben / et de icelles fait on captupurge. Et en

folio Cliii vue 897

squinancie on prend ung kirat : dicelle avec squingibin. En la douleur de la rate ung kirat avec eaue de caruy. Et contre venin deux grains avec decoction de tribulis marins et feuilles de anniden. A la pointure de l'escorpion ung kirat avec vin pur. Et la met on en la pointure avec beurre : et est bon en fracture. Et aussi aux concussions qui se font dedans le corps et dehors et a la constriction du poulmon. Elle est comme attrempée si non qu'elle a propriété en appaisant les douleurs qui sont es fractures quant on la prend en beuvrage et qu'on en oingt les lieux et qu'on en fait ung clistere elle vault es ulceres de la vecie et de la verge. Et luy mesme de l'auctorité de Rasis. Aucun avoit flux de sang et ne pavoit estre restraint par aucune medicine jusques a ce qu'on luy donna de la mommie le poix de trois grains avec vin et tantost il fut restraint. Et quant on fait d'elle ung suppositoire avec huille de sambach elle est bonne a ceulx qui ne pevent retenir leur urine.

Paulus au c. de mummia. Elle est chaulde et seiches laschent / et plusieurs chauldes et seiches retraignent.

Avicenne au livre des forces du cueur. Mommie est chaulde en la fin du tiers degré et seiche au premier ayant propriété de conforter le cueur. Item quant on

en fait un g suppositoire avec huile mustellin elle est bonne a ceulx qui ne pevent retenir leur urine.

Ensuit la lettre N.

Chapitre lxxxvii De niso.

Nasus. Albert. Aucune dient qu'il est du genre des pierres et est trouvée en la teste d'un g crapault.

Les operationx de la pierre nusus.

Ilz sont deux manieres de ceste pierre nusus. L'une est pasle : comme se laict avoit entre en sang et qu'il vainquist / et pour ce ilz dient qu'il appert en elle voines sanguines. L'autre est noire : et aucuneffois est paingt en luy le crapeault les piedz esfendus devant et derriere. On dit aussi que si elles sont encloses toutes deux avec venin elles bruslent la main de celluy qui les touchent. L'aprobation de cette pierre si est que se on la baille et la touchera de la gueule s'il peult. On dit aussi que present le venin celle est faicte diverse qui estoit pasle.

Ce semblablement dit Enax.

Chapitre lxxxviii. De lapide nigrorum.

Nigrorum. Avicenne au second livre au chapitre propriété. Nigrorum est une pierre apportée des noirs declinant a citrinite.

Les operations de la pierre des noirs

Avicenne. Elle esr frotée : de lui yst une frication mordicant la langue semblable a laict Elle

vue 898

mundifie la maille et tache de l'oeil nommée pannus quant il n'y a point d'apostume ne de obtalmie. Elle est convenable aux vestigies et traces de ulceres en l'oeil : et de destruit l'ongle..

Chapitre lxxxix De nitro Nitre

Nitrum. Ysidore. Nitre a pris son nom du lieu ou il croist / car il croist en Nitrie une cité ou region d' Egipte / duquel mes medicines sont faictes / et les ordures des corps et des vestemens sont lavées. Sa nature n'est pas moult differente du sel / car a la vertu du sel et croist semblablement quant les rivages blanchissent par seicheresse. Affronitrum : cest escume de nitre et est cueillie en Asie es fosses et cavernes distillant et apres est deseiché du soleil. Le meilleur est de couleur de pourpre. La glose sur les paraboles. Nitre est tres semblable a sel excepté qu'il n'a rien de saveur salée . Il sault en l'eaue comme cave vive / mais

il rend l'eau convenable a lavement. Doncques le nitre boult en eau / ainsi la mauvaie pensée est faicte pire et enflambée de correction.

Les operations du nitre.

Avicenne au second canon. Baurach / c'est a dire nitrum / il est plus fort que le sel : chault et sec au second degré. Le meilleur est celui d'Armenie / lamineux : frangible / spongicux / blanc ou purpoureux ou rose mordicatif. Il absterge fort / il mundifie et escorche et trenche les humeurs grosses : et assubperficie du corps et amende la couleur. Il est bon en prurie / car sa vertu est resolutive : especialement le affricanum avec vin aigre. Et aussi a scabie / lequel quant il est beu avec aucunes medicines tuans les vers il les amaine hors. Il est bon contre venin / especialement celui qui vient d'Auffricque. Son escume vault contre la morsure d'ung chien : et contre le beuvrage des cantarides.

Constantin. Nitre est apporté d'Armenie et l'autre d'Arabie. Universellement il est collatif et mundificatif. Il lave les parties interiores et exteriores du corps meslé avec vin aigre.

Dyascorides. On doit eslire le nitre leger rouge ou blanc qui ait pertuis comme une esponge. Le blanc est aigre et amer lequel vient de Inde. De nitre l'ung est gras et lamineux / l'autre tenne l'autre rouge / l'autre blanc : la vertu desquelz est desiccative. Et pour ce quant on le prent par la bouche il diminue et attene les grasses et visqueuses humeurs.

Le Plateaire au livre des simples medicines. Nitrum est chault et sec au second degré. Le blanc est meilleur que le citrin. Il a vertu de dissoluer et de estaindre / l'usage duquel est contre la sanie de l'estomach et contre les intestins / contre les furfures des cheveulx et les poulx de la teste / contre les vers des aureilles et la sanie.

Ensuit de la lettre O.

Chapitre xC.

folio C liiii. vue 899 **De obtalmio Obtalmie**

Obtalminus. Albert. Obtalminus est une pierre nommée de Obtalmie / de laquelle la couleur n'est point nommée. Per advanture pour ce que elle est de diverses couleurs.

Les operations de obtalmie.

On dit que quant on la porte elle est bonne contre toutes les mauvaies maladies des yeulx. On dit qu'elle aveugle la vue de ceulx qui sont a l'environ. Et pour ce le patron dit qu'elle rend ceulx qui la portent innuisibles. Ce semblablement dit Evax.

Chapitre xCi De onix onice

Onix / onice. Albert/ Onix est une pierre de noire couleur / la meilleure est celle qui est trouvée ayant voyne blanches diverses. Elle vient de Ynde et de Arabie.

On la treuve de cinq diversités pour la varieté des voines et des couleurs. Aucuns dient se sardins est present que onice est lyée. Et aussi on la pend pour les nuy semées / lesquelles propriétés si elle a / elle les a :car elle a les vertus de mouvoir melancolie especialement au chief / car par le trouvement dicelle avec les vapeurs toutes ces choses procedent. Aucune dient que onix est oniche / et est vray semblable / ou que ce soit une espece dicelle / mais en couleur elle n'est point noire / si non aucuneffoys / mais a couleur comme ung ongle / mais en noz oniches sont trouvées plusieurs couleurs / blanches / noires et rouges / lesquels et les toutes sont mises une substance / qu'ilz ont la similitude de l'ongle de l'homme. On dit aussi qu'elle vient de la larme d'ung arbre appellé onicha / laquelle endurecie engendre ceste pierre / et pour ceste cause dient qu'elle est odoriserant au feu. Ilz dient aussi que ceste est la cause pour quoy on la trouve paincte de diverses ymages car une larme en son commencement est molle / et pour ce est painctz facilement et retient la paincture quant elle est endurecie et coagulée en pierre. Aucuns dient que ceste pierre entre insensiblement en l'oeil / et et ce est merveilles. Et je ay veu ung saphir entrer en l'oeil et la pierre du coq / et ung autre / duquel je ignre le nom / sans lesion de l'oeil. Quant il est poly et tenu in ne blesse point l'oeil /s'il ne touche a la pupille sensible de l'oeil et au pertuis du nez.

Les operations de onix onice.

Albert dit que quant on le pend au col ou au doyc qu'elle excite tristesse et paours et merueilleuse fantasies en dormant. Et dit on qu'il accroist noises et tristesses. On dit aussi qu'elle accroist la salive es enfans.

Chapitre xCii. De orphano Orphane

vue 900

Orphanus / orphane. Albert. Orphanus est une pierre qui est en la couronne de l'Empereur Romain / jamais ne fut ailleurs veue. Pour quoy on l'appelle orphane. Elle en couleur comme de vin ayant subtile vinosité / et est comme se une chose candide resplendant penetroit en rougr / cler vineux / et qu'il fust surmonté dicelluy / cest une pierre luyante. Et dit on qu'aucuneffoys elle a luyt de nuyst / mais maintenant an nostre temps elle ne luyt point en tenebres.

Les operacions de orphane.

On dit qu'elle est convenable a l'honneur royal. Ce semblablement dit enax.

Chapitre xCiii. De opalo.

Opalus. Ysidore. Opalus est une pierre distinguée de diverses couleurs de pierres. En luy est plus moindre feu que en l'echarboucle : resplandissant de la purpureité de l'amatiste / et fulgent de la verdeur de l'esmeraulde. Et a le nom du pays pour une lumiere qu'il a de toutes les autres soubz une varieté. Et la trouve on seulement en Ynde.

Plinius au livre xxxvii. Les opales sont en Ynde / ausquelles les compositeurs des pierres precieuses ont donné gloire et grandement inenarable difficulté / car en icelles sont ensemble toutes les lueurs des autres par une inenarrable mixtion. Les autres par une tres grande augmentation de resplendeur l'ont coequalé avecques toutes les couleurs des pigmens. Les autres ont egalé en la grandeur d'une noix de cavllaine la flambé ardent de souffre / ou aussi de feu emflambe d'huylle.

Les operations de opalus.

Arnoldus. Opalus est une pierre precieuse prouffitable a celluy qui la porte contre toutes les maladies des yeulx. Elle conforte la veue ague / et par tout elle aveugle et obscure les yeulx de ceulx qui sont a l'environ.

Chapitre xCiiii. De orithes

Orithes et ostratites. Arnoldus. Orithes est une pierre de troys manieres / l'une est ronde et noire / l'autre est verte ayant taches blanches / la tierce est de laquelle l'une partie est aspré / et l'autre plaine / et est ung corps comme myne et lamyné de fer.

Les operations de orithes et ostratites.

folio Clv vue 901

Ceste pierre portée et meslée avec huyle rosat d(e)ffend de mauvais adventures et des morsures mortelles des oyseaulx et autres bestes.

Du lapidaire. L'orithes noir et rond guerist les morsures mortelles des bestes.

Ysidore. Ostratites est une pierre comme une escaille dont l'une est moult dure semblable a agathe : si non que agathe pollye engraissist. La plus dure a si tres grant force que on en taille les autres pierres.

Chapitre xCv De ophites

Ophites / purpurites / porsirites / et parius. Plinius au trenteseptiesme livre. Orphites a la semblance des serpens / en taches et macules / en ne sont point trouvées dicelle coulounes si non petites. Ilz sont deux genres dicelle. C'est assavoir une blanche qui est molle / et une noire qui est dure. Et dit on que l'une et l'autre ostent les douleurs de la teste quant elles sont mises et tenues sur la teste / et valent contre les poinctures des serpens. Et aussi aucun dit et commande que celle qui est blanche soit lyée aux bras de ceulx qui sont frenetiques / et a ceulx qui ont litargie.

Ysidore. La pierre purpurites qui naist en Ynde est rouge / meslée de poins blans en elle survenans. Et a ce nom pour la cause qu'elle rougist ainsi que pourpre. Plinius au livre que dessus. La pierre porfirites aussi de Egipte rougist aucuns poins candides et blans luy survenans.

Les operations de la pierre parius.

Ysidore. Parius est une pierre de marbre de tres grant resplendeur. Elle naist en l'isle nommée Paron dont elle est ainsi nommée. La grandeur dicelle est quelle ne excede point les lances / et les grandeurs de hanaps. et est conenable a mectre oingnemens.

Ensuit de la lettre P.

Chapitre xCvi. De palagio Palais

Palagius. Albert. On dit que palagius est une pierre de couleur rouge et moult luisant de nature et substance transparente. Et est dicte estre la femme de l'escharboucle / laquelle a ses vertus mais plus petites ainsi comme la femme au regard de l'homme.

Les operacions de palagio.

Aucuns dient que cest sa maison / et pour ce on l'appelle le palais de l'escharboucle : et l'escharboucle s'engendre souvent en ceste pierre. Et on a veu autrefois qu'en ceste pierre la partie exeriore estoit palagius : mais l'interiore estoit escharboucle / pour quoy on dit que ceste manniere de pierre est du genre des escharboucles.

Chapitre xCvii De panthero

vue 902

Pantherus. Albert. Panthere est une pierre ayant plusieurs couleurs / et en une partie dicelle pierre noire c'est assavoir verte et rouge et plusieurs autres couleurs. On en trouve une qui est pasle / purpuce et rosée.

Les operations de panthere

Albert. On dit qu'elle fait la vue fusque. On la trouve pour le plus en Ynde. Celluy qui la porte la doit regarder au matin a soleil levant : car elle est lors efficace et vertueuse. On dit qu'elle a autant de vertus qu'elle a de couleurs. Ce semblablement dit Enax en son lapidaire.

Chapitre xCviii. De prassio

Prassius. Albert. Prassius est une pierre : laquelle on dit estre mere et le palais de l'esmeraulde. Elle est de couleur verte semblabe a la couleur de prassium. On la touve aucunnfois avecques gouttes blanches. Il y a une autre espece de ceste pierre ayant gouttes dorées / laquelle est appellée crisoprassus et n'en trouve on gaires souvent/ et pour ce il plus cher pour quoy lis dessus lapis crisoprassus en la lectre L.

Les operations de prassius

Il est experimenté qu'elle conforte la vues / et a aucunes des operations de jaspe / et aucunes de l'esmeraule.

Ce semblablement dit Enap.

Chapitre xCix. De Peridonio.

Peridonius. Albert. Peridonius est une pierre luisante en couleur comme feu.
folio C.lvi vue 903

Les operations de la pierre peridonius.

Albert. On dit qu'elle vault contre l'artetique merueilleusement. Et dit on de ceste pierre / que si elle est forte estrainte la en main qu'elle la brusle. On la doit doncques toucher legierement et en crainte. Je l'ay experimenté souvent. On dit que de ceste espece il en y a une autre semblable a crisolite si non qu'elle est de plus grandeur verdure.

Chapitre C. De piridites Markasite

Piritides en Grec / en Latin cappa rosea / en Arabic hageral marcasita.

Serapion au livre aggregatoire au chapitre hageral markasite est une pierre de laquelle on tire l'arain / et doit on eslire celle qui est semblable a arain / quant on la met au feu il en sault des scintilles legierement. Elle est bruslée en ceste maniere. Metz la en feu legier et le suente jusques a ce qu'elle soit rouge. Puis la tire du feu. Aucuns la mettent en grant feu de charbons puis l'oignent de miel / puis la mettent au feu jusques a ce que toutes ses parties soient egallement bruslées. Car par aventure a la premiere fois elle n'est que bruslée de ors et non point dedans / apres on souffle la cendre hors et la garde on. Et se tu as a faire de la laver / lave la comme on fait cathimie.

Dyascorides au chapitre de la pierre piritides. La pierre piritides / cest markasite / de laquelle se fait l'arain. On doit eslire celle qui a la couleur d'arain qui se fait frangible au feu. Elle est ainsi bruslée. On l'oingt de miel et la met on entre les charbons ardans / et la souffle jusques a ce qu'elle ait la couleur rouge / les autres la mettent en grans charbons ardans. Puis de rechief l'oignent et cuisent jusques a ce qu'elle est refroidée : apres la lavent comme la cathimie et la gardent.

Les operations de la markasite.

Serapion. Sa vertus soit bruslée ou non bruslée est de absterger et mundiffier les ulceres. Elle absterge aussi l'obscurete de la vue. Elle resolve et meurist les apostumes dures. Et quant elle est resolvee et meslée avec raisine de pin elle resolve le sang coagulé.

Elle oste la chair superflue avec ung petit de calefaction et stipticité. Aucuns apres qu'elle est bruslée l'appelle dicidas ou diffriges.

Et luy mesmes de l'auctorité de Galien. Ceste pierre est l'une des pierres qui ont la vertu forte. Nous l'administrons avec resolutifz et meslons avec elle la pierre sacharos. Nous resolvons souvent avec ce flux oignement grande humidité assemblée es concaviés et cavernes des muscles. Et quant on administre ce(t)te pierre on la doit fort broier / car elle oste l'humidité corrompue qui est soubz le cuir. Et pour ce quant elle est broyée de derreniere trituration et confite avec vin aigre / elle absterge baras / la morphée et les lentilles de la face. Elle est grande vertu en abstergant l'oeil et conforte sa substance et si aguise la veue. Et pour ce est appellée en la terre de Perse la pierre lumineuse / elle fait les cheveux tenues et crespée.

Dyascorides. Sa vertu est quant elle est cuite ou crue termantiques et asmitique. elle purge les obscurité des yeulx / et fait diasforesie et digestion. Et quant avecques elle est adjoustée resine / elle fait les chairs pareilles et egales. Ceste pierre bruslée est dicte de plusieurs defriges. Ceste pierre est une espece de vitriol ainsi qu'il appert si tu lis la chapitre vitriolus cy dessoubz (*vue 930*) en la lettre V. Laquelle quant elle n'est pas bruslée / si elle est puverizée et destrempée ou soit meslée avec vin et

vue 904

noix de galles broyées / cest tres bon encre a escrire.

Ceste mesmes chose dit Albert en son lapidaire.

Chapitre C i Depetroleo huile de petrole

Petroleum. Cassius Felix au chapitre de petroleo. Petroleum est huile de pierre. elle est trouvée en lieux sulfureux. Et est faicte avec la graisse de la terre et l'action de l'eaue et est convertie la chaleur aux parties ignées. Elle est trouvée aussi dessus les pierres. Laquelle resourt et sue par icelles et est en icelles / et est trouvée dessus ma mer.

Avicenne. Petrole blanche est une espece notée. Et la noire est ung coulement de poix de Babiloine / chaulde et seiche jusque au quart degré. Elle est soluble / et mesmement la blanche est resolutive / liquefactive / et aperitive de opilations.

Les operations de l'huile de petrole.

Avicenne. Huille petrole proufite aux douleurs des anches et aux douleurs des jointures. Et par especiaul la blanche. Et vault aux douleurs froides des aureilles. Elle est prouffitable contre les blanchisseures des yeulx et a l'eaue descendante. Et la noire vault aussi contre empeschement de laine nommé asma / et contre la toux ancienne. Et est ung petit beu dicelle avec eaue chaulde. Elle oste la douleur pungitive et poignante du ventre et les ventosites. Et quant dicelle est fait limignon / elle occist les vers / et par especial la noire. Et quant dicelle est mange le poix d'une dragme / elle rompt et espart la ventosite de la vecie et la froidure de la marris. Et si vault aux pictures epithimatés.

Chapitre Cii De peanites.

Peanites. Arnoldus. Peanites est une pierre engendrée de michedon / et est de sexe feminin. Elle concoist en certain temps / parist une pierre semblable / et est convenable aux femmes qui sont grosses et encaintes.

Les operations de peanites.

Du lapidaire. La pierre peanite est engendrée en mere / et non pas en region en portant les labeurs et en ensuyvant et imitant le sexe feminin. Et pour quelles causes il en est doute. Mais en temps elle concoist et parist / et aide a ceulx qui parturient et enfantent. La derreniere partie contraint et a l'heure du doute du peril.

Chapitre Ciii. De poderos

folio Clvii vue 905

Poderos et pontica. Ysidore. Poderos est une gemme la seconde apres Marguerite laquelle est la plus resplendissant des gemmes resplendissantes / de laquelle est enquis de quelle couleur elle doit nommée / tant de fois gectée par les estranges beaultés du nom : tellement que elle est faicte du nom prerogative de beaulté.

Les operations de pontica.

Luy mesmes Ysidore. Les gemmes pontices sont resplendissantes de gouttes aurées ; les unes ayant estoilles : et les autres sont lignées de longs menemens et traictz de couleurs. Celles veulent estre portées sobrement et chastement.

Chapitre Ciiii. De Phrigio et phingetes.

Phrigius et phingetes. Ydidore. Phrigius ainsi dicte du lieu / pour ce qu'elle naist en Frigie. Elle est de couleur pasle moyennement pesante et grave. Et est roche dure pongieuse. Elle brusle quant par avant elle est moillée en vin et puis soufflée de souffletz tant que elle deviengne rouge. Et de rechief est estaincte trois fois en vin doux. Et est tant seulement utile a taindre les robes et vetemens.

Les operations de phingites.

Ysidore. Phingites autrement phengites est une pierre de Capadocie dure comme marbre / resplendissante et tres reluysante. De laquelle anciennement fut edifié et construit d'ung roy ung temple ou il mist portes d'or / lesquelles quant elles estoient closes il y avoit dedans iceluy temple clarté diurne et longue.

Plinius. En Copadocie fut trouvée la pierre phigites soubz Neron prince / par raison et argument ainsi appellée. Car ses voines cheurent en rougeur ou rousseur resplendissantes et tres reluysantes. Et donna fortune a ceste pierre ceste chose / laquelle ilz appellent sciam.

vue 906

Chapitre Cv De Pumex

Pumex : est ainsi appellé en Latin. En Arabic famechi / et en Grec fanech : ou fenic / ou la pierre de barchin.

Serapion au livre aggregatoire au chapitre famechi. Famechi : c'est a dire pumex / et est la pierre de Barchin / c'est a dire lipary. Il convient que dicelle on choisisse celle qu'ait moult de pertuis qui soit dure et frangible / legiere et blanche : et en laquelle n' y a point de pierres. Et la maniere de sa brusleure est telle. On prend dicelle une quantité et est mise dedans charbons ardans / et quant elle est rouge et enflambée elle est tirée et puis estainte en vin odoriserant / et est ceste chose faite par trois fois. Et la troisesme fois quant elle est tirée du feu elle n'est point estainte en nulle chose / mais est laissée refroidir par soy : et puis elle est broyée et gardée.

Les operations de la pierre pumex

Dyascorides. Sa vertus est stiptique / termantique et purgative. Ceste pierre pumex clarifie et purifie les cicatrices des yeulx. Elle replet les playes et rejoint / et oste la chair superflue des yeulx. Et quant elle est broyée et de ce sont frotées les dens elle les nestoye et absterge et est administrée pour abraser et oster les poilz.

Theophrastus au propre chapitre. Si elle est meslée en antidotes dentifriges et smigmatas elle abrase et oste lasptreté et allegist et contraint et coerce.

Serapion. Pumex a vertu stiptique. Elle estraint les gencives et absterge l'oeil et oste la macule qui est en luy : et remplit les playes et ulceres et les consolide et oste la chair superflue qui est en icelle. Et quant elle est broyée et les dens en sont frotées elles nectoye. Et se **elle est mise en vin vaisseau de vin** elle l'empesche et garde de plus bouillir.

Et luy mesmes de l'auctorité de Galien. Elle entre es medicines qui n'estoient les dens quant elle n'est pas bruslée / mais quant elle bruslée elle est faite plus sbtile / car elle acquiert du feu chose adusté et chaulde qui est ostée et separée d'elle quant elle est lavée. Et si clarifle les dens et les absterge et nectoye : et fait ceste chose pour cause de son aspreté. Et par advantage elle fait ceste chose pour cause de sa vertus abstersive. Et pour ceste cause les cornes quant elles sont bruslées nectoyent les dens.

Toutes les choses devant escriptes de cestuy chapitre tu trouveras en La Pandecte au chapitre deux cens lvi.

Ensuit de la lectre Q.

Chapitre Cvi. De quadrato.

Quadratus / Quadros et quirin. Plinius. La pierre quadratus est trouvées en Egipte / et semblablement en Ethiopie / et est tirant sur le blanc.

Albert. Quadros et autrement quanidros est une pierre qu'aucuneffois est trouvée au cerveau du voultor.

Luy mesmes. Aquirin est une pierre qui est trouvée au nid de la hupe / lequel oyseau aucuneffois est tout prestigieux et augurial ainsi que dient les magiciens et les augures.

Les operations de quadratus.

Ceste pierre quadratus a forces restraignantes. Et est dicte occire la chose conceue.

Albert. La pierre quadros / sa vertu est dicte estre contre ung chascun inconvenient nuysable / et remplist les mammelles de laict.

Et dit semblablement cest chose Enax.

Et luy mesmes. Quirin. Ceste pierre est prodicteur des secretz et esmouvant fantasies se ont la met dessus la poictrine de la personne qui dort.

Ceste chose semblablement dit Enax en son lapidaire.

folio clviii vue 907

Chapitre Cvii. De quirino / raday et ravuy.

Les operations de quirino. etc.

Arnoldus. Quirinus est une pierre qui est trouvée ex nidz de l'oyseau nommé et appellé vllule. Elle augmente les visions fantastiques.

Luy mesmes Arnoldud. La pierre redaym est noire et transluisante. Et est trouvée en la teste d'ung coq masle quant il est donner a manger aux fourmis. Et ainsi que on dit cette pierre portée vault pour impetrer toutes choses.

Arnoldus. Ravuy ou autrement rebry est pareil et une mesme chose que bolus armenicus / et est une pierre tyrant sur le rouge

La vertu dicelle est constrective du sang de dissinterie et des menstrues : ainsi que cy dessus est dit au chapitre vingt sixiesme en la lettre de B.

Ensuyt de la lettre R.

Chapitre Cviii. De rubeo.

Robeus. Serapion. La pierre rubeus est moindres que la jacinte : laquelle est appellée en Arabic hager albighedi.

Luy mesmes Serapion au livre aggegatoire au chapitre hager albidi. Hager albighedi ou albuzedi. La rougeur de ceste pierre est plus plaisante aux hommes que celle de la jacinte pour ce que en icelle ne se fait point de obscurete. Et est la miniere de ceste pierre es terres de Orient. Et quant elle est tirée et apportée de sa miniere elle est obscure. Mais quant le feure la excories et nettoyée sa bonté est descouverte et apparoist et est clarifiée.

Les operations de rubeus

Serapion. Si aucun lye ceste pierre a son col ou a son bras / et il la porte il ne verra point de nuyt de mauvais songes / ne aussi paoureux. Et se celluy qui regardera au soleil tant que sa veue est debilitée : torche avecques icelle ses yeulx et elle luy conviendra. Et quant cette pierre est frotée aux cheveux de la teste : elle attire les festus et pailles ainsi que fait la pierre magnes (avec) le fer.

Ensuyt de la lettre S.

Chapitre Cix De saphiro Saphir

vue 908

Saphirus. Albertus. Saphir est une pierre moult congneue : selon le plus vient de Orient et de Ynde. Et est trouvée aussi en Ypidomie au lieu dit Podium de la province region et cité / mais elle n'est pas tant precieuse que elle soit totalement semblable a l'Orientale. Elle est de couleur persique comme le ciel serain / mais en elle vaint la couleur flave. Et pour ce la meilleure est celle qui n'est pas trop perlucide. Et la tres bonne est celle qui a nuées obscures declinantes a rougeur. Il en est aussi trouvé une bonne qui est tyrant sur le blanc / et a macules semblablement / sa substance est comme la nuée obscure aucun pou transparente.

Les operations de saphir.

Albert. J'ay veu ses vertus / et que elle a dechasse deux antracz. Et dit on que ceste pierre rend l'homme chaste / et refroidist lardeur interiore / restraint la sueur / et cure la douleur du front et de la langue. J'en ay veu qui estoit portée en ung anneau et qui purgoit les ordures des yeulx. Mais elle veult avant estre mise en eaue froide / et puis apres aussi sembleblement. Et ce qu'ilz dient que pert la vertu et la couleur apres qu'elle a cure l'antrac : est faulx. Ilz dient aussi que elle vigore les corps et reconcilie la paix / et fait l'homme estre benign et devot envers Dieu. Et enfermist le courage en bonnes oeuvres. Et est aussi ceste pierre appelée d'aucune sirtites : pour ce que elle est trouvée au rivage des Sirtites. Du livre des natures des choses. Le saphir ressemble de couleur au ciel serain. Et touteffoys jamais tant pur soit il : ne monstre en soy ymage ainsi qu'ung miroir. On dit qu'il est tres bon contre fraudes et enuye / et espoventement de paix / et est aucunefois gracieux. Mais il fault que celluy qui le porte par grant estude garde chasteté. Les saphirs orientaulx sont tres bons / et especial ceulx qui vehementement resplendissent de couleur bleus. Aussi le saphir enchasse cette horrible maladie qui est vulgairement dicte moli me tangere. Mais on dit qu'apres la fugacion et chasement il est vicié en la couleur. Du lapidaire. L'espece du saphir est tres convenable aux doirdz des roys. Le noble et bon est resplendissant de replendeur semblable au pur ciel. Et le plus vil est de nulle beaulté ne de nulles vertus. Celuy saphir est de plusieurs appelé

sirtites pour ce environ sirtes il est meslé es arenes libices. Et est trouvé expulse des fleuves de ferveur resplendissant. Mais celui que la terre de M* ede engendre est tres bon. Lequel touteffoys est certifié jamais ne transmettre la veue / et lequel nature apparente a enrichy de si grant honneur qu'il est appellé (et meritement) la sacrée gemme des gemmes. Et qui le porte sur soy : il n'est point occis par nulle fraulde. Il surmonte enuye / et par nul espouement ne selment. Ceste pierre ainsi que on dit degette et met hors de prison ceulx qui la portent / et defferme / resolve les portes et les lyens des prisons quant elles en sont touchées. Et dit aussi qu'il est bon a reconcilier la paix. Et ayme plus nigromance ceste pierre que les autres.

Chapitre Cx De sardio et sarda

folio Clix vue 909

Sardius et Sarda. Albert. Sardius est une pierre de ancienneté renommée entre les precieuses pierres. Item est une qui a une rougeur espesse avecques substance perplaine : ainsi comme si peruieté est ymaginée en terre rouge. Et selon ceste diversité en est trouvé de cinq manieres : si que en aucune n'a riens de peruieté / et par advantage celle est la matrice des autres / et la maison en laquelle elles sont engendrées. Et est trouvée en la cité nommée Sardis : ainsi que on dit / et pour ce est ainsi appellée.

Luy mesmes. Sarda est une pierre qui se contient et aux tables de boys ainsi que fait magnes au fer. Et qui plus est elle se adhere et prent si fort aux tables des navires en la mer que elle ne peut estre arrachée des tables si non qu'on coupe cette partie de la table et ais a laquelle elle se tient et adhere. Elle est en couleur verdoyante.

Et dit semblablement ceste chose Enax.

Les operations de sardio et sarda.

Albert. On dit que ceste pierre sardius enflambe et instigue le courage de la personne a joye / et ague lengin. Et par vertus contraires la pierre onice lye et nuyst.

Ceste chose semblablement dit Enax.

Chapitre Cxi De sardone Sardone.

Sardonis. Albert. La pierre sardone laquelle aucuns appellent Sardonice est composée de deux / c'est assavoir de sardie et onice. Elle est doncque rouge / et cette couleur despend de sardie. Elle est aussi blanche et noire et gette couleur de ongle venant de onice. Et est louable plus celle qui a ces couleurs plus distinguées. Il en est trouvée de cinq manieres ou de plusieurs pour cause de la diverse mixtion des couleurs. Et est le plus souvent trouvée en Ynde et en Arabie.

Les operations de sardone.

Luy mesmes Albert. On dit que cestee pierre expelle luxure / et rend la personne chaste et pudique. Toutefois en elle est ung tres grant vertu en ce : que non obstant que onichius soit nuysable : ceste cy toutesuoyes ne peut nuire ayant la pierre sardius meslée en substance.

Chapitre Cxii De samio et sarofago.

Samius et sarcofagus. Albert. Samius est une pierre ainsi nommée de l'Isle dicte Samius : en laquelle elle est trouvée. Et est de ceste pierre polylos.

Luy mesmes. Sacrofagus est une pierre devorant les charoignes

vue 910

des mors. Car sarcos en Grec est a dire charoigne de mors / et carofagos manger. Et anciennement aucuns premierement firent de ceste pierre l'arche des mors : pour ce que en l'espace de trente jours les corps mors sont consummez. Et pour cette chose noz monumens faiz de pierre sont appelez sarcofagi.

Les operations de samio.

Albert. Samius. On dit que quant ceste pierre est portée elle oste l'avertin de la personne / et enfermist la pensée. Et est dicte avoir cestuy vice : que quant elle est lyée a la cuysse de la femme qui enfante : elle empesche l'entantement. Et ce dit semblablement Atabary.

Chapitre Cxiii De smaraldo.

Smaraldus ou autrement smaragdus. Albert en son laidair au chapitre smaraldo. Smaraldus est une pierre precieuse que moult de autres / et n'est pas rare. Et est sa couleur tres verte et transluisante si que elle est veue figurer par sa verneur l'air a soy prouchain. Et est la meilleur celle qui est plaine en sa superficieté / car adonc une partie ne obumbre pas l'autre. Toutesvoyes la meilleur est celle qui ne varie point ne par lumiere ne par ombre.

On dit estre douze diversitez de varietez de ceste planicie et des couleurs : pour ce que aucunes fois elle a fiel noir meslé par maniere de vergettes. Et cestes cy sont celles qui sont es lieux ditz Scatici / Britanici et Hyliaci / et qui naissent es voynes de l'arain / et aucunes macules / et aucines calcedoniques : pour ce qu'elles ont admixtion avecques icelle pierre. Et les meilleurs sont les Scotices. et dient aucuns que celles sont tollues et ostées des nidz des griffons qui gardent ceste pierre par grant cruauté. Et si est ung de Grece qui estoit vray disant et curieux experimentateur : que ceste pierre naist es rochiers qui sont dessoubz l'eau de la mer / et illec est trouvée. Et est aussi raisonnable que es voynes de l'arain elle naisce ne venant point en manifeste substance de l'arain / car elle a la verneur du roil de l'arain.

Les operations de smaraldo.

Quant smaraldus est mise en beuvrage : elle convient contre venins mortiferes / et aux morsures venimeuses / et aux picqueures ayant aguillon. Qui doncquess donnera en beuvrage de sa limature le poix de huyt grains de orge a celluy qui aura prins venin avant qu'il ait fait impression : il le delivre de mort / et ne cherront point ses cheveux / ne ne se escorcheront. Et est ce son evasion. Et celluy qui se acoustume a le regarder il preserve sa veue de empeschemens / et le conserve et garde sain et en bonne disposicion. Et qui le porte en ung anneau : il le preserve de epilencie quant il le porte en son doird avant que epilencie surviengne.

Et pour ceste cause nous conseillons aux roys et enseignons que ilz le pendent au col de leurs enfans incontinent qu'ilz naiscent affin que epilencie ne leur surviengne.

Luy mesmes de l'auctorité Rasis. Taberzet ou feruzegi : c'est a dire smaraldus est convenable aux lepreux quant la limature est prinse en bauvrage. Et si l'aspect du serpent tyrus chiet dessus la pierre smaraldus ses yeulx se dissolvent at luy decouvrent

Dyascorides au chapitre de smaraldo. La pierre smaraldus portée augmente la substance ayant persuasion en tout negoce / corps et parole et les fait chastes et joyeux / et si subvient en tempestes. On grave en icelle pierre une mousche appelée escharbot / et en Latin est appelée scarabeus / et est pertuisée et liée d'une affiche d'or.

folio Clx vue 911

Albert en son lapidaire au chapitre de smaraldo. En noz temps a ceste espreuve que ceste pierre smaraldus si elle est vrayment verte et bonne retient le cohit. Par quoy le roy de Hongrie qui regnoit en noz temps avoit ceste pierre en son doird a l'heure du cohit avecques sa femme / et en icelluy cohit la pierre se divisa et rompit en trois parties. Et pour ce est probable ce qui est dit que ceste pierre incline celluy qui la porte a chasteté. Aussi elle augmente les richesse / et a celluy qui chante donne parolles persusevres. Et quant elle est pendue au col / elle cure lemitrite et les maladies caduques.

Et elle est esprouvé que elle conforte le veue de bile et conserve les yeulx. Et fait bonne memoire et oste la tempeste / et vault a ceulx qui divinent parquoy elle est quise de images.

Chapitre C xiiii De Sagda et sandariso.

Sagda et sandariso. Ysidore. Sagda est une gemme de couleur verte qui est avec les cenaldes. De laquelle la force est si grande que du parfond de la mer elle demande les navires courantes sur l'eaue et si adhere et prent tellement aux carines et ventre dicelles que a paine elle en est separée sinon que la partie du bois ou elle se tient soit couppée et rasée.

Les operations de sagda.

Du Lapidaire. En la mer est trouvée une gemme sut toutes gemmes difficiles. Jamais ne seroit sceue si elle ne se donnoit a trouver. Ceste pierre au parfond et meillieu de la mer est née / et du parfond elle demande les navires passans de region en region / et se prent et adhere en laichant les tables au ventre des navires. Et est tirée au port de la mer des mariniers de ce non scavans. Et est tenablement fichée par sa morsure a la table qu'elle ne peut estre arrachée si non que la partie de la table ou elle tient soit froissée et couppée. Elle a la couleur vert et accroist en la terre et region Caldaïque.

Ydidore. Sandarisus est une pierre qui croist es Yndes au lieu nommé du mesmes nom.

L'espece dicelle est que dedans elle resplendissent gouttes aurées ainsi comme ung cler feu par dedans. Et est chose estable entre tous que d'autant que on approche du nombre des estoilles on peult d'autant approcher du pris de ceste pierre.

Chapitre Cxv. De silenites et sirite.

Silenites et sirtite. Ysidore. Silenites est une gemme qui transluit de resplendisseur blanche et melline contenant l'ymage de la lune. Laquelle les astres demonstrent de jour en jour diminuer et croistre selon le cours dicelle lune. Elle naist en Perse.

Les operations de silenites et sirite.

vue 912

Arnoldus. Selenites est une gemme de Perse de laquelle la couleur est comme de jaspe. Elle garde les mouvemens de la lune. Et quant elle est portée elle cure les languissans et les debiles.

Du livre des natures des choses. Selenites est une pierre belle de couleur / mesmement blanche / rouge veriee et purpurée / laquelle porte le testude de Ynde. De cestes pierres est certain genre qui verdoye comme herbe / et qui porte ceste cy en la bouche on dit que il devine les choses advenir. Et jamais ne se rompt au feu et reconcilie amour entre entre ceulx qui se discordent / et si cure et guerist ceulx qui sont ptisiques.

Ydidore. Sirtites est une gemme ainsi appelée pour ce que elle fut premierement trouvée au rivage des Sirtites en la partie de Lucanie. La couleur de ceste pierre est jaune contenant par dedans estoilles languides et soubz nuyée resplendissantes.

Albert en son lapidaire dit. La pierre selenites est une pierre de laquelle plusieurs choses sont dictes. Aucuns dient que elle naist en ung certain genre de limaçon de Ynde / et estre variée / et dient icelle estre verdoyant.

Et estre plus souvent trouvée es parties de Perse ou en Arabie / ainsi que dit Plinius. Et dient aussi cest pierre croistre la lune croissant et diminuer / la lune descroissant. Et quant elle est portée on dit que elle donne aucune prescience des

choses advenir / si elle portée dessoubz la langue mesmement existant la premiere lune et la dixiesme. Ilz dient aussi que le matin en la premiere lune elle a autant de vertu en la premiere heure. Et la lune estant dixiesme / en la dixiesme heure. Et la maniere de la divination est que quant on la mest dessoubz la langue et on cogite et pense de aucune affaire et negoce se il est convenable de le faire ou non / se il est convenable il tient au cueur et se y fiche tellement que il n'en peult estre oste. Et se il n'est pas convenable de faire incontinent le cueur se desiste de luy. On dit aussi que elle cure les languissans les ptisiques et les debiles.

Et dit aussi ceste chose Ysaac Benjamin.

Chapitre Cxvi De stellario

Stellarius. Enax en son lapidaire. La pierre stellarius est du genre des marbres ayant macules et taches de or. Et dicelle / l'une blanche qui est dicte markasite / et l'autre est ynde clere et celeste et est appellée pierre d'azur. Et aucuneffois la myne porte l'une et l'autre ensemble. Et aucuneffois en y a une autre de couleur verte. Et est appellée pierre crisopasse / ainsi qu'il appert si tu lis le chapitre de la pierre crisopassus.

Chapitre Cxvii. De speculari

folio Clxi vue 913

Specularis. Albert. Specularis est une pierre luisante et perspique a maniere de voirre.

Les operations de la pierre specularis.

On dit que ceste pierre fut premierement trouvée en Seconde une cité d'Espagne. Mais je l'ay veue estre trouvée plus abondamment en aucunes parties de Theutonie / tellement que on en chargeoit les curbes ou ostes. J'en ay veu aussi trouver en Gaulles avecques le gipt car cest une extremité. On le peult trancher en parties tenues / et en peult on faire fenestres comme de voirre / si non que en lieu de plomb il faut mettre du bois. Il en y a de trois manieres / l'une est lucide comme voirre / l'autre noire comme attrament. La tierce est citrine qui est appellée auripigment ou arsenic qui est le plus cler et le plus noble.

Chapitre Cxviii. De sistos.

Sistos. Enax en son lapidaire au chapitre propre. La pierre sistos est de couleur fusque tirant sur le roux / laquelle n'a nulles arestes oblongues ou pinnulles eslevées comme l'alun trenche.

Les operations de sistos.

Enax. La pierre sistos a vertus tres fort constraignante.

Chapitre Cxix De spongia marina. Esponge

Spongia marina en Latin / en Grec trages / en Arabic affegi albach / en Francois esponge.

Serapion au livre aggregatoire au chapitre de affegi albach. Affegi albach c'est a dire esponge / ilz sont deux manieres ou especes d'esponge de mer / c'est assavoir le masle et la femelle / le masle est celle qui a percussures menues et especes et blanches / mais la femelle a cavernes rondes et plus grandes. Aucuns y adjoustent la iii maniere / c'est assavoir qui a en elle dures pierres et plusieurs cavernes / elle est bruslée comme calcedonium. La meilleur est celle qui est la plus prouchaine a son acception / et garde encores en soy de la vertu se evanouyst et se passe et lors n'est pas convenable pour estre aministrée ou mise en oeuvre / s'elle n'est par avant lavée avec nitre ou baurach / ou avec eaue de cendres qui est dicte distillée.

Avicenne au ii livre au chapitre de spongia. Spongia est un corps de mer lasche et rare. On dit qu'elle a en elle une beste de mer a laquelle elle se tient et ne s'en separe point. Celle qui est recente et nouvelle est plus forte et de plus vehemente exsiccation pour la force de la nature de la mer. Elle est chaulde au premier degré et seiche au second. La pierre dicelle est prouchaine et moins chaudes : et est de forte exsiccation par especial quant elle est recente et nouvelle

vue 914

quant elle est bruslée avec huile / et semblablement sa cendre.

Dyascorides. Au chapitre de spongia. Ilz sont deux manieres d'esponges : le masle et la femelle / le masle a petis pertuis / et est espesse et blanche / la femelle a grans pertuis et rondz. On y adjouste la iii maniere qui a en elle des pierres dures et plusieurs cavernes.

Les operations de l'esponge.

Serapion de l'auctorité de Galien. Elle a vertu desiccative manifestement / et pour ce sa vertu est qu'elle consolide les ulceres recentes et nouvelles avec leur sang quant elle est moillie en vin aigre meslé en eaue ou vin selon la diversité des corps. Elle oste le flux de sang qui est venu par incision ou adustion quant on la prent seiche non ayant humidité en soy et qu'elle est imbibée avec aspaltum judaïque ou poix liquide / et qu'elle est mise sur le lieu du flux et qu'on allume en elle du feu. Elle vault pour cauterer / mais la vertu de l'esponge bruslée est resolutive / La pierre qui est trouvée en l'esponge a vertu de deseicher et rompt la pierre quant est causée es rains.

Luy mesmes de l'auctorité de Dyascorides. L'esponge qui est nouvelle et seiche non pas avec la graisse est bonne aux ulceres et resolve les apostumes fleugmatiques. Et conglutine les ulceres nouvelles / et quant on la met avecques vin aigre ou eaue elle encharne les ulceres vieilles quant on en met en icelles avecques miel cuit et qu'elle est mise avec eaue seule / mais des esponges celle qui est subtile et douce ne fait point de aide. Nous usons d'esponge nouvelle seiche lyée en ung drap de lin qu'on fait a maniere de limignon / et quant on la

met es plaies elle ouvre leur orifice quant il est cloz. Et quant on la met seiche es ulceres vieilles et humides ausquelles fluent les humidités. Elle es mise avec vin aigre / et elle soubstient ls menstrues. Et quant elle est bruslée comme on brusle escume de mer elle vault en obtalmie et absterge l'oeil. Et quant elle est lavée apres sa combustion elle en est meilleure es maladies des yeulx et es leurs medicines. Quant elle est bruslée avecques poix elle vault au flux de la marris. La pierre qui est trouvée en l'esponge rompt la pierre de la vecie quant on la boit avec vin.

Avicenne. Quant l'esponge est bruslée avec huile / sa cendre est bonne a la disruption du sang par incision et ouverture / elle est allumée de feu sur le lieu et elle cauterise avec ce qu'elle est substance retenant le sang. D'elle on fait limignons qui sont mis es orifices des voines qui retiennent le sang et le flux de sang. Sa pierre subtilie sans calefaction deseiche et absterge les apostumes fleugmatiques. Et elle est infuse en vin aigre et est mise dessus les playes / et les consolide et rejoint. Et est cuite avecques miel / et consolide les profondes ulceres. Et semblablement est mise la seiche dessus icelles.

Et infuse en eaue ou en vin deseiche les humides ulceres anciennes. Et quant l'esponge est bruslée avec huile / elle est convenable a la cure de la cracheure de sang. Et la pierre en elle trouvée rompt la pierre en la vecie selon aucuns. Mais Galiens dit qu'elle rompt seulement la pierre des rains / car elle ne passe pas jusques a la vecie.

Chapitre Cxx De sordicia

Sordicies parietis balnei en Latin / en Arabicqua basachi.

Serapion au livre du aggregateur au chapitre basacchi de l'auctorité de Galien. Elle est chaulde et adoucist et dissolt.

Les operations de sordici parietis.

folio Clxii vue 915

Serapion. Elle fait naistre les chairs / et est convenable aux scissures qui sont faictes au cul et aux emorroydes quant on la met dessus. Et ce qui est cueilly de l'ordure des corps de ceulx qui labourent / eschauffe et resolve les excitures de dure resolucion / et est couvenable aussi aux ulceres des rains. Et celle qui est cueillie des corps de ceulx qui luittent / est bonne aux neuz qui sont fais en la marris quant on la met dessus. Semblablement elle est bonne a sciatique qui est trouvée es vaisseaulx esquelz l'huylle est bruslée resolve moult et adoulcist. Il dit que l'ordure qui est es corps des luyttans et en ceulx qui se excercitent selon ce qu'il y a de pouldre / l'une est differente de l'autre. Sordes ou ordure universellement resolve les apostumes indigestes / et est bonne aux apostumes chauldes des mammelles. Et pour ce que elle estaingt l'inflammation de icelles. Et empesche le flux des humeurs et resolve ce qui est desja flux en icelles : car elle est composée d'humeur et d'huylle et de l'ordure du corps humain. Mais

l'ordure des vaisseaulx recoit une acuité du vaisseau d'arain qui desja est abeuvré dicelles ordures qui est plus ague.
Semblablement l'ordure de l'oreille vault a l'apostume nommée panaricium.

Chapitre C xxi De silice.

Silex. Ysidore. Solex est une pierre dure ainsi appelée pour ce que le feu sault dicelle.

Les operations de silice.

Luy mesmes au livre xix. Du Grec des siliques le tres bon est le noir en aucuns lieux et les rouges. Les blans sont incorrompus contre l'encienneté / lesquelz gravés pour les mouvemens et sepultures demourent non corrompus / et ausquelz le feu ne peut nuyre. Car diceulx se sont aussi aucunes formes / esquelz l'arain se font. Mais le vert silex resiste souverainement au feu / mais on en trouve pou / et encore peult estre point / et la ou il est trouvé ce n'est pas une pierre. Le pasle n'est point prouffitabile ou pou souvent en ciment. Le silex de fleuve ou de riviere est comme tousjours moiste / Lequel il fault prendre en esté / et ne le doit on point mectre en edifice de maison devant deux ans.

Chapitre Cxxii. De siccino Ambre.

Siccinus ou succinus. Albert. Sucinus est une pierre de couleur jaune que les Grecs appellent electre. On la trouve transluyante comme voirre. Elle a le nom de la matiere / car elle naist du jus ou de la gomme d'ung arbre qui est appelé pin / et en langaige vulgaire est appelé l'ambra.

Les operations de siccino.

vue 916

Albert. Quant il est frotté il attire les feuilles et les pailles et le fil comme l'aymant fait le fer. Aucuns dient qu'elle donne chasteté a ceulx qui la portent. Des choses experimentées est qu'elle enchasse les serpens. On dit aussi qu'elle est bonne pour enfantement legier.

Ysidore. Succinus que les Grecs appellent electrum est jaune / et de couleur de cyre. On dit que cest le jus d'ung arbre / et pour ce il est ainsi appelé mais il est notoire que ce n'est point le jus du peuplier / comme la fable de Pheton dit : mais cest jus de l'arbre de pin. Et quant il est alumé il resplendist et donne lumiere a maniere d'une torche.

Il naist es Ysles de la Mer Occeanne Occidentalle et se condense comme une gomme ou cristal par rigueur ou par le temps. De luy se font pour joliveté aneaulx pour les femmes des villaiges et des champs. Et d'aucuns est appelé arpage / pour ce que quant il est prins par l'attricion des doys et que il est chault il attire les pailles et les fimbres des vestemens / comme l'aymant fait le fer. Du livre des natures des choses. Succinus est une pierre / laquelle vulgairement est appelée l'ambre / laquelle est de couleur jaune et aucuneffoys luyt comme

le voirre. On dit qu'elle donne chasteté a ceulx qui la portent / la fumée dicelle ayde a enfanter et chasse les serpens. La premiere goutte qui vient du pin est moult luisante et pure. Et est celle qui vient en este chault / Mais celle qui vient en autre temps est moult obscure et orde.

Chapitre Cxxiii De sulfure Souffre.

Sulfur. Ysidore. Sulfur / souffre est une terre cuitte par l'action de chaleur / et commuée en essence sulfurée par eaues terrestres et choses ignées qui y passent. Il y a ung autre souffre vif : c'est assavoir qui est estaint ou mort qui est ainsi appareillé artificiellement / et fondu en instrumens de fer.

Avicenne au ii livre chapitre du souffre. Souffre est a chascun congneu / chault et sec jusques au quatriesme degré / lequel est subtiliatif.

Dyascorides au chapitre sulfur. Souffre est congneu a chascun. On le doit eslire vif et cler en couleur resplendissant et luisant sans pierres. Lequel quant il est mis au feu il fait verte couleur / et en painct on. Il croist en Melosda et en Lipparia.

Les operations de souffre.

Dyascorides. Il a vertu de absterger et resolver / et resiste aux venins de mer / et autres semblables quant il est broyé et mis sur la morsure. Il est confit avecques crachat ou urine ou huylle vieille / ou avecques miel ou gluten albotin. Il guerist la scabie ou roigne / et la maladie / en laquelle la peau se eslieve. Et ce est : car il oste ces maladies sans ce qu'il renvoye la matiere au dedans du corps. Il amaine la sanie hors de la poitrine. Et quant on le hume avecques ung ouef frez / ou que on en fait fumée / Il ayde a la maladie de asma. Et quant on en suffumige une femme il fait venir l'enfant hors. Il est meslé avecques gluten albotin ou resine de pin et vin aigre / et lors il est bon a roigne ulcereuse a dertres / a macules et a morphée. Il guerist de elephancie et semblablement avecques resine et vin aigre guerist de la poincture de l'escorpion. Et quant il est meslé avecques nitre et qu'on en frotte le corps il oste demangevement. Il est prins en beuvrage avecques eaue ou ung ouef mollet / et guerist de itericie / cest jaunisse / il est bon aussi a corize. Et quant on le pulverise sur le corps il oste la sueur / et quant on en oingt

folio Clxiii vue 917

sur la podagre avecques nitre et eaue il ayde.

Il aide aussi quant on en fait suffumigacion, a surdité et obtivion. On le mesle aussi avecques miel et vin / et guerist les attricides des aureilles quant elles en sont oingtes.

Avicenne au second livre au chapitre de soulfhre. Il est chault et sec / et est des medicines contre albaras : especialement quant le feu ne luy aura point touché. Et quant il est meslé avecques gomme albotin il eradique les vestiges qui sont es ongles / et avecques vin aigre il est mis sur morphée. On le met aussi sur adustion et ulceracion. Il absterge l'impetige : c'est a dire dertre especialement

avecques gluz / et aussi avecques vin aigre et nitre. On lave de luy le corps pour le demangevement. Il est convenable a podagre avecques nitre et eaue : quant elle en est oingte / et quant on en fait suffumigacion / il restraingt la corrize. Il est administré avec vin aigre et miel sur la constriction des aureilles

Chapitre Cxxiiii. De sale Sel.

Sal. Serapion au livre aggregatoire au chapitre de malkan de l'auctorité Dyascorides. Sal en y a de deux especes. L'ung qui est de miniere / et l'autre qui est de mer. Mais celluy qui est de myniere est le plus fort. Et le meilleur est celluy qui n'a point de pierres / et qui est cler : duquel les parties sont egalles. De celluy de mer le blanc est le meilleur de parties egalles. On en treuve aussi es lieux des eaues qui ne courent point.

Item de l'auctorité Galien. Le sel qui est engendré es estangs de mer est semblable a celluy de mer / lequel sel est fait au pres de la mer. Car quant l'eaue se descroist ou qu'elle se retire au temps d'esté : il se coagule a la chaleur du soleil qui cuit ce qu'il est au rivage pres de l'eaue : et se fait sel. Et ce est le plus souvent pour ce que audit lieu se assemblent eaues ordes qui sont moult chauldes. Et pour ce que l'evacuacion de l'eaue de mer se fait en lieu estroit sa substance est grosse / et sa saveur est stiptique et salée. Mais le sel qui est de myniere est de plus grosse substance et de plus forte stipticité. Sa vertu est chaulde et seiche au tiers degré. Le sel de Sodome cest le sel qui se engendre en la Mer Morte : en laquelle l'eaue est amere / en laquelle se poissons sont gettez ilz meurent. Et est ainsi appelée pour le nom des montaignes qui sont pres icelle mer. Le sel qui est prins de la myniere est moins chault et moins subtil que les autres. Le sel se brusle en cette maniere. Metz le sel en ung pot neuf / et le couvre affin que la salsitude ne ysse du pot pour cause de chaleur du feu / et puis envelope le pot dedans charbons ardans / et le laisse illec tant qu'il brusle et crie / et puis apres oste le du feu. Et peuz discerner la diversité du sel a sa saveur. Et ce pour ce que celluy qui participe a l'amertume se resolve. Mais celluy qui est salé avecques sa resolucion il stiptique et restraingt. Mais le sel qui est bruslé est de plus grant resolucion et moindre stipticité .

La fleur de sel est ague laquelle resolve de forte resolucion. Sa fleur cest l'escume qui est sur le sel. Mais la pouldre du sel ressemble fort a l'escume de sel. Et par adventure resolveroit ce qui demourroit de substance de corps comme sel. Se tu prens poissons vivant et les gette en la mer morte ilz meurent tantost. Tu dois doncques scavoit que ce vient l'amertume qui est en elle qui est ennemie a toutes bestes et plantes.

Les operations du sel.

vue 918

Serapion. La vertu du sel empesche putrefaction des corps qui sont appareillez a pourrir pour l'humidité superflue qui est en iceulx. Le sel de la mer quant il est extendu sur du cuyr et qu'il est mis la rate il resolve sa durté.

Dyascorites au chapitre de sel. La vertu de sel est stiptique : elle absterge mundifie et resolve. Elle oste la chair superflue des ulceres. Elle cauterise et empesche ls apostumes fraudulentos / et si est bonne en medicines de scabie. Elle oste la chair superflue qui croist en l'oeil et siliquefait ou dissoult l'ongle qui se fait en icelluy

Il est mis es clisteres. Il est aussi bon es apostumes des ydropiques. Et quant il est meslé avec huile et vin aigre il appaise le prurit quant on l'oingt au pres du feu jusques a ce qu'il sue.

Le mesme fait il en scabie ulceres et non ulceres en lepre et dertre. Et quant on le mesle avecques miel / vin aigre et huile : et que on en oingt : il vault en squinancie. Avecques huile seulement il est bon en apostumes de la vulve / et des deux amigdales et au cours des humiditez aux gencives. On fait de luy emplastre avecques sanich ordei / costum et miel contre le prurit / et contre la fluxibilité des gencives / et contre les ulceres corrosives. On fait aussi emplastre de luy avecques semence de lin contre la poincture de l'escorpion / et avec organ / ysopé et miel a la morsure de la vipere / et avec poix de alkytran / ou avecques miel a la morsure d'une beste appellée cerastes qui est ung serpent cornu. Et quant on fait emplastre de lui avec miel il resolve les furuncules.

Et quant on le mesle avecques organ et levain il meurist les apostumes fleugmatiques des testicules / et vault a la morsures de la rayne qui est au fleuve de Babiloine. Et quant il est broyé et mis en une piece de lin trempé en fort vin aigre et qu'on le mesle avec / et qu'il soit mis sur la morsure de aucune beste venimeuse il prouffite. Quant il est meslé avecques miel il est bon au sang mort qui est soubz l'oeil. Il est aussi bon a l'empeschement ou nuysement de opium et de champignons mauvais et perilleux. Et quant il est meslé avecques farine et miel : il vault a la concussion des nerfs / et a l'attricion des lacertes. Et est mis sur la combustion du feu / car il ne laisse point venr vecies au lieu. En ceste maniere il est mis sur la podagre / et y est bon. On en fait emplastre et en oingt on avecques ysopé / et lors empesche herisipile et la formice que ilz ne se accroissent point au corps.

Quant il est meslé avecques huile il provoque la sueur / et quant on le prent en beuvrage avecques vin et eue il lasche le ventre / mais il est mauvais a l'estomach.

Chapitre Cxxv De sale armoniaco Sel armoniac

Sal armoniacum. Serapion. Sal armoniac est blanc et rouge / lequel est tyré de pierres cleres et dures. Il est sale et moult mordificatif. On l'apporte de corasceni / lequel est ou a plusieurs couleurs. Car il en y a qui est le meilleur. Et est celluy qui entre es medicines / lequel est chault et sec au quart degré.

Les operations du sel armoniac.

Serapion. Il est abstersif de grosses humeurs. Il absterge / lave / et vault a la cheuste de la vulve / et en squinancie. Il diminue la blancheur des yeulx et la maille.

Chapitre Cxxvi de sale alkali

folio Clxiiii vue 919

Sal alkali.

Les operation de sal alkali.

L'acteur. Sal alkali ou alkal se fait en cette maniere. Prends de l'herbe appellée alkal autrement usuen / et faiz en terre une fosse grande et l'emplys de la dicte herbe quant elle est nouvelle. Et quant icelle herbe sera bruslée : laisse estaindre le feu et refroidir la cendre. Quant ladicte herbe sera bruslée metz de l'autre dessus en faisant ainsi jusques a ce que la fosse soit plaine / laquelle herbe bien bruslée laisse estaindre le feu et refroidir la cendre. Apres descouvre la fosse qui est soubz la cendre et tu trouveras ung sel noir petrifié ou coagulé en grant monceau ou pieces au fons de la fosse qui est appellé sel alkali. Lequel vault a tout comme le sel armoniac.

Chapitre Cxxvii. De sale yndo

Sal indus. Amicenne au quatriesme canon folio en i de l'asperité de la langue dit. Sal yndus est en couleur de sel et douceur de miel. Et est succré qui est congelé sur la canne de miel en Ynde comme sel. Au lieu de luy on met succre candy. Lez zucarum au traicté premier des herbes au chapitre derrenier.

Ensuyt de la lettre T.

Chapitre Cxxviii De Trachio.

Trachius. Enax en son lapidaire. Trachius est une pierre noire trouvée en la riviere de Pontho qui estes parties de Egipte.

Les operations de Trachius.

vue 920

Enax. Trachios a ses vertus comme gagates. Et est dit qu'elle se allume d'ung petit d'eaue / mais elle s'estaint de l'oeil.

Ce mesmes semblablement dit Albert en son lapidaire au chapitre propre.

Chapitre Cxxix De tartaro Tartre.

Tartarus. Bartholomeus au livre des proprietés des choses. Tartre est l'ordure du vin qui est en maniere de terre molle endurcie entour les parties du tonneau / duquel la nature est chaulde et seiche au troisesme degré.

Les operations du tartre.

Luy mesmes. Il vaut contre roigne / serpigo et impetigo qui sont roignes seiches comme dertres. Aussi contre les immundices de la teste. Il a vertus de extenuer / consumer mundifier et lascher.

Chapitre Cxxx De terra sigillata Terre scellée.

Terra sigillata en Latin, En Grec lemmia fragidos. Et en Arabic Teumacon ou humatum.

Serapion au livre de l'aggregateur au chapitre Teumacon de l'auctorité de Dyascorides. Teumacon cest terre scellée / et est le seau marin et le seau laycé / et est une des terres de almayum / et plusieurs d'eslutz / C'est a dire boes sont a icelle semblables. Sa couleur es semblable a mogre mais elle est discernée de icelle. Car quant on la touche aux doidez elle ne si tient point comme mogre. Elle a de la viscosité en elle ung petit : en laquelle se font impressions de seaulx et almayum. La couleur de toutes est rouge / mais celle qui est la vraye est prise d'une terre fundeuse ou il n'y a ne arbre ne herbe ne pierre. Elle est doncques prise de icelle miniere : dessus laquelle on met eaue jusques a ce qu'elle soit dissoulte et espessie. Et est broyée et remouvée de forte agitation jusques a ce qu'elle soit rassise.

Et lors soit separée l'eaue qui nage dessus doucement. Apres soit cueilly ce qui est gras et visqueux / et getté hors ce qu'il y a de pierres au fons du vaisseau / puis soit mis ce gras a seicher jusques a ce qu'elle soi comme cire molle. Ainsi soit divisée par petites pieces de laquelle on fait troscis qui soient scellées / et seichez en l'ombre jusques a ce que l'aquosité se departe et que la desiccacion soit accomplye.

Les operations de la terre scellée.

Dyascorides. Elle a en sa substance une aigreur et ung petit stipticité. Sa vertu **folio Clxv vue 921**

et de deseicher sans mordification. Elle guerist des ulceres fraudulentes quant elles seroient fraudulentes. Et quant elle est confite avecques vin aigre et faicte comme boe et mise sur les playes nouvelles et qu'on luy laisse ainsi elle les conglutine / et guerist aussi les vieilles ulceres. Dissoubz le avecques ce que tu verras estre plus convenable a la necessité comme avecques vin aigre meslé avecques eaue ou avecques secaniabim ou vin ou melicrat / car elle ayde manifestement a ceulx qui ont ulceres es intestins avant qu'elles soient pourries en faisant ung clistere dicelle.

Et apres que aura precedé le clistere avecques eaue de myel et puis eaue de sel / en apres avecques jus de plantain soit donné en beuvrage avecques vin aigre fort meslé avec eaue.

Et convient a la morsure de la serpent. Tyrus et autres bestes venimeuses / et du chien enraigé quant elle est beue avecques vin attrempé avecques eaue. Et aussi quant on en fait oingture avecques vin aigre dessus le lieu de la morsure. Et

convient semblablement que toutes les morsures des bestes venimeuse soient oingtes. En apres mys dessus la playe fueilles de la petite centaure / et apres ce les fueilles de pradium. Et la medicine qui est prinse de terre sigillée et graines de genievre en laquelle est meslée une petite quantité de boly armeni quant il est beu dicelle / celluy qui craint le beuvrage venimenx empesche sa nuysance par icelle. Et la prennent en beuvrage ceulx qui ont ja prins medicine venimeuse quant elle est encores en leur estomach. Et elle provoque le vomit et expelle la nuysance dicelle et le delivre de mort.

J'ay este expert en ceulx qui ont beu cantarides et le lievre marin. Car je leur ay donné en beuvrage de ceste medecine et les ay incontinent fait vomir / et ilz evaderent ne n'ont point souffert de inconveniens mauvais du venin diceulx Et de rechief Dyascorides au chapitre de terre scellée qui commence. Lennia fragidos selon la translation Grecque. Cest une terre de la region noun clavicace qui est orde etc.

Et luy mesmes selon la translation Arabicque. en la terre scellée est vertu que quant on la prent en beuvrage elle resiste aux medicines mortiferes et a tous venins par forte contrarieté. Et quant aucun en boit et apres il prengne une medecine mortelle elle le fait yssir par vomissement et ne luy nuyst point. Elle est aussy bonne aux morsures et poinctures des bestes venimeuses / laquelle entre en la confection de plusieurs medecines composées.

Luy mesmes Serapion de l'auctorité Alcauzi. Terre scellée est bonne quant on pulverise dicelle en la bouche de laquelle le sang flue / car elle le restraint tantost et n'est point de medecine qui restraigne toute maniere de flux si non ceste.

Luy mesmes de l'auctorité de Paul. Quant on la met sur combustion de feu elle ne souffre point au lieu venir vessies. On donne aussy dicelle en beuvrage apres la cheuste quant les membres interiores en sont blessez / car elle adoulcist les membres apres la cheuste et percucion et attrition et les empesche d'apostumer. Et s'il y a solucion de continuité elle les consolide / et est des meilleures medecines que on puisse avoir contre venin.

Paulus au chapitre de terre scellée. Elle est chaulde et seiche.

Avicenne au livre des forces du cueur. Terre scellée est de attempée complexion en chaleur et froideur conforme a la complexion humaine si non que sa seicheur est plus grande que sa moisteur. Car elle a vertu merveilleuse de conforter le cueur.

Chapitre Cxxxi. De tegula Tuylle.

vue 922

Tegula en Latin / en Grec Tuylle / en Arabic casef. Serapion au livre aggregatoire au chapitre casef de l'auctorité de Dyascorides. Casef / cest tegula / c'est a dire tuylle.

Les operations de tegula.

Tegula athanor / tuilles de four quant elles sont bien bruslées ont vertu cauterizatine. Et pour cette cause quant elle est meslée et que on oingt avecques icelles : elle prouffite au prurit et a bothor et a la podagre. Et quant on la mesle avecques les cerotz elle resolve les apostumes dures et les scrolhules. Et luy mesmes de l'auctorité de Galien. La vertu des tuylles est abstersive / et par especial la tuylle de athanoz / c'est a dire de four. Sa vertu est qu'elle abserge et deiseche / especialement celle qui vient de four qui est plus forte que les autres. Et pour ceste cause elle est mise en oingnemens qui sont appelez manifestas. Et est ung oingnement auquel entre cest maniere de tuylle tres bonne medecine pour consolider et encharner les ulceres.

Chapitre Cxxxii. De thopazio.

Thopazio. Albert. Thopazion est une pierre ainsi appellée du lieu de sa premiere invention / lequel on appelle Thopazis et est une Ile : et pour ce aussi qu'il a la semblance d'or. Ils sont deux especes de ceste manieres de pierre : desquelles l'une est du tout semblable a l'or qui est moult precieuse / laquelle tient pour le plus couleur jaune que d'or / et est ceste la plus prouffitable.

Les operations de la pierre topasse.

Albert. Il a este esprouvé en nostre temps que si on met la main en l'eaue bouillant en laquelle ladicte pierre soit mise ainsi qu'elle este apportée : elle a ceste vertu que on en tirera la main sans aucune lesion. Et ce faisoit a Paris l'ung de noz compaignons. Aucuns aussi dient qu'elle vault contre la emoptoque et luppaire passion. Il est certain que ceste pierre est comme ung miroer et represente la semblance du corps qui est imprimé a la veue comme le miroer. Ceste pierre naist en ornicho / laquelle si aucun tient en la main dextre contre le soleil elle envoye raidz et hume le feu tellement que ceulx qui ce voyent se esmerveillent. Et celluy qui la portera a l'environ de son bras senestre il desprisera toutes compaignies. Par ceste pierre les locustes et les gresles sont ostées des fruitz / et si oste et appaise l'ardeur de luxure.

Aristote. Quant la topasse est mise sur la playe d'ung homme son flux cessera. Et est cette pierre telle que se elle est pendue dessus ung vaisseau plain d'eaue bouillante / ses bouillons cesseront.

Du livre des natures des choses. La topasse qui a la couleur semblable a or cest la plus precieuse / mais l'autre espece est plus resplendissant : et de couleur plus subtile / mais elle est pire. Ceste pierre cy nommée topasse entre les autres vertus que elle a on dit que elle restraint ire et luxure.

Chapitre Lxxxiiii.(en réalité Lxxxiii)

folio clxvi vue 923 De torchois

Torchoys et thogolitus. Arnouldus. Torchoys est une pierre :de laquelle la couleur est un petit bleue et tournant a blancheur ainsi dicte de la region de Turquie en laquelle elle est trouvée.

Les operation de torchois.

Sa vertu est de garder la veue saine. Pareillement quant on la porte sur soy elle deffent des choses nuisibles par dehors / et tant que l'homme la portera sur soy elle rend joyeux.

Albert. Turchois est une pierre de couleur flave et pasle de vert luisant / comme le laict avoit penetrer en couleur flave et qu'il passe par luy a la superficie. Elle n'est point perspicue ne rare.

On dit qu'elle conforte la veue et qu'elle garde celluy qui la porte de fortunes nuisibles et de cheustes.

Solin. Thogolitus est une pierre semblable a ung noyau d'olive / laquelle on ne prise point quant on la voit : mais elle surmonte la vertu des autres pour ses bons remedes. Car quant elle est broyée et veue ou humée elle allege la douleur de la pierre des rains et de la vecie.

Chapitre Cxxxiiii. De tuthia Tuthie

Tuthia. Serapion au livre aggregatoire au chapitre thutia.

Tuthie : dicelle est aucune qui est faite es fournaies dedans lesquelles l'arain est citrine / et est cueillie et mise en garde : mais de celle qui est faite es minieres sont trois especes car l'une est blanche et l'autre est verte / et l'autre est citrine embeue de rougeur. Et les minieres de Tuthie de Ynde sont es rivages de la mer pres la region de Inde. Et la meilleur dicelles est la blanche : laquelle quant on la regarde il semble qu'elle ait sel sur soy. Et apres celle est la meilleur la citrine. Mais en celle qui est verte y a asprete et est pertuisée / et est apportée des lieux maritins. Et celle qui est blanche est la plus subtile de toutes les especes de tuthie / et la verte est la plus grosse / c'est assavoir celle qui a pertuis. Dyascorides au chapitre de tuthia. Ilz sont dicelle deux especes. L'une est blanche et legiere / et l'autre est moins legiere que ceste. Et est engendrée la tuthie quant on prend la cathiminie et est pulverisée dessus l'arain ou cuyvre en sa citrinité / et est mise dedans luy icelle cathiminie affin que il soit fait cler citrin. Et doncques de la cathiminie est eslevée une fumée qui se adhere aux parois : et cest tuthie. Et n'est pas la tuthie seulement pour cause de la taincture de l'arain / mais est sans cette chose : et peult estre faite de cathiminie sans la citrinité de l'arain. La meilleur dicelle selon Serapion est celle qui est faite en cypre / laquelle quant elle est

vue 924

arosée de vin aigre elle gecte l'odeur de l'arain : de laquelle la couleur est semblable a la couleur de resine et sa saveur semblable a la saveur de boe. Et quant elle est mise dessus les charbons ardans ses parties se agrent et assemblent / et est faicte sa couleur semblable a la couleur de arain. Et quant elle est touchée elle n'a point de asperité et est legiere. Il convient certes que toutes ces choses soient trouvées en elle / autrement elle n'est pas bonne.

Et est la tuthie lavée de ceste maniere. Elle est prinse seiche ou mixtionnée avecques eaue et est mise en une piece de drap linge qui n'est pas rare : et est mise en eaue de pluye et est la piece remuée en l'eaue. Et ce qui est bon de la tuthie esleue et le plus subtil yst de la piece en l'eaue / et ce qui est ord et gros demeure en la piece / et apres ce laisse le rasseoir. Puis gecte l'eaue avecques la tuthie en ung autre vaisseau net / et ce qui demeure au fons qui est gros et areneux oste le / et laisse clarifier l'eaue et la gecte legierement. Et puis apres de rechief metz dessus la tuthie autre eaue et la remue et fais comme devant / et fais ceste chose si longuement que il n'y demeure riens ord ne areneux / et que l'eaue demeure clere. Et quant tu auras ce fait gecte l'eaue et deseiche la tuthie. Et sont aucuns qui dissolvent la tuthie en eaue tant qu'elle soit faicte comme myel / et puis la mectent en une piece de lin dessus ung vaisseau : et se coule dicelle ce qui se peult couler / et restraingnent ung pou la piece affin qu'il en ysse plus largement / et gecte dessus icelle moult de eaue et la remuent / et ce qui nage dessus en la superficie de l'eaue ilz concueillent avecques laine / et est ce qui nage la graisse. Ilz la mectent apres en ung vaisseau neuf et nect et en apres quant ilz meuvent ce residu par legiere motion ilz le gectent en ung autre vaisseau / et ce qui demeure au fons ort et areneux ilz ostent et degecent / et font ceste chose souvent tant qu'ilz ne demeure riens de larene. Et semblablement est lavée la tuthie avecques vin et est celle qui est lavé avecques vin plus stiptique que n'est celle qui est lavée avecques eaue.

Les operations de la tuthie

Dyascorides. La vertu de la tuthie est stiptique / insrigidative. Elle remplist de chair les ulceres et conglutine les desiccatives. Elle est de petite desiccation. Et qui veult rostir et brusler la tuthie si la broye de forte contricion et la confie avecques eaue et en face trocisces et les mecte dessus une tuylle : et les mecte dessus des charbons ardans / et tourne les trocisses continuellement tant qu'ilz soient deseichéz et soyent fais rouges. Et saches que aussi il est prins Tuthie d'or / de argent et de plomb. Et celle qui est prinse de plomb est la seconde en bonté de celle qui est faicte en cipre. Aucuneffois nous avons a faire de tuthie et n'en povons trouver / mais nous scavons medicines equivalentes en bonté et semblables a la vertus dicelles / lesquelles nous voulons icy enseigner / et la maniere dicelles et comment elles se font . Pren des feuilles de myrte avecques les feuilles et graisses dicelle nouvelles et fresches ainsi qu'elle sont et les metz en ung vaisseau de terre crue et couvre le vaisseau d'ung couvercle qui ait moult de pertuis : et le metz en ung four a potz ou a tuylles. Et quant la terre du vaisseau sera cuyte romps le vaisseau en testz et prens ce qui est dedans / et le

metz en ung aultre vaisseau de terre crue : et le metz de rechief en la fournaise comme devant et le laisse cuyre / et puis extraitz ce qui est dedans le vaisseau : et lave cette cendre ainsi que est lavée la tuthie / et en use.

Et est aussi ceste chose faicte des fueilles et summites des oliviers par une mesme doctrine et facon. Et par especial des oliviers champestres.

Et est faicte de citonies apres qu'elles sont couppees par pieces et sont ostées les semences / et aussi de galles et de meures blanches non matures et deseichées au soleil et des summitez de l'arbre grani verd / et des fleurs de la vigne champestre : et des summites de l'arbre de mastic. Et aucuns prennent les fueilles de l'arbre nommé figuier et les deseichent au soleil / et font ainsi que nous avons dit.

La vertu de la tuthie lavée est seiche / et est plus desiccative que toute medicine et entre en sieff avecques lesquelz sont curées et gueries les maladie des yeulx.

Et est une des meilleures et plus prouffitables medicines avec lesquelles nous **folio Clxvii vue 925**

curons les ulceres qui se font au fondement et la verge et en la peniliere / et deseiche les humidités qui viennent a l'oeil / et les enpeche de venir et entrer estuniches dicelluy.

Ensuit de la lettre U. (et V)

Chapitre Cxxxv. De Varax et venix Sang de dragon.

Varach et venix. Ysidore. Varach ou sang de dragon est pierre selon Aristote. Et selon les medicines / sang de dragon est le jus d'une herbe de couleur tubente ainsi qu'il appert dessus au traictie des herbes au chapitre CCCC.xxii en la lectre de S.

Les operations de Varax et Venix.

Sa vertus est contre ung chascun flux / et par especial le flux de sang / et est fait algala de luy et de vif argent.

Ysidore. Venix est une pierre de Armenie qui est de couleur tirant sue le blanc / elle vault contre melancolie.

Et aussi contre le vice de la rate et du foye / et la passion cardiaque / et a toutes fantastiques vision.

Chapitre Cxxxvi De vegetana et unio.

Vegetana et unio. Ysidore. Vegetane est une gemme ytalique / trouvée des Vegetains / et est noir de face / reluyante de taches et notes blanches.

Les operacons de unio

Du livre des natures des choses. La pierre unio est en l'Isle de Casue ainsi dicte / pour ce que en vertu et noblesse est unique. Ceste pierre est tant unie et

continue que en elle il n'appert nulle division de voynes ou escailles / mais elle plaine en maniere de glace. touteffoys naturellement elle se ouvre contre la rorée du ciel et la recoit en soy / et la retient autant de temps que la femme porte en son ventre son enfant. Et adonc ce temps pendant par si longue demoutée cette rorée ja convertie en pierre elle degecte et expelle quasi comme son faon / et apres de rechief elle clost son ventre / tellement qu'en icelluy il ne appert nulle trace ne vestigie de division. Touteffoys oultre ceste foys elle ne se ouvre jalais en la maniere dicte. Mais au matin elle est dessus la mer / et illecques recoit la rorée du ciel / et puis apres descend au fons de la mer / et illecques receue elle convertist cette rorée qui est en elle en pierre.

Du Lapidaire.

vue 926

Des conches marines est ostée une espece de gemme qui est a memoire dicte unio / pour ce que elle seule est tollue de ung / et n'en sont jamais trouvées deux ou plusieurs ensemble / de laquelle pour son aornement la forme candide est louée. Et si elle est convenable / elle convient en vestemens et robbes / comme elle ne soit point moindre que or . Les conches en certain temps la reservent en beant et ouvrant la bouche / et en attrapant et beuvrant pour pasture du ciel les supernes et haultes rorées. Desquelles sont conceupz les orbicules c'est a dire petites choses rondes / reluysantes et blanchissans. Et est faicte ceste pierre plus clere de la rorée du matin : car la rorée du vespre a coustume faire faons noirs et obscurs. Et les jeunes conches donnent les gemmes plus blanches. Et l'aage plus grant des conches noircist et obscure leurs concevemens. Et tant plus qu'il aura esté beu et attrait plus grande rorée / et tant plus grande la conception engendre la gemme / et ce oultre la moitié d'une once / mais nulle n'est cuydée croistre. Et si les tonnoires tempeste en hault et font bruit avec choruscacion / les conches se deffient et deffailent / et par soubdaine paour se recloent. Et ainsi elle deperist la conception qu'elle avoit encommencée par attirer et boire la rorée. Et est fait advortum ce qui de ceste chose estoit commencée croistre. La mer de Yndre engendre pour proye nobles gemmes. Et l'ancienne Bretagne aussi engendre gemmes magnifiques.

Chapitre Cxxxvii. De Vesica Vecie.

Vesice et molaris. Avicenne . La pierre de la vecie est celle qui est engendrée en la vecie.

Et dit luy mesme Avicenne au second livre au chapitre propre. Aucuns on dit que la pierre de la vecie prinse rompt la pierre des rains et de la vecie.

Mais Galien dit qu'il n'est riens de ces choses.

Item Avicenne. La pierre molaire est cogneue a tous / et est stiptique / par quoy le medecin en use aux choses qui ont necessité de stipticité. etc.

Chapitre Cxxxviii. De viride eris Vert de gris.

Veride eris ou eris erugo : en Latin / en Grec aeris erugo / en Arabic ziniar ou heas erugo. Dioscorides au chapitre aeris erugo. L'une est rascia / l'autre granata / grenaillee quant a ceulx qui cherchent l'or en terre. L'autre est appellée vermiculeuse pour la similitude de sa forme / l'autre confestibilis / et l'autre fossibilis ou folloya.

La rascia se fait en cette maniere. Prends ung vaisseau qui ait la bouche egalle avec son couvercle : auquel tu mesteras vin aigre treffort / et squames d'arain ou de cuyvre de cypre tres bien purgées. Lasquelles tu prendras audit vaissel qu'elles ne touchent au vin aigre / en l'estouppant si bien qu'elle respire point et qu'il n'ait point d'air / lequel vaissel tu ouvriras x jours apres / et raseras ce qui **folio Clxviii vue 927**

tiendra aux squames que tu reputeras pour roeil d'arain.

Il y a une autre confection qui ce fait ainsi. Tu mestras vinaigre treffort en ung vaisseau d'arain ou de cuyvre / lequel tu couvriras d'ung autre vaissel d'arain / mais il vault mieulx se le vaissel est concave et egal / lequel tu estoupperas comme dessus / et dix jours apres tu raseras ledit vaissel / et cueilliras ce qui sera audit vaissel.

Il y a la tierce confession en ceste manier. Fais lamine de cuyvre que tu mectras en ung vaissel ou il y aura du vin aigre / tellement que le vin aigre ne touche point aux laminés en l'estouppant comme dessus / puis cueille ce qui y sera. Ce mesme pourras faire en marc de rasins quant il commence a seicher en mectant lamine sur le marc / et en cueillant dix jours apres. Il le fait aussi de limeure en ceste maniere ; car on mect fort vin aigre en ung vaissel / lequel on remue dix fois le jour avec la dicte meslée audit vin aigre / et ainsi il est fait et apres cueilli.

On dit aussi qu'il vient es metaulx. Il y a une autre maniere de vert d'arain de cypre que on trouve sur l'arain / ung autre qui se distille es fosses. Celluy qui est distillé dessoubz l'arain / il en y a bien pou / mais le bon qu'il distille est blanc et noir. Il est aussi adultere de plusieurs choses avec luy mixtionnées / c'est assavoir punica / ou marbre broyé / ou calcantum quant on le frotte des deux doys l'humeur touchée / et se il a marbre blanc ou punice il ne se dissouldra point / et se il a calcantum / il se noircist es doys. Ilz sont deux genres de enroilleure vermiculeuse. L'ung genre est qui est extrait et fouy de terre. et l'autre qui est ainsi composé et fait. Metz en ung mortier de cuyvre du vin aigre blanc treffort environ demye cotile / cest environ troys hanaps / et le broys tant qu'il se espessisse. Et puis apres metz y troys dragmes de stiterie ronde / et de tres bon sel de mer / et de sel nitre autant d'ung que d'autre en poix egal / et le broyé es jours caniculaires tant qu'il espessisse et face couleur de roil / et faiz ainsi les vermicules. Et si tu veulx qu'il ysse cler et lucide / metz en une partie de vin aigre et deux parties de vieille huylle / et toutes les choses devant dictes egallement. Et sont plusieurs qui prennent le roil ou erigine tasée / et gomme meslée avecques font vermicules et le vendent / mais elle est inutile. Les

confessions de erugine ont la vertus de esustum / mais plus forte. Et de toutes est la meilleure celle qui est fouye et traicté de terre. Et la seconde est celle qui est rasée. Et la tierce est celle qui est confite et composée.

Bulcasim au livre qui est appellé servitor. Ilz sont plusieurs qui adulterent ziniar / c'est a dire vicide eris / avec plusieurs choses / ainsi comme avecques punice et marbre broyés. Et sont aucuns qui le meslent avecques calcantum. Et qui veult congnoistre celluy qui est adultere avec punice et avec marbre / moille sa main en eaue et la met dessus luy / car incontinent il se dissouldra. Et plusieurs sont qui le maschent avec les dens / et ainsi apparcoivent les pierres. Et est discerné celluy qui est adultere avec vitriol en mectant en une lamine de fer sur le feu. Et se il contient aucune chose du vitriol quant il sera bruslé il se fera rouge / mais celluy qui n'est point adultere demeure en sa couleur et en sa figure. Et le meilleur dicelluy en noz pais et quartiers est celluy qui est le plus vert et de plus forte odeur bruslans le goust de forte operacion.

Les operacions de viride eris.

Dyascorides. Toutes erugines ont vertus stitique et termantique. Elles ostent l'obscurté des yeulx / et prouvocquent les lacrimas. Elles attenuent les cicatrices des yeulx / elles curent les playes paissantes / et les conservent sans enfleure. Et quant il leur est adjousté miel et huile et cire / ilz ostent les cicatrices. Et une goutte de armoniac meslée / guerissent les plaies sordides ou ordes / et quant ilz sont faiz comme collire ilz curent les fistules et endourcissent les cicatrices ilz amolissent / et sont adhibées tres utillement aux gencives pourries et chacieuses. et quant il y a du miel avec eulx meslé / ilz attenuent les paulpieres quant elles en sont oingtes. et quant resine / tormentine / esustum et nitre y sont meslés / elle cure les lepreux / et medecine les fistitules quant il y est adjousté sel armoniac / et avecques miel cure les grosses et aspres paulpieres. Elle est en ceste maniere bruslée. Metz en une paesle ou autre vaisseau propre petites pieces de erugine / et la metz en charbons ardans tant qu'elles facent couleur de cendre / et puis apres quant elles seront refroidies si en use. Et sont plusieurs qui les mectent en ung chaulderon ou vaisseau

vue 928

de terre cru. / et les bruslent ainsi.

Bulcasin au livre appellé Servitor. Ziniar / c'est a dire viride eris est bruslé en ceste maniere. Prends ziniac et la metz une paesle de terre sur le feu / et la remue et mesle tant que tu voyes ses couleurs muer / car elle tourne a la couleur de tuthie / et puis oste la du feu et la laisse refroidir / et puis la racueille et la garde et en use.

Et ayes de ziniar qui se engendre es minieres en l'Isle de Cypre. Celluy qui apparoist dessus aucunes pierre est pou. Et certes celluy qui est trouvé es minieres est en plus grande quantité et de belle couleur. Mais il ne pas bon pour cause de trop grande quantité qui luy est meslée des pierres.

Chapitre Cxxxix De vitro Voirre.

Vitrum. Pline au xxxvi livre. On dit ceste naissance esté premierement du voirre. Le Phenix de Syrie a ung paluz ou marestz qui est nommé candebra / duquel est creu naistre le fleuve Belus qui flue par l'espace de v. mille pas en la mer pres pthlemay de colonie flexible . Cestuy fleuve court au lieu dit Calubris Potu / mais le fleuve sacer ceremonü qui est limonneux et profond ne souffre pas le cours a ce flux / si non les arenes de la mer repulsées / lesquelles par la volente des undes les ordures ostées resplendissent. et aussi est creu ce flux fleuve estre retrainst par la mer qui mort contre luy. Et est l'espace du rivage de v cens pas et non plus. Et par ceste chose tant seulement en engendrant et les undes flottant par moult de temps fut fait de l'arene voirre etc.

Du livre des Vapeurs. Le voirre est aucunesfoys fait de plomb et terre subtile sans cendre de fougere ou de foin. Car le plomb aucunesfoys est evaporant et aucunesfoys congluant. dont meslé avecques terre subtile / il conglue cette partie de la terre / et dissoult en partie par l'action de chaleur et pouldre meslée avecques terre subtile. Il prent de la terre seicheresse et desiccacion. Aussi le voirre est fait de la cendre de l'herbe espineuse qui naist au rivage de la mer . Et dient aucuns que ce sont tribulins marins / mais cest fault / mais est appellée l'herbe de voire.

Les operacions du voirre.

Serapion au livre aggregatoire au chapitre cugeg. Cugeg / c'est a dire voirre. L'ung est pierreux et l'autre areneux. Et quant ilz sont enflambez et on mesle avecques eulx la pierre magnes leur corps se coagule pour cause de la plombéité qui est en eulx. La vertu du voirre est chaulde au premier degré et seiche au tiers. Et entre en plusieurs cohol / et oste les furfures de la teste / et adoulcist les cheveulx et la barbe. Et quant il est broyé et est beu avec vin blanc et subtil il rompt la pierre en la vecie.

Et luy mesmes de l'auctorité Aben Mesuay. Il est chault et sec / et est bon au polmon / et a la cheuste des cheveulx / et sont plusieurs couleurs de voirre : car aucun est blanc de forte blancheur comme cristal / et est meilleur que les autres . L'ung est rouge / l'autre citrin / l'autre vert et l'autre de couleur d'azur / et dit on que le voirre est une pierre la plus fole des autres pierres

Et est entre les pierres ainsi comme ung fol entre les hommes : car il s'encline a toute taincture / et est de facile dissolution au feu / duquel extraict bien tost se fait pierre et se coagule.

Ysidore au xxix livre. Le voirre est aini dit / pour ce que la veue par sa perspicuité transluyt / et aucunement close apparoist. Il est cuyt de boys legier et sec / et adjousté cipre et ni-

folio Clxviii et non Clviii vue 929

tre / et en fournaises continuelles est fondu comme arain / et de ce en sont faictes masses . Et apres de rechief dicelles masses est fondu en officines et vaisseaulx / et l'ung est figure par souffler / et l'autre est tornoie par tour / et l'autre est

entaillé en maniere d'argent. Il est aussi taint en moult de manieres si que il vainct les jacinctes et saphirs vers et les onices / et les couleurs des autres gemmes. Et n'est point autre plus convenable matiere pour les miroirs ou a pincture plus accommodable. On dit que ou temps et soubz Tyberius Cesar aucun artiste excogita l'attrempance du voirre que il fust flexible et maleable / lequel comme il fust envoyé a Cesar luy porta une fiole de voirre / lequel Empereur desplaisant et indigne la getta contre le pavement. Et l'artiste leva la fiole de terre laquelle s'estoit plaiée ainsi comme ung vaissel d'arain. Et apres tira de son sein ung petit marteau et amenda la fiole. Et ceste chose faicte Cesar luy dist. N'y a t'il point autre qui sache ceste conditure de voirres. Et l'artiste en jurant dist que il n'y avoit nul autre que luy qui le sceult. Et adoncques Cesar le commanda estre decollé. Affin que cette chose cogneue on n'eust pas l'or pour hoc / et fussent les pris de tous metaulx abstraictz et desprises. Et certes si les vaisseaulx de voirre ne se compoient point ilz seroient meilleurs que or ne argent.

Le Philosophe. Le voirre transluist par perspicuité laquelle chose n'est pas es metaulx. Et ce qui est en icelluy enclos soit liqueur ou autre chose apparoist par dehors / et n'est pas de porosité. Car adonc que les splendeurs frappent sur le voirre painct comme il ne soit point es pores la pincture venant a l'oeil apparoistront selon similitude de la pincture de la fenestre par laquelle elle frappe. De laquelle chose voyons souvent l'opposé. Le voirre est fait de terre et herbe et pierre et plante. Il est aussi fait de cendre de foin et de fougier. Et aussi aucunefois par l'admixtion de plomb, et aussi du blanc de l'oeuf cuit.

Avicenne. Le voirre est entre les pierres comme le fol entre les hommes anisi que dessus est dit. Car il decline a toute taincture / et est rompu et decoupe avecques luy, cest asavoir impersonnellement. Il est chault au premier degré et sec au second. En luy est stipticité et subtilité. Il absterge les dens et l'oeil et oste sa blancheur / et munde les furfures de la teste quant avec luy est faicte ablution. Il fait croistre les cheveulx quant il est meslé avec huile sambuc et on en est oingt. Et quant il est bruslé il est plus fort. Et ce qui est de luy broyé et bruslé proufite moult contre la pierre de la vecie et des rains quant il est beu en vin.

Constantin au livre des degrés. Le voirre est chault au premier degré et sec au tiers. Il est utile en moult de collires et vault contre dertres. Il oste les furfures et subtilie les cheveulx. Et quant il est broyé et beu en vin il rompt la pierre de la vecie.

Le Plateaire. Le voirre est froit au premier degré et sec au second. Il est fait de luy oingnement qui est bon contre roigne. Il est bon aussi a la gratelle appellée serpigo. Mais sa pouldre avec terebentine ou gomme de pruniers resolute en eaue au feu soit confite et de ce la partie en soit oingte. Il est fait voirre de terre / et aussi est fait de herbe.

Du livre des natures des choses. Se le voirre est diligemment broyé et est beu avec fort vin il rompt les pierres qui sont es rains et les degette. La pouldre du

voirre mise au tronc dedans l'escorce de l'arbre sur lequel les corbeaulx ou corneiles font leurs petis poucins jamais leurs oeufz ne se ouveront pour issue de leurs poucins. Et aussi la chair est plus tost cuite quant on met pieces de voirre de une chacune matiere de voirre / mais il se fait plus tost se le voirre est de cendre de fougere ou de foin.

Rasis au livre des Aluns. Le voirre est des parties de mercure et vinqant sur nature y est froideur et seicheresses. Il fait fondre le fer et tous corps et les fait courrir en fusion. Et si tu gettez quelque couleur que tu voudras sur le voirre en sa fonte il la retiendra.

L'Alchimiste. Le voirre est entre les pierres ainsi qu'est le fol entre les hommes. Car il recoit toutes tainctures. Il est bien tost fondu au feu / et bien tost retourne a sa lapideité / il mollifie et mundifie et fait fondre tous corps / et puis apres se soubstrait diceulx par fusion anisi que fait le sel par laveure. Et sont le sel et le voirre deux choses esquelles est tout le secret de l'art et ne se peult faire la pierre philosophal sans iceulx / et par especial sans sel.

Du livre des natures des choses. Le voirre est dit estre des parties de mercure. Je ne scay pour quelle cause / s'il non pour ce que il recoit taincture et couleur. Et aussi dissout le

vue 930

fer et tous les corps et les fait fluyr. Et ainsi comme l'eaue qui est de sa nature froide se eschauffe du feu / et apres que elle refroidist est faite tres froide / ainsi la cendre de quoy est fait le voirre comme soit seiche si elle est admoistie par liquefaction / apres qu'elle sera deseichée elle sera tres seiche.

Plinius au xxxvi livre. Au genre de voirre les obsciences sont nombrez a la similitude de la pierre laquelle ossidius trouva en Ethiope. Elle est de couleur tres noire et transparente aucuneffois de gras regard et rendant pour ymage umbres es miroers des parois. Et sont plusieurs des gemmes dicelle. Et avons veu de fermes et solides ymages de Divus Augustus prins de la matiere de cette crassitude / Lequel obsidius aussi pour icelluy miracle consacra quatre elephans obsianes au temple de Concorde . Et est le obsiane du genre de tainture convenable pour faire vaisseaulx a viandes / et est appellé tout voirre rouge non transluisant hematinon.

L'acteur. Et ainsi de la naissance du voirre et de sa nature / et de ses operatins en Alleymie / et de sa vertu en medicines des choses dictes suffisent.

Chapitre Cxl. De vitriolo Vitriol

Vitriolum. Serapion au livre aggregatoire au chapitre zeg de l'auctorité Galien. Zeg : c'est a dire vitriol. J'ay veu esminieres trois voines estandues l'une sur l'autre par long espace / et estoit la voine de dessoubz zeg noir / c'est a dire vitriol noir / et est appellé markasite. Et la seconde qui estoit sur elle est colcotar ou calcitis. Et la tierce qui estoit superieure cest zeg vert / cest vitriol ou calcantum / et ceste est zeg noir. Il est converty et est fait cocotar / et colcotar est

fait zec vert / cest vitriol. Il est ung autre vitriol rouge. Et toutes les trois especes se diversifient ensemble en subtilité et grosseesse. Car le plus gros dicelluy est zeg noir et le plus subtil est zeg vert / et colcotar est le moyen entre les deux. Et la vertu de tous ceulx cy est adustive bruslans la chair et faisant escarz dur / et est stiptique. Et le vitriol verd et aussi colcotar se dissoult et ne se fond point / car son coagulative est fort petrifiée. Et le zeg verd est maturatif par sa chaleur natuelle par plus ample maturation que colcotar.

Les operations de vitriol

Luy mesmes de l'auctorité Dyascorides : Zeg / l'ung es Babilonique / et l'autre Cipressisse et est le babilonique meilleur et est dur / et quant on le rompt il a par dedans macules blanches. Et la vertu est comme la vertu de calcidis et brusle comme luy. Et le ciprense a sa couleur aures vers la couleur de arain frangible venimeux ainsi que alun / ayant par dedeans macules resplendissantes semblables a estoilles. Et le meilleur dicelluy est celluy qui est nouveau et frangible. Et celluy qui est apporté de Babiloine est meilleur et plus fort en toutes choses que celluy de Cyprense fors es medicines des yeulx. Car en ce il est plus debile que le cyprense / et a vertu stiptique.

Serapion de l'auctorité Dyascorides. Vitriolum / cest calcant. Il a vertu stiptique constructive / adustive. Et quant icelluy est prinse en beuvrage il oste la nuisance des champignons faisans vomir. Et est mise de sa pouldre es narines et il restraint le sang qui flue dicelles. Et quant de luy est mise aucune chose es narines distillé en eaue il modifie la teste. Et la pouldre mundifie les ulceres qui sont es narines et es aureilles / et oste les douleurs de l'aureille / et occist les vers qui sont en icelles.

Paulus au chapitre de Vitriolo. Il est chault et sec au quart degré.

Bulcasim au livre qui est dit Servitor transplate par Symon de Janua.

folio Clxx vue 931

La forme de sa combustion est ceste. Pren calcant et le metz dessus une tuille ou test nouveau / et la metz dessus les charbons ardans et la brusle. Et est faicte la quantité de sa combustion si cest calcan non pas de moult de quantité quant il n'apparent nulles ampoules. Et sera humidité de forte de desiccation : et se il est de ample humidité il fault qu'il soit laissé dessus les charbons ardans jusques ad ce que sa couleur soit mue. Et quant la couleur se muera et tournera a la semblance de occe il convient que tu l'ostes du feu et que (*tu*) le purges / et sont aucuns qui le mettent dessus charbons ardans et soufflent dessoubz jusques tant qu'il decline a citrinité.

Ou le mettent sur une tuille ou test et le mettent dessus les charbons / et le remuent et meslent jusques a tant que sa couleur se mue.

Chapitre Cxli de yride

Yris. Ysido. Yris naist en Arabie en la mer Rouge et est de couleur cristalline ayant six angles. Dicte yris par raison et arguement. Car quant elle est frappée

du soleil soubz sa couverture / elle ymite et envoie contre les paroyz prouchaines les especes et couleurs de l'arc celeste.
Plinius. La pierre yris est tres bonne laquelle fait tres grans arcs et semblables aux celestes.

Ensuit de la lettre **Z**

Chapitre Cxlii De zimemellazuri

Zimemellazuri. Ydidore. Zimemelazuri est une pierre / de laquelle la couleur celeste est blonde avecques petis corpuscules dorez / et ainsi est faicte la nostre.

Les operations de zimemellazuri.

Sa vertus est contre melancolique passion et contre la quarantaine. Et aussi sincope causée des vapeurs melancoliques.

Chapitre C.xliii De zizaa.

vue 932

Zizaa. Serapion au livre aggregatoire au chapitre hager alazaa. Hager alazaa / c'est a dire zizaa / est une pierre qui est apportée de Yamen et des terres de Syri. Et la meilleur est celle qui est apportée de Yamen.

Les operations de la pierre zizaa.

Cest une pierre en laquelle sont moult de couleurs diverses comme blancheur et noirceur et les autres. Et n'est jamais de la couleur de sincer. Et n'a point esté veu des hommes de Yamen ne de leurs regions qu'aucun aye porté ceste pierre avecques luy ou ait mise en sa maison qu'il n'aye veu en songes choses merveilleuses. Et avecques ce elle fait celluy qui la porte estre litigieux entre les hommes. Et quant elle est suspendue sur les jeunes enfans / elle augmente leurs baves. Et se il est fait vaisseau dedans pour manger ou pour boire / quiconques y mangera ou beuvra il ne pourra dormir en icelluy. Et quant elle est mise en pouldre / et on asperge de la jacinte avecques la pouldre dicelluy elle meliore moult sa couleur. Et est une pierre qui est la plus dure entre toutes pierres.

Chapitre L.xliiii De zignites.

Zignites. Ysidore. Zignites est une pierre de couleur de voirre. Laquelle portée au col vault contre notiloppe. Elle oste le sang et l'alienation de la pensée. Et se elle est tenue au embrasement du feu sa flamme se estaint.

Et dit ceste mesme chose Enax en son lapidaire.

Et ces choses dictes des pierres precieuses suffisent pour le present.



Les livres et auteurs à rechercher

Aayen
 Albert en son Lapidaire
 Alchindus
 Alexandre, Alixandre
 Almansor
 Alucredus
 Aristote au livre de Metheore, au livre des Bestes
 Arnault
 Arnoldus, Arnauldus, Arnouldus
 Atabary
 au livre des Ligturs Phisiques
 Avicenne au livre des Forces du Cueur
 Bertholomus au livre des Proprietés des Choses
 Bulcasin au livre du Serviteur, Bulcasim au livre de Servitor
 Cassius Felix
 Contantin au livre des Degrés
 du Lapidaire
 du livre des Metheores
 du livre des Selz et des Aluns
 du livre des Vapeurs
 du livres des Natures des Choses
 Dyascorides, Diascorides
 Enax, Evax en son Lapidaire
 Galien l'Antidotire
 Haly en sa pratique
 Helimandus, Helmandus, Helynandus en ses Croniques
 Huba
 Je (l'auteur Cuba)
 Jehan Mesus
 Joseph dans l'œuvre contre les humeurs nuisables
 La Pandecte
 L'acteur
 L'Alkimiste, la doctrine de l'Alkimie,
 L'auteur
 le Patron
 Le Philosophe au livre d'alun
 Le Plaetaire
 Paladius au livre de Agrilcutura
 Paulus
 Phisiologus
 Plinius
 Rasis au livre des Proprietés, du livre des Alun et du Sel, en Almansor
 Senesque es naturelles questions
 Serapion au livre aggrégatoire, de lui mesme et de l'autorité de Dyascorides, de Galien, de Rasis,
 de Alransi, d'Ysaac, de Athabari, d'Alcauzi, de Paul, de Aben Mesuay
 Sero
 Servius sur Buccolique
 Solin
 Symon de Janua
 Theofrastus
 Ysaac Benjamin



Table

A	page 04
B	page 23
C	page 26
D	page 35
E & F	page 37
G	page 41
H	page 44
I & J	page 45
K	page 47
L	page 48
M	page 52
N	page 60
O	page 61
P	page 64
Q	page 68
R	page 69
S	page 70
T	page 82
U & V	page 88
Z	page 96





vue 934

